

Atham woMaththa Lon iloporot loKapik ammakka oMaththa pokurrot Lon lonothon

OMaththa pokat pul potha'rintinhet nili akucci akka oIeccuo pakkarorok othakka itti akwomakothok. OIeccuo pakkarorok akwoka okkulukku nti iul wothothilettat iattul ana ikken ke'ra. OMaththa pokurrot elli akwokene ul woIouth itti oIeccuo ook oMiccie ukul ia Kapik konekkethe lon cik itti kathiot. Ilen akka oMaththa poku'renet atham ncik n'ran wothiki opakkinthet oThauth ana Aprein. Kwokenet itti oIeccuo pokkothe lon ila ul wothernte lon loKapik wi'ret ma'rot.

OIeccuo pociettat 'ran woppot iatham enni, ammakka itti 'ukul woThauth' ana 'oMiccie' ana 'pul ipa'rettot' ana 'Kapik kaik naron' ana 'Ili woul woIouth.' OMaththa pi'ret ton itti ngili ngoKapik ngarat ana ul iammakothok wikkoik tat. Kwi'ret ton itti ngili ngoKapik ngoul appik iakkot lon ila Kapik kongothe.

Akka oIeccuo piot ana uroko nti ithio, kwi'rekathe ul iammakothok itti, "Ongappa pethin ngili ikkun appik ngolon lorothi'rot ana lonocapu." Kwi'rethekin itti okin thaeo akin othongkene ul appik othakka itti athakka ul iammakothok cakuruk (Maththa 28.18–20).

Lon ilaik iatham

1. Thiki ana thokwonta thoIeccuo oMiccie (1.1–23)

2. Ngere ngoIuanna pomamuthie (3.1–12)
3. Mamuthie ana thennekketta thoIeccuo (3.13–4.11)
4. Ngere ngoIeccuo noththok poCelil (4.12–18.35)
5. OIeccuo paeo noththok poCelil akweo noka'ran koUruccelim (19.1–20.34)
6. Thokkutte makkma thoIeccuo ana thio thung (21.1–27.66)
7. Thuroko thoIeccuo ana thummot ncik thung (28.1–20)

Thiki thoIeccuo

¹ 'Ran enni wothiki thoIeccuo oMiccie ukul woThauth, ukul wAprein.

² Aprein pokwonot oIccaak ana oIccaak pokwonot olakup

ana olakup pokwonot oloutha akin opangon,

³ ana oloutha pokwonot oPparic ana oThara nti iaThthamar

ana oPparic pokwonot Accrun

ana Accrun pokwonot oRam,

⁴ ana aRam pokwonot Aminathap

ana Aminathap pokwonot oNaccun

ana oNaccun pokwonot oCalmon

⁵ ana oCalomon pokwonot oPuac nti iapari oRaap

ana oPuac pokwonot Opet nti iaRauth

ana Opet pokwonot olecce

⁶ ana olecce pokwonot ili oThauth.

Ana oThauth pokwonot oCiliman, nti ipari oUria,

⁷ ana oCiliman pokwonot oRapaam

ana oRapaam pokwonot Apia

ana Apia pokwonot Acca

8 ana Acca pokwonot oIuccappat
 ana oIuccappat pokwonot oUram
 ana oUram pokwonot oUthia

9 ana oUthia pokwonot oIutham
 ana oIutham pokwonot Aac
 ana Aac pokwonot Acikkia

10 ana Acikkia pokwonot oManacce
 ana oManacce pokwonot Amun
 ana Amun pokwonot oIuccia

11 ana oIuccia pokwonot oIakkunia ana opangon
 noca'ri ica ul wonekittat noththok pen
 akin onekittat noththok poPapil.

12 Anakka ul wonekittathe noththok poPapil
 oIakkunia pokwonathe oCcaliththil
 ana oCcaliththil pokwonot oCerupapil

13 ana oCerupapil pokwonathe Apiuth
 ana Apiuth pokwonot Aliakkim
 ana Aliakkim pokwonot Acur

14 ana Acur pokwonot oCcathuk
 ana oCcathuk pokwonot Akim
 ana Akim pokwonot Aliuth

15 ana Aliuth pokwonot Aliacir
 ana Aliacir pokwonot oMaththan
 ana oMaththan pokwonot oIakup

16 ana oIakup pokwonot oIuccip olle poMeriom
 ipokwonot oIeccuo ipakkarako itti oMic-
 cie.*

17 Ittina thiki ithanthan appik thokat attul ana
 ikken koco'rin nci nAprein oingkanthet oThauth
 (14). Ana nci naThauth ca'ri ica ul waik ikwat
 noththok poPapil, thiki thokat attul ana ikken

* **1:16** 1.16 Miccie ilonu itti 'Tho'rutta ngak ngothothikkietta ili.'

koco'rin (14). Ana nci noca'ri ica ul waik ik-wat noththok poPapil oingkanthet oMiccie thiki thokat attul ana ikken koco'rin (14).

*Thokwonta thoIeccuo oMiccie
(Lukka 2.1-7)*

¹⁸ Lon elli ileret kathar kothokwonta thoIeccuo oMiccie. Onnan pung oMeriom pokat pokkaccakinet oIuccip anaruk akka okin thaththarthuk ikkoik tothun kwincakathe itti kwoppethe mpu'ran poKanang ikupupure.

¹⁹ Ana oIuccip olle pung pappokat pul poporot tokit koKapik ana kw'rakathe itti kwakinnitto lon lopari oMeriom, akka ul occirok ngngin ana kwi'rekathe itti kwathiok nthu'ran.

²⁰ Anaruk akka kwokat akweret noucce itti kwathiok, au'rupa wothothilettat woIli akkakanthok inthe athintiekathok ai'rekathok itti, "Iuccip ukul woThauth, kirnni ipo n're itti ngkwaneke oMeriom akwothakka pari pang, akka kwoppethe mpu'ran poKanang ikupupure.

²¹ Ana kwakwono ukul ana ngkwaccie k'ran itti oIeccuo, akka wa'ret ul wung nti ilon ilokithak."[†]

²² Elli lokat cik appik othakka itti alomartto lon ila Ili wi'ret nthon thopul pothernte lon loKapik oka icat itti,

²³ "I're w'rek iakanna'rutta ngngin aththik wap-pet

ana wakwono ukul
ana waccietta itti Amanauil"
ilonu itti 'Kapik kaik naron.'

²⁴ Anakka oIuccip purttat nti inthe, akwokkat ammakka u'rupa wothothilettat woIli wi'rethok.

[†] **1:21** 1.21 Ieccuo ilonu itti 'Tho'rettot.' **1:23** 1.23 Iccaiia 7.14

Akwonakat pari pung tuan thanung. ²⁵ Anaruk kwakanna'rat ngngin puccuk mono apokwonat ukul, akwocciekat k'ran itti oIeccuo.

2

Ul iaththokatha oIeccuo

¹ Anakka oleccuo pokwontathe noka'ran koPeththelam noththok poIouthia nothuput thoIli oIruthuc, ul w'rek wakkakathe na cingki ummot ngngin aanthan noka'ran koUrucelim, ul wen wonat k'ran itti Macuc* ² wipittathe itti, "Ili woIouth waik kartha iokwontat? Onin thimmathe cothot na cingki ummot ngngin ana onin thaat innatha'ranok nga'rama."

³ Manakka Ili oIruthuc poccikathe lon len kuakathe ka nul wung appik noka'ran koUrucelim. ⁴ Ana Ili oIruthuc wakkarathe ul appik ittittik woul wonoppa toKapik tothun ana ul iangkene lon lothonce'ret lon cik akwipittat kin itti, "OMiccie paik pakwontat kartha?"

⁵ Akin i'rekathok itti, "Kwaik pakwontat Peththelam noththok poIouthia akka ilen ila pul pothernte lon loKapik perethe itti,

⁶ 'Anaruk Peththelam ponoththok poIouthia,
ngkwaka priik tokit konili noththok
poIouthia

akka ili wanthan nti iul wang

iathokatha lon loul woIccereil."

⁷ Alli oIruthuc akkarat ul ioccot k'ran itti Macuc thu'ran, akwipittat kin ca'ri ica cothot cummothe ncik. ⁸ Kwothiathekin Peththelam

* **2:1** 2.1 Macuc itti ul inaik nti ica ana wina lon lomothot. **2:6**
2.6 Mikka 5.2

akwi'rekat kin itti, “Ngkonon annokwantot ukul kicce amma onon thiothe annathi'rethin aneo cakuruk anotha'ranok nga'rama.”

⁹ Anakka okin thoccikothe lon lolli oIruthuc akin oingkat. Anakka okin thokat cik ikathar akin eo akin immakat cothot aceo tokit ken icakin thaththimmathe na cingki ummot ngngin, mono acoco'rat to'ra woka'ran na ukul wokat. ¹⁰ Anakka okin thimmat cothot, akin opirakat noka kannan. ¹¹ Anakka akin i'riko noppa, okin thimmakathe ukul ana onnan oMeriom ana okin thekathe ungku ncik ana uet toma cik akin a'rakanthet ukul nga'rama. Okin thanyathe a'ruk wen akin ekat ukul a'rupu iakin thonanet ionu cekerek crik, thaap ana o'ren woku-cuk ikakkunako ere amutha ana ngaak iakkunako ere amutha. ¹² AKapik akkakanthet kin ithathantako aki'rekat kin lon lonthoththomat itti okin thakorronno opakkinthet oIruthuc, akin okkat ikathar koka akin opakot noththok pen.

Thura eo noththok poMuccir

¹³ Anakka Macuc meot, au'rupa wothothilettat wollu akkakanthet oUccip ithathantako ai'rekathok itti, “Uroki aneko ukul okin onnan aura aeo noththok poMuccir. Ikkoik than puccuk ani'rekathung ca'ri icao nan akka Ili oIruthuc paik pakwantot ukul itti kwakkwot.” ¹⁴ AUccip urokat ngko'ra akwonekat ukul ana onnan akwoingkat noththok poMuccir, ¹⁵ nakin thikkot cik mono aIruthuc iat. Ana lon lokakathe icat ammakka Ili wothiothe pul pothernte lon

loKapik ngngin akka pi'ret itti, “Mpakkarot ukul win noththok poMuccir.”

¹⁶ Manakka oIruthuc paththiot itti Macuc mammikkothok, akuakat ka kannan akwi'rekat lon lonthomat itti nyukul inyomura inyarran nyonu itti nyangutta appik nnoka'ran koPeththelam ana manna na'ran iaik iccik ken, ummo nciki nonyukul inyonu luput le'ra ana manna inyurunokwonta noma'ri ima kwocckithe lon noul woMacuc nan. ¹⁷ Ana lon ila pul pothernte lon loKapik Armia lokakatheik ila kwappi'ret itti, ¹⁸ “Kuri kokkuttathe noka'ran koRama, ngeme ana thiak thaccokakot kannan, oRail paik poot nyukul nyung ana kw'rat itti kwakannapiettat cik, akka okin thellaik nocapu.”

Thopakkot noka'ran koNaccir

¹⁹ Manakka oIruthuc piot, au'rupa wothothilettat wolle akkakanthet oIuccip ithathantako akkwaik noththok poMuccir ²⁰ ai'rekathok itti, “Uroki aneko ukul ana onnan apakkot ngngin noththok poIccereil, akka okin ithokat cik thakkwot ukul thillet.” ²¹ Akwurokat akwonekat ukul ana onnan akwopakkat kin ngngin noththok poIccereil. ²² Anaruk oIuccip pockkathe itti Arakkalaoc paik nongili ngoththan oIruthuc noththok poIouthia, kwipathe n're eo noththok pen. Kapik ki'rekathok lon lonthoththomat ithathantako ana kwoingkathe noththok poCelil, ²³ ana kwakkathe ana kwaththikkat cik noka'ran koNaccir alokakat ammakka ul wothernte

lon loKapik wi'ret itti, “Kwakkarako itti pul poNaccir.”

3

OIuanna pomamuthie

(*Markkoc 1.1-8; Lukka 3.1-18; Iuanna 1.19-28*)

¹ Ana noma'ri men oIuanna pomamuthie pakkakathe, akwikkat cik akwerene ul lon ithampang ithonthomat thoIouthia ² akwi're itti, “Nopa'rine lon ilokithak cik akka ngili ngorothis'rot ngakko napuththut.” ³ Ana oIuanna akka oIccaia pul pothernte lon loKapik pokat perethe llon itti,

“Po're popul paik pakkaro nti ithampang ithonthomat, itti

‘Nokuccenthet Ili kathar cik

ana oce'renthok kathar cik.’ ”*

⁴ Ana oIuanna pokat akwakukko eret wokkattathe norua tothamla ana akwi'rikakot ku'rat ikin ana kwokat cik akwikikko aun ana ortte kat. ⁵ Ana ul wokat cik aukkinok nnoka'ran koUruccelim ana nnaa'ran woIouthia appik ana nna'ran woÜrÜthün appik. ⁶ Anakka ul wokat cik aeret lon len thapat ilokithak ilokat nouce wen, kwikkatheik akwikket kin mamuthie norue toÜrÜthün.

⁷ Anaruk akka oIuanna paththiot itti ul woppot woPriccin ana woCcathukkin wainok athocco mamuthie, kwi'rekathekin itti, “Nyukul nyoinyil enyrik, oththa akki'rethenon itti onon thallot thua ka thoKapik ithanthan?” ⁸ Nokkot ngre

2:23 2.23 Markkoc 1.24; Lukka 2.39; Iuanna 1.45 * **3:3** 3.3 Iccaia 40.3

iakene itti onon thopa'rinet lon ilokithak cik.
⁹ Nokorronno omet kakon itti, 'Onin nyukul nyAprein.' Mpi'ret non itti Kapik kina oprtto mothok emmi cik amokakat nyukul nyAprein.
¹⁰ Nantoccikot, pul ipathio ponekkethe kinyit kocemeke ci nolaka lokira. Ana pira ipakorronno okwono nyukul nyoporot pakeccat cik aporret-takat ithik.

¹¹ Mpethet non mamuthie ngng'ri annopa'rine lon ilokithak cik, anaruk okkwi ipaik panthan priik naun ana mpakannekkon nan itti mpak'rinok lo'rk nti wok wung. Ook akkethet non mamuthie ngKanang ikupupure ana nthik.† ¹² Ana akwokkwo ton nnomil akwi'rekat akwollakat liccit akwummo imoporot akunot ittit ana ton akwok're nthik ithakinnio aththik."

Oieccuo pacco mamuthie

(Markkoc 1.9-11; Lukka 3.21-22)

¹³ Ana oIeccuo pakkakathe nnoththok poCelil akweo norue toÜrüthün akwothocco mamuthie nti ikkun woLuanna. ¹⁴ Anaruk oLuanna pikkatheik ere kw'ranok, ana kwomekathok itti, "Oun akkonu itti mpacco mamuthie nti ikkun wang ana tat akka ainin itti mpethung mamuthie?"

¹⁵ Aleccuo othianthok tit itti, "Kirrnni aloka inenni menik, akka orit thouu itti orit thakkot ammakka Kapik kongothe itti lakkattat appik." AIuanna angkat.

† **3:11** 3.11 Mamuthie moLuanna makene itti ul waththiot itti okin thokkothe lon ilokithak. Anaruk mamuthie moIeccuo mimet ul lon ilokithak ana othikkiekin thupupure ammakka thik ok're paponte apothakkakat po'rillir. Malakki 3.2; Ngre 2.17-21

¹⁶ Menik aleccuo occat mamuthie nti ikkun woJuanna. Manakka oIeccuo poppot nti i'ri, arothi'rot anyat akwimmakat Kanang koKapik akuo ntan naak ere cülökkür. ¹⁷ Apo're akkakat ntothi'rot api're itti, "Ukul win enni ia mpongothe, mpopirat noka nan."

4

*Pul pothopulut pennekke oIeccuo
(Markkoc 1.12-13; Lukka 4.1-13)*

¹ Ana Kanang koKapik konekathe oIeccuo ithampang ithonthomat, apul pothopulut othennekkek. ² OIeccuo papponat ma'ri arrial we'ra (40) akkwoco'rot nothu'rit icingki ana ngko'ra ana akka kwocothothe ma'ri mothoco'ro nothu'rit, kwokakathe piamat. ³ Akkwi ipenneksetto akkakanthok akwi'rekathok itti, "Amma oung ukul woKapik, ai'ret mothok emmi amothakkanung arrakith."

⁴ Aleccuo othianthok tit itti, "Lokurrakot iatham itti,
'Pul iponyi pakorronno ikkoik narrakith tulluk
anaruk llon ila Kapik i're.'"

⁵ Apul pothopulut onekathok icarak coman noka'ran koUruccelim ikupupure apoce'rekathok ci no'ra wonoppa toKapik. ⁶ Api'rekathok itti, "Amma oung ukul woKapik, aarre ka kang nci cene aarret nocapu, akka lokurrakot iatham itti,
'Kapik kathiot u'rupa wothothilettat wung llon
lonthoththomat,
ana waccinhang nyaun cik,

akka akkwo wek mpothok.’”

⁷ Aleccuo othianthok tit itti, “Lokurrat iatham cakuruk itti, ‘Kirrnni enekke Ili Kapik kang.’”

⁸ Apul pothopulut apponekathok noco'rong cukwit kannan apokenekathok ngili ngonocapu ncik appik ana thrik then. ⁹ Api'rekathok itti, “Mpethung a'rupu enni appik amma oung akkuethe toca cik tokit kin ana a'ranin nga'rama.”

¹⁰ Aleccuo othianthok tit itti, “Pul pothopulut, opa'rik ntokit kin akka lokurrakot iatham itti, ‘A'ranet Ili Kapik kang nga'rama akka ook pulluk akkarekagine.’”

¹¹ Ittina apul pothopulut oththekat naIeccuo, au'rupa wothothilettat woKapik akkakat aikkat cik akatha lon lung.

*Oleccuo pangkene noththok poCelil
(Markkoc 1.14-15; Lukka 4.14-15)*

¹² Aleccuo occikat itti oLuanna pakin thonekkethe ikorrkkor, akwopakkat noththok poCelil. ¹³ Anaruk kwakinnikkat cik noka'ran koNaccir, kwoingkathe ana kwaththikkat cik noka'ran koKapprnaum ikaik nokuthut korok irapangka toCelil nocik coCapulun ana coNaphthalim. ¹⁴ Othakka itti alomartto lon ammakka pul pothernte lon loKapik oIccaia pi'ret akka pi'ret itti,

¹⁵ “Pothok poCapulun ana pothok poNaphthalim

ipaik ikathar korok irapangka toCelil eo
 norue thok'rakan koÜruthün,
 Celil coul iakannoka wolouth,
 16 ul iaik i'rimak
 wimmat k'ran kocingki ikrik akocco
 ana iaik noka'ran ikonu ngi'rimak
 wimmat k'ran kocingki akocco.”
 17 Ana nci noca'ri cen oIeccuo pikkatheik
 akwerene ul akwomet kin itti, “Nopa'rine lon
 ilokithak cik akka ngili ngorothis'rot ngakko na-
 puththut.”

*OIeccuo pakkaro ul iammakothok wocittokit
 (Markkoc 1.16-20; Lukka 5.1-11)*

18 Anakka oIeccuo pokat cik akwonyaro
 nokuthut korok irapangka toCelil, akwimmakat
 ul we'ra ionat oththan pen pulukku, 'ran wen
 wokat itti oCamaan iponat k'ran kothirit itti
 oPoththuruc ana opang Anthrauc okin thokat
 akin orret lo'rok lape irok akka okin thatthokat
 ul woriape. 19 AIeccuo omeakat kin itti, “Nanthan,
 nomakothin, anothikkienon ul iaccicokot ul.”
 20 Akin oththekat nolo'rok lape len aththaman
 akin omakathok.
 21 Akwoingkat ncinang akwappimmakat ul
 we'ra ionat oththan ana onnan pen pulukku
 cakuruk, okin thokat olakup opei poCepethi ana
 opang oIuanna, okin thokat cik akin oththan
 pen oCepethi ikuppu'rung konoi'ri akin okuc-
 cet lo'rok cik lape akwakkarat kin. 22 Menik
 accokkot akin oththekat naththan pen ana
 kuppu'rung konoi'ri, akin omakathok.

Oieccuo pittiet ul iongo
(Lukka 6.17-19)

²³ Oieccuo pikkatheik akwonyaro na'ran woCelil akwongkenet ul nomuththun ma'rama, akwerenekin lon iloporot longili ngoKapik ana akwittiet ul appik iokat wongo. ²⁴ Alon lung opettakat cik noththok poCcuria appik aul ikkat cik annanok ul appik iongo mio kurekkurek, okin itha mio mokat amok'rello thiak thiak, okkwion itha u'rupa iokithak wo'rot nan ana okkwion ithapellet ikapa ana okkwion ithaimico, akwittiekat kin. ²⁵ Aul woppot omakathok noththok poCelil ana Na'ran iattul* ana noka'ran koUruccelim ana na'ran woIouthia ana arrot cik Ürüthün.

5

Oieccuo pangkenet ul noco'rong

¹ Anakka oieccuo pimmat cungkut coul akwoku'rat no'ra woco'rong akwikkat cik. Ul iammakothok wakkakanthok, ² kwikkathe cik akwongkenekin akwi're itti,

Thethietta
(Lukka 6.20-23)

- ³ “Thethietta thaka noul ianekket cikit noKapik akka ngili ngorothis'rot ngaka ngen.
⁴ Thethietta thaka noul iaik waccokot thiak, akka okin thapiettat cik.
⁵ Thethietta thaka noul iakinnipot ka thoura, akka okin thapakkot nocapu enci appik.

* **4:25** 4.25 A'ran Iattul: A'ran iattul iaik na cingki ummot ngngin noththok poCamiria ana poCelil na ul wikikkot cik iakannoka ul woIouth.

- ⁶ Thethiëtta thaka noul iongothe kathar kothoka
thoporot tokit koKapik,
akka okin thaththakat.
- ⁷ Thethiëtta thaka noul ionu thiak thoul,
akka okin thipako thiak then.
- ⁸ Thethiëtta thaka noul ionu mikit mupupure,
akka okin thimma Kapik.
- ⁹ Thethiëtta thaka noul iakkot ku'ri,
akka okin thamettat itti nyukul nyoKapik.
- ¹⁰ Thethiëtta thaka noul iaik waccokiettat thiak
nti ithokkot lon iloporot,
akka ngili ngorothis'rot ngaka ngen.
- ¹¹ Thethiëtta thaka thon amma ul wocungkwot
non, ana occokiet non thiak ana eret non ngkarra
ana llon lulluk ilokithak nti ilon lin. ¹² Nopira
noka ana iriko, akka thokketta thon ithrik thaka
tothis'rot, nina nan itti okin thocciccokiethe ul
wothernte lon loKapik thiak tokit nanon."

Nguculoththu ana k'ran ikaccie cik
(Markkoc 9.50; Lukka 14.34-35)

¹³ "Onon thauculoththu ngonocapu. Anaruk
amma nguculoththu ngothakkat ngocalang,
ngappothikkietta ngira taththa? Ngakonnoka
ngoporot p'rin itti ngakkattat ngngre ng'rek,
ngonu itti ngarretta angocukkarakot cik.

¹⁴ Onon k'ran ikaccieik nocapu ncik ap-
pik. Ka'ran ikaik no'ra woco'rong kakan-
namu'ruttako ncik. ¹⁵ Ul wakannoccie cu'ru
iconu ngaak tit iacco akin antokurupot pap'rek
nan, anaruk caka nocuruk acina akka acociene
ul cik iaik tuan appik. ¹⁶ Menik nokorronno
ak'ran konocco tokit koul othakka itti akin

imma ngre ngon ioporot, akin opirane oththe pon porothi'rot noka.”

Lon lothonce'ret lon cik

¹⁷ “Nokorronno ome itti mpaat anathoce're lon lothonce'ret lon cik loMucca ana thongkene thoul wothernte lon loKapik. Mpakannao itti anathoce're anaruk mpaat itti anathothikkie icat. ¹⁸ Mpi'ret non lon ilaik icat itti arothi'rot intakat cik ana capu, ce'ripil cella culukku cintat cik ana manna tamping nolon lothonce'ret lon cik, puccuk alon okakat cik icat ilonekkettatheik. ¹⁹ Ana okkwi iparrothe lon cik lotteik nolon elli ilonekkettatheik ana ongene ul itti wakkot ammakka ook, kwathikkietta potteik ingili ngorothis'rot, anaruk okkwi iporekot ngngin ana ongene ul cakuruk, kwathikkietta prik ingili ngorothis'rot. ²⁰ Anaruk mpi'ret non itti amma thikkoik thon thokkot ngkathar ikoporot koKapik thakorronno oka thoppot nolon loul wothongkene lon lothonce'ret lon cik ana ul woPriccin, onon thakinni'riko ingili ngorothis'rot.”

Thua ka

(Lukka 12.57-59)

²¹ “Onon thocckithe ma'rot thupuththuput itti, ‘Pul pella pakkwot pul ana okkwi ipokkwothe kwanekittat imakkma.’ ²² Anaruk mpi'ret non itti okkwi ipua ka kopang, kwanekittat imakkma. Ana okkwi manna ipocungkwot pul itti, ‘Pommaik,’ kwonu itti kwanekittat nocuththun coul woIouth ittittik

akwothakkmako. Anaruk okkwi ipomethe pul itti pakannoka poporot, kwarrettat ic'rot thothirin.

²³ Amma ngkwaik pethet Kapik a'rupu noru'rot ta'rama mono akwarikot itti opangkang ponu lo'rek cik naung, ²⁴ oththe na'rupu wothokiot ngüccük cik tokit koru'rot ta'rama annothopakkot iku'ri anopangkang kicce antathethet Kapik a'rupu wothokiot ngüccük cik wang.

²⁵ Nopakkot iku'ri cokocokot nopul ipanon tha'rettot anon thaik ikathar appaik aponekothung imakkma. Okkothe lon len antharthuk ikathar aththe'ra akka akwethung ili ikkun iance'ret lon cik, ana ili wethung ili woul worikorrrkor ana ngkwanekketat ikorrrkor. ²⁶ Mpi'rethung lon ilaik icat, itti ngkwannao oppot thapat aththik akkekat papu ipoththeik ipokwentakot nocalak cang."

Thongkene thoul ipot ia'ro nul iari ittat

²⁷ "Onon thocckithe ma'rot itti, 'Pul pella ipa'ro nul iari ittat.' ²⁸ Anaruk mpi'ret non itti okkwi ipokathat pul ipopari mono apiniekathok, nokatha kwa'rothe ngngin noucce. ²⁹ Amma cit cang cothokkun wothothari cakkiehung lon ilokithak, antho nti ica arre akka laka loporot itti cit culukku cellaik akorronno onekot ka appik ico'rot. ³⁰ Ana amma ukun wang wothothari wakkiehung lon ilokithak, akiot cik akka laka loporot itti ukun wulukku wellaik notheo ngka appik thothirin."

Thothio pari
(*Maththa 19.9; Markkoc 10.11-12; Lukka 16.18*)

³¹ “Nthocçikothe cakuruk itti, ‘Okkwi ipothiöt pari kwonu itti kwethok ka'rmacak kothothiako.’ ³² Anaruk mpi'ret non itti okkwi ipothiöt pari appakanna'ro mpul, kwaik pakarrannok akwa'ro nul. Ana okkwi ipipot pul pen, kwaik pa'ro mpul ipittat cakuruk.”

Thokkwo mio

³³ “Ana onon thocçikothe thupuththuput cakuruk itti, ‘Nokorronno aurrot thokkwo mio cik aththik anaruk noccot kit nolon ilanon thonekketheik annoIli.’ ³⁴ Anaruk mpi'ret non itti nokorronno arrma aththik manna nthi'rot akka thaporrok na Kapik ikkoik ³⁵ ana okorronno okkwo manna capu akka ka'ran na akwonekket tacok tung ana manna okorronno okkwo ngka'ran koUruccelim akka ka'ran koKapik Ili irik. ³⁶ Nokorronno arrma nca copul akka manna ngkwomma oprtto kwan cik kulukku athikkie kipuk ana manna othikkie konyi. ³⁷ Alon lon oka tulluk itti ‘Ii’ ana itti ‘Aa’ ana okkwi iparttothe no'ron elli laka nopul pothopulut.”

Thokketta
(*Lukka 6.29-30*)

³⁸ “Ana onon thocçikothe cakuruk itti, ‘Cit cakketta ncit ana cinyit cakketta ncinyit.’ ³⁹ Anaruk mpi'ret non itti nokorronno orro ipul ipakkot lon ilokithak. Amma pul p'rek

5:31 5.31 Thethinia 24.1
Lauin 24.20; Thethinia 19.21

5:38 5.38 Thoppot thapat 21.24;

pokkworung thounu wokkun wothothari, aprtti-nok thounu w'rek cik. ⁴⁰ Ana okkwi ipongothe itti kwanekothung imakkma othakka itti akwonekothung kret konoka, korronnok akwoneko kret ikiththia ikaku'rupakakot cakuruk. ⁴¹ Ana amma pul poritho'rak ponekorung mpu'ran itti ngkwanekinok a'rupu atharothok, arothok ciththan. ⁴² Ana okkwi ipipittohung pap'rek ethok, kirrnni 'rane pul mpapu ipa kwongothe itti kwanekothung.”

Thongat tho'rak
(*Lukka 6.27–28, 32–36*)

⁴³ “Ana onon thocçikothe itti, ‘Nongat ul w'rek ana ann'ra ul iatho'rak thon.’ ⁴⁴ Anaruk mpi'ret non itti nongat ul ianthaik itho'rak ana a'rane ul nga'rama iakkiet non thiak. ⁴⁵ Othakka itti anon oka nyukul nyoththe pon ipaik tothi'rot akka ook akkummienthet ul cingki appik iakkot lon lokithak ana iakkot lon iloporot ana apiene ul kapik iammakot kathar ika Kapik kongothe ana ul iakannommakot kathar ika Kapik kongothe. ⁴⁶ Amma onon thongothe ul tulluk iongothenon, ngintha akka annoço ntit? Akka ul ia'rntinthet nili akucci wakkot menik cakuruk. ⁴⁷ Ana amma onon thakannomicco ul w'rek aththik annomicco opangkangon thulluk, ngintha akka annoço ntit? Ul iomma lon Kapik waik wakan-nokkot menik cakuruki? ⁴⁸ Ittina noka thoporot ammakka oththe pon porothi'rot poporot.”

6

Thittarot ul iella a'rupu cik

¹ “No'rumoik, nokorronno okkot lon iloporot lon tokit koul, othakka itti akin imma non. Amma onon thokkothe ittina, ana onon thakorronnoocco lon iloporot nnaththe pon ipaik tothi'rot.

² Ana amma ngkwethet pul ipella a'rupu cik pap'rek, kirnni erene ul, ammakka okkwion ithinnikot lon okkot nomuththun ma'rama ana iathar othakka itti aul othianekin cik. Mpi'ret non lon icat itti okin ammakka enthrik thoccot lon len p'rin. ³ Anaruk amma aethet pul ipella a'rupu cik, kirnni okorronno manna itti ukun wang wothokure wina nolon ila ukun wothothari waik wakkot, ⁴ othakka itti athethet thang oka thamuruttakot ncik. Ittina oththe pang ipimma lon ila ngkwokkothe nthu'ran pethung lon iloporot.”

Nga'rama

(Lukka 11.2-4)

⁵ “Ana amma onon a'ra nga'rama nokorronno oka karkko ul innikot lon, akka okin thongothe itti okin tha'ra nga'rama akin oco'rot kapik nomuththun ma'rama ana iathar, othakka itti aul imma kin attattar. Mpi'ret non lon icat itti okin ammakka enthrik thoccot lon len p'rin. ⁶ Anaruk amma ngkwongothe itti ngkwa'ra nga'rama i'riki noppa aunukkwo kathat a'rane oththe porothi'rot nga'rama ipakinnimmako, ook ipimma lon ilamu'ruttakot ncik ook akkethung lon lang. ⁷ Amma anna'ra nga'rama nokorronno opakukkukwet lon tit loppot karkko ul iomma

Kapik akka okin thapri itti Kapik kaccikot kin amma akin opakukket lon tit. ⁸ Nokorronno oka karkken, akka oththe pon porothi'rot pina lon lon ila nthongothe, anon tharthuk ipittothok.

⁹ Ittina onon thouu itti ntha'ra nga'rama ittina, 'Ngappa pin ipaik tothi'rot, ak'ran kang othiakineik,

¹⁰ angili ngang anthan, alon ila ngkwongothe itti lakkattat, alokkattat nocapu ammakka lokkattathe tothi'rot.

¹¹ Ethet nin thu'rit ithekkko nanin inenni.

¹² Occikinthet nin lon lin ilokithak akka onin cakuruk thaccikanthet okkwion ithokkinthent nin lon ilokithak.

¹³ Kirnni apiet nin ithenekketta anaruk o'rethenin nti ilon lopul pothopolul.'

¹⁴ Amma onon akkaccikinthet ul lon ilakin thokkinthet non ilokithak, ana oththe pon porothi'rot paccikinthet non cakuruk. ¹⁵ Ana amma onon thakannoccikinthet ul lon ilokithak ilakin thokkinthet non, oththe pon pakan-noccikinthet non lon lon ilokithak cakuruk."

Thoco'ro nothu'rit

¹⁶ "Ana amma onon thoco'rot nothu'rit, anokorronno onthoma toma karkko ul innikot lon, wathikkie toma men mirrin othakka itti aul ina nakin itti okin thoco'rot nothu'rit. Mpi'ret non lon ilaik icat itti okin ammakka enthirik thoccot lon len p'rin. ¹⁷ Anaruk amma ngkwoco'rot nothu'rit, ilakki toca ana o'roko ngaak ¹⁸ othakka itti aul okorronno ina itti ngkwoco'rot nothu'rit, anaruk aththe pulluk pang akkina

ipakinnimmako ook ipimma lon ilamu'ruttakot ncik ook akkethung lon lang.”

*Tha'rthan tothi'rot
(Lukka 12.33-34)*

¹⁹ “Nokorronno a'rintintheet ka kon tha'rthan cik nocapu, na nangak ana piricirot okitto, ana na ul wothu'ran ongwoik akin omunye.

²⁰ Anaruk na'rntintheet ka kon tha'rthan cik tothi'rot na nangak nella ana piricirot okorronno okitto ana ul wothu'ran wakorronno ululoik itti wamunye. ²¹ Akka cikit cang caka na tha'rthan thang thaik cakuruk.

²² Cit corica cak'ran koka kang. Ana amma kit kang akkimmaik kicce ana ngkwimma kathar ikoporot na akko. ²³ Ana amma kit kang kakinnimmaik kicce ana ngkwakinnimma kathar ikoporot na akko. Ana amma k'ran ikaik iaung kai'rimak ana ngkwaka i'rimak kirrkir.

²⁴ Pul pella parekine opingon the'ra, kwonu itti kw'ra opit p'rek akwongat ap'rek ana manna itti kwaccokot pulukku ana akwopa'rine cik ap'rek. Ittina lomma itti onon thangat Kapik ana ongat tha'rthan.”

*Nokorronno irro mikit nti ikarak
(Lukka 16.13; 12.22-31)*

²⁵ “Ittina mpi'ret non itti nokorronno opellene lon lothikkoik itti onon tha'rko ngimpen ana ako ngimpen. Thikkoik thakonnoka thoporot nothu'riri? Ana ka kopul kakannoka koporot noreri? ²⁶ Nantokatha u'rupe worothi'rot, akka wakannora ana wakannokio ana wella irit cik anaruk icci oththe pon porothi'rot akka'rikiakin. Onon thakannoka thoporot kannan nou'rupei?

²⁷ Oththa nti ianon iparttot ca'ri culukku noma'ri mothikkoik mung amma kwonu n're?

²⁸ Nthontha akka annocot kit noret? Nantokatha po'ren porikkwon akka apocokka. Pakannoreko apakie ka ken. ²⁹ Anaruk mpi'ret non itti manna oCiliman ntha'rthan thung ithirik, kwakannako eret wopeththere ere po'ren empi. ³⁰ Amma Kapik ka'rumo noraco irakaik inenni ana ngorrot arorrettat ithik, Kapik kakanno'rumo nanoni? onon ithonu thoccokot lon loKapik nomikit thoththeik. ³¹ Ittina nokorronno ona n're anni're itti, 'Onin tha'rko ngimpen?' ana 'Ikko ngimpen?' ana 'Onin thako ngimpen?' ³² Akka ul iomma lon loKapik wammakot thu'rit ana a'rupu w'rek, ana oththe pon porothi'rot pina itti nthongothe a'rupu wen appik. ³³ Anaruk cittokit nipitto ngili ngoKapik ana thoporot thung, ana a'rupu enni appik weettat non cakuruk. ³⁴ Ittina nokorronno ipo n're nolon lorrot akka ngorrot ngakatha lon loka kung. Akka ca'ri culukku conu lon lung prek."

7

Thakkma opilingon (Lukka 6.37-38, 41-42)

¹ "Nokorronno akkma opilin akka onon akkmako cakuruk. ² Akka ngkathar ikanon akkma ul w'rek ngngin, onon thakkmako ngngin cakuruk, ana ngkathar ika annopekie llon iken akka annopekiettane llon lon cakuruk.

³ Ngkwontha akka accot küt nokwira ikaik icit copangkang akorronno occot küt nokwo'ren ikaik icit cang? ⁴ Taththa akka amet opangkang itti, kirrnni anumminung kwira nti icit angkwonu kwo'ren icit cang? ⁵ Oung ipinnikot cik, ummi kwo'ren nti icit cang aimmaik kicce antummine opangkang kwira nti icit cang.

⁶ Nokorronno erene ul lon iloporot iakanangkot itti waccikot akka okin th'ra ana okin th'ranon."

*Ipitti lon ana ngkwiot
(Lukka 11.9-13)*

⁷ "No'rungkot nolon ipitto ana lon len lettat non, nokwantot lon ana onon thiot, ana okkwi ipipitto thittarakot ana kwittarakot. ⁸ Akka okkwi ipipitto lon kwettat ana okkwi ipakwantot kwiot ana okkwi ipipitto thittarakot ana kwittarakot.

⁹ Oththa nti ianon amma opei pipittothok arrakith, akwethok pothok ¹⁰ ana manna amma kwipittothok pape, akwethok pinyili? ¹¹ Ana amma onon manna ithonu lon ilokithak thina akka annethet nyukul nyon a'rupu ioporot, oththe pon porothi'rot pakannethet okkwion ithipittothok a'rupu woppot ipoporori?

¹² Ittina nokkinthet ul lon ilanon thongothe itti okin thakkinthet non, akka lon lothonce'ret lon cik loMucca ana loul wothernte lon loKapik langkene ittina."

*Cürük icape ana icomü
(Lukka 13.24)*

¹³ "Ni'riko nti icürük cokathat icomü akka cürük icape caeo thothirin ana kathar ken

konyra kaul woppot wakkorit. ¹⁴ Anaruk cürük icomü ana kathar ikonu cürük comu kanekarot nothikkoik thothupuththuput ana ul wotteik akkakkorit.”

Pira pinako nynyukul nyen
(Lukka 6.43–44)

¹⁵ “No'rumoik noul wothernte lon loKapik ngkarra. Okin thainenon nyuruun ere lungkat anaruk mikit men mokithak karkko mipa imongothe itti mamotto ianon pu'rut pu'rut. ¹⁶ Kira kinako nynyukul nyen. Ul withtho ice nopira poli ana manna mo'riompong nopakeki? ¹⁷ Ammakka menik, pira ipoporot pakwono nyukul nyoporot anaruk pira ipokithak pakwono nyukul nyokithak. ¹⁸ Pira ipoporot pakan-nokwono nyukul nyokithak ana pira ipokithak pakannokwono nyukul nyoporot. ¹⁹ Kira appik ikannokwono nyukul nyoporot kakuccettat cik akorrettat ithik akok'retta. ²⁰ Ittina onon thina kin nynyukul nyen.”

²¹ “Annoka ul appik i'rethin itti, ‘Ili, Ili,’ wi'riko ingili ngorothis'rot anaruk okkwi ipakkot lon ila angappa ipaik tothis'rot pongothe. ²² Ul woppot wi'rethin noca'ri cothakkmako itti, ‘Ili, Ili, onin thakannerente lon loKapik ngk'ran kangi ana okicce u'rupa iokithak nti iul ngk'ran kangi ana okkot lon loppot ilommaththik ngk'ran kangi?’ ²³ Ittina mpi'ret kin nci nokkit itti, ‘Mpomma non kirrkkir. Nopa'roik nti iccik kin onon ul wolon ilokithak.’ ”

Pul ipuno ipinaik nti ica ana ipommaik
(Lukka 6.47–49)

24 “Ittina okkwi ipaccikot lon lin elli ana oreko nngin kwaka ammakka pul ipinaik ipunot man nocik iconthomat. 25 Anakka kapik kaat ai'ri oppakat tue akanang ikkat cik akokkurarot anaruk man makannapat akka mokat muntat nokancang. 26 Anaruk okkwi ipaccikot lon lin mono akwokorronno oreko nngin, kwaka ammakka pul ipommaik nti ica ipunot man mung nokamur. 27 Anakka kapik kaat angike oppakat tue, akanang ikkat cik akokkurarot. Anakka man mokat makannunta lon loporot akanang ikkat cik akokkurarot kannan aman apat ikkitheththak.”

28 Akka oIeccuo pomarttot lon elli, cungkut coul coprttakatherit no'ron lothongkene elli, 29 akka kwongkenet ere pul iponu ngili ikkun ana okorronno oka ammakka ul wen wothongkene lon lothonce'ret lon cik.

8

Pul iponat ñnyï noka

(Markkoc 1.40-45; Lukka 5.12-16)

1 Anakka oIeccuo paat ntoco'rong, acungkut coul woppot omakathok. 2 Apul p'rek akkakat ponat ñnyï noka apeekat ungu ncik tokit kung api'rekathok itti, “Ili, amma oung akkongothe ana ngkwittiethin.”

3 AIeccuo othiekat ukun akwothantat pul akwi'rekat itti, “Mpongothe itti mpittiethung othakka poporot.” Ittina aïnyï ittakanthet pul pen accokkot. 4 Ittina aIeccuo i'rekathok itti, “Amma ngkweot akorronno i'ret pul p'rek lon

elli. Anaruk ngko athokene pul ponoppa
toKapik ka kang akiat papu pothokiot nguccuk
cik ammakka oMucca pi'ret akenekin itti ngk-
wothakkat poporot.”

*Thocokot lon nocikit thoili woul irro woRoma
(Lukka 7.1-10)*

⁵ Anakka oIeccuo pi'rikot noka'ran
koKapprnaum aili woul arrial ukuluk irro
(100) akkakanthok, aipittathok itti kwittarothok.

⁶ Ai'rekat itti, “Ili, pul iparekinin paik tuan
paka kaik kak'rello kannan ana pomma uroko
nnonthe.”

⁷ Aleccuo i'rekathok itti, “Mpanthan anathitti-
ethok.”

⁸ Aili woul arrial ukuluk irro othiat tit itti,
“Ili, mpakanneko nan itti ngkwi'riko noppa
thanin. Anaruk i're lon tulluk ana pul iparekinin
pathakka poporot. ⁹ Oun cakuruk paik ikkun
woili irik naun, ana ul irro waik inyaun nyin.
Mpi'ret okkwempi itti, 'Ngko' ana kwaeo, ana
mpi'ret okkwempe're itti, 'A'rik' ana kwao, ana
mpi'ret pul iparekinin itti, 'Okkothe elli' ana
kwakkot.”

¹⁰ Anakka oIeccuo pocikithe elli, akwoprt-
takat tit akwi'rekat ul iokat cik ammakothok
itti, “Mpi'ret non lon ilaik icat, mpakanniot
pul p'rek aththik noththok poIccereil nthoc-
cokot lon loKapik nocikit thena. ¹¹ Mpi'ret
non itti ul woppot wantan na acingki ummot
ngngin ana na acorungkwot, ana wathikkoik
nokamuthe okin Aprein ana oIccaak ana olakup
ingili ngorothi'rot. ¹² Anaruk okkwion itha

ngili ngorothi'rot ngokucettanthe thaKapik or-ret thapat i'rimak akin antoo ana ok'rellot kinyit thocipit."

¹³ Ittina aleccuo i'rekat ili woul irro itti, "Ngko ana ngkwathiot alokkattathe ammakka ngkwonu nocikit cang itti lakkattat." Ana pul iparekinok pittakathe noca'ri cen.

Oleccuo pittiet ul woppot

(Markkoc 1.29-34; Lukka 4.38-41)

¹⁴ Anakka oleccuo paat thoPoththuruthon, kwaththiat opithe poPoththuruc ipopari akwicat cik ia'rangkal akkwongo ippa. ¹⁵ Oleccuo poth-ntathok ukun alü opa'rat cik nti iaak akurokat akwikkat cik akwokkinthe oleccuo thu'rit.

¹⁶ Anakka cipin capot, akin onakanthok ul woppot ia u'rupa iokithak wo'rot nan ana kwokiccekathe ntiakin llon ana ittiet ul iokat wongo appik. ¹⁷ Elli lokkattathe alomartto lon ila oIccaia pul pothernte lon loKapik pi'ret iatham wung itti,

"Kwonekot thokinya thonnon
ana kwittietheron nnomio."

Thomakot oleccuo thakannoka thippappat

(Lukka 9.57-62)

¹⁸ Anakka oleccuo pimmathe ul woppot ic-cik kung kwi'rekatho ul iammakothok lon lon-thomat itti okin tharrot nocarkan corok c'rek. ¹⁹ Ittina apul p'rek ipangkene lon lothonce'ret lon cik akkakanthok api'rek itti, "Pul ipangkene, mpammakothung na eo."

20 Aieccuo othianthok tit itti, “Mipa monu kürük na amicat cik ana u'rupe worothi'rot wonu nune anaruk ukul wopul iponyi wella ka'ran cik na aicat cik angoko.”

21 Apilin nti iul iokat cik ammakothok i'rekathok itti, “Ili, korronnon aneo cittokit anothocikko opappa.”

22 Anaruk oieccuo pi'rekathok itti, “Omakothin, kirrnni aul illet ocikko ul illet.”

*Oieccuo papiet kanang cik koKapik
(Markkoc 4.35-41; Lukka 8.22-25)*

23 Ittina akwarrat ikuppu'rung konoi'ri aul iammakothok omakathok. 24 Ana kanang kakkakathe accokkot norok akokkurarot kannan akikkat cik akokkurarot kuppu'rung athopangka thoi'ri ongku'rot ciki ithi'rot ai'ri ikkat cik angothukkwot ikuppu'rung. Anaruk oieccuo pokat cik inthe. 25 Aul iammakothok oingkat athurtathok, ai'rekathok itti, “Ili Ili, o'rethenin oron thaik thathikikko ng'ri.”

26 Akwothiat tit itti, “Onon ithonu thocokot tholon loKapik nomikit thotteik, nthontha akka annopelle?” Akurokat kapik akwothirriekat kanang cik ana thopangka thoi'ri ana cik cokkwathe ka appik.

27 Ul woprttakatherit ana wikkatheik aipitto itti, “Pul pokartha empi? Pakanang ana thopangka thoi'ri occikot lon len.”

*Thittiet ul we'ra ionu u'rupa iokithak
(Markkoc 5.1-20; Lukka 8.26-39)*

28 Anakka kwaan nocarkan corok c'rek opakot nocik coCethirin aul w'rek we'ra ionat u'rupa

iokithak ocurarat iaak awokat cik anthan nonupu na awokat aikikkoik. Wokat cik acomokko noul ana ilen akka pul pellanet ipakko ikathar ken. ²⁹ Aul wen i'rekat lon mpo're cittan itti, "Ukul woKapik, ngintha akka ngkwongothe nanin? Ngkwaat cene itti ngkwathokkiet nin thiak aca'ri cothakkmako carthuk aoi?"

³⁰ Ana iccik ken cınang cungkut conuththuruk cokat cik acu'ro. ³¹ Au'rupa iokithak ipittat oIeccuo itti, "Amma ngkwakiccet nin thapat akiccet nin icungkut conuththuruk."

³² AIeccuo i'rekat kin itti, "Noppot thapat." Au'rupa iokithak oppat thapat nti iul ie'ra ai'rikat icungkut conuththuruk acungkut conuththuruk occorat kiththik uo nokuthut korok ani'rikikkat ii'ri anikikkat ng'ri anillekat. ³³ Aul iokat cik au're nuththuruk ollat kiththik eo icarak coman, akin otherekanthet ul lon appik lonuththuruk ana ilokkattanthet ul ionat u'rupa iokithak. ³⁴ Aul oppat thapat nti icarak coman appik athocurarot iaIeccuo. Anakka ul wimmat oIeccuo akin i'rekathok itti, "Ngko, opa'roik noththok pin."

9

OIeccuo pittiet kimico (Markkoc 2.1-12; Lukka 5.17-26)

¹ AIeccuo arrat ikuppu'rung konoi'ri, akwarat tok cik akwakkakat noka'ran koKapprnaum ikokat ka'ran kung. ² Aul w'rek onakanthok pul pakimico na'rangkal. Manakka oIeccuo pimmat thocokot tholon loKapik nomikit then

akwi'rekat pul ipakimico itti, "Ukul, kirrnni opelle, lon ilokithak lang loccikakothē."

³ Ittina aul w'rek iangkene lon lothonce'ret lon cik erekat nomik̄it men itti, "Pul empi paik pacungko Kapik."

⁴ Aieccuo inakat lon ilakin thokat akin okwarttikot nomik̄it men akwi'rekat kin itti, "Nthontha akka annokwarttikot cik thokwarttikot cik ithokithak nomik̄it mon ittina?" ⁵ Liatha akkoporot itti li'retta, itti, 'Lon ilokithak lang loccikakothē' ana amma okorronno oka menik ai're itti, 'Uroki aeoi?' ⁶ Anaruk othakka itti anina itti ukul wopul iponyi wonu pu'ran nocapu itti waccik̄intheṯ ul lon ilokithak." Akwi'rekat pul ipakimico itti, "Uroki aneko a'rangkal aeo tuan."

⁷ Akimico urokat kapik apoingkat tuan.

⁸ Anakka cungkut coul cimmat lon elli, akin ipat n're ana okin thopirakantheṯ Kapik noka iketheṯ pul iponyi ngili ammakka engi.

*Thakkaro oMaththa
(Markkoc 2.13-17; Lukka 5.27-32)*

⁹ Anakka oieccuo pokat cik akweo oththe noka'ran ken, kwimmakathe pul ipoccot k'ran itti oMaththa apikkoik noka'ran koul ia'rntintheṯ nili akucci. Akwi'rekathok itti, "Omakothin," aMaththa urokat akwomakathok.

¹⁰ Anakka oieccuo pokat cik akwo'rkoik thoMaththan, aul woppot ia'rntintheṯ nili akucci ana ul w'rek wolon ilokithak akkakat akin o'rkkat cik akin oieccuo ana ul iammakothok.

¹¹ Anakka ul woPriccin wimmat lon elli, okin thipittathe ul iammakothok itti, "Pul ipangkene

pon pontha akka apo'rkoik okin oul ia'rntinthe nili akucci ana ul w'rek wolon ilokithak?"

¹² Anakka oIeccuo poccikothe lon elli akwi'rekat kin itti, "Okorronno oka ul ioporot akkongothe itti wittiettat anaruk ul iongo.

¹³ Anaruk ngkonon annothokwarttikot lon elli itti laik leret ngimpen, 'Mpongothe itti nthipo thiak ana mpakannangkot a'rupu wothokiot ngüccük cik.' Akka mpaakannao anathakkaro ul ioporot, anaruk ul wolon ilokithak."

*Thikkoik thoIeccuo ithie
(Markkoc 2.18-22; Lukka 5.33-39)*

¹⁴ Ittina aul woLuanna pomamuthie iammakothok akkakat akin ipittat oIeccuo itti, "Ngintha akka anin ana ul woPriccin oco'rine nothu'rit aul iammakothung okorronno oco'ronan?"

¹⁵ AIeccuo othiat tit itti, "Opurukon thopul ipipo thaka ithmeru taththa apul ipipo paik itho'rküt then? Ca'ri canthan ica pul ipipo onekitta nti itho'rküt then akin antoco'ro nothu'rit.

¹⁶ Pul pella pakkwo kret ikipe cit nthan ngkret ikie, akka kret ikokkuttat ncit than kapo ana kakkot cürük cittik. ¹⁷ Pul pella pipot thrupa ika'ruk ikipe. Amma kwipotherit ana thinya ana thillo ka'ruk akka kipe, ana thrupa thallot cik nti ika'ruk ana kakittako. Anaruk thrupa thonu itti thuntat ika'ruk ikie atho'rungkat cik ana ka'ruk ikie o'rungkot cik."

*Ukul iopari iiot ana pul ipopari ipongo
(Markkoc 5.21-43; Lukka 8.40-56)*

¹⁸ Anakka kwokat cik akwere lon elli aili w'rek akkakat wonocuththun ca'rama aekat ungku ncik tokit kung ai'rekat itti, "Ukul win iopari wiot inaina. Anaruk a'rik athonekket ukun nan ana wakkoik." ¹⁹ Aieccuo urokat akin oingkat akin aththe'ra ana ul iammakothok womakathok.

²⁰ Ana ncinang, pul p'rek ipopari pokat cik ponu luput attul ana ikken ke'ra (12) aüccük ollo nti iaak apakkakat nthoccul koIeccuo apothntat thon thokret kung. ²¹ Akka kwapperethe nocikit cung itti, "Amma mpothntot kret kung tulluk ana mpittat."

²² Aieccuo olliakat akwimmakathok akwi'rekathok itti, "Ukul win, kirrnni opelle thocokot tholon loKapik nocikit thang thithiethung." Pul ipopari pittakathe nci noca'ri cen.

²³ Anakka oIeccuo pi'rikot noppa toili akwimmakat ul aee u'rumpillang tounge ana ul wokat cik aoo ana okkot camutta,* ²⁴ akwi'rekat kin itti, "Nopa'roik, ukul wakinnio, anaruk wakko inthe." Anaruk okin thoccirathok ngngin.

²⁵ Anakka ul wopa'rettat cik akwi'rikat noppa akwonthat ukul ncik nukun ana wurokathok kapik. ²⁶ Alon len opettakat cik na'ran wen appik.

Oieccuo pittiet ul i'rimathe

²⁷ Anakka oIeccuo poththet noka'ran engk're, aul w'rek we'ra wi'rimathe omakathok aikkat cik akkakarok itti, "Ukul woThauth, ipi thiak thin."

* **9:23** 9.23 Thee u'rumpillang tounge thokat thathuma thoul woIouth.

28 Anakka oIeccuo pi'rikot noppan aul i'rimathe othakkarat iccik kung akwipittat kin itti, "Onon thoccokothe lon nomikit mon itti mpina ittiet noni?"

Akin othiat tit itti, "Ii, Ili."

29 Ittina akwothntat kit ken akwi'rekat itti, "Alokkattanthe non ammakka nthoccokothe lon nomikit mon itti laka." 30 Akit ken anyat aIeccuo i'rekat kin lon lonthomat itti, "Nocckot lon elli, apul ella ina nolon elli." 31 Anaruk okin thoi ngkathe akin opettat lon cik na'ran wen appik.

OIeccuo pittiet pul ipomma ere

32 Anakka ul ittietathe wok at cik aeo, p'rin, aul w'rek onakanthe oIeccuo pul p'rek pau'rupa iokithak wo'rot nan ana pommat ere. 33 Anakka u'rupa iokithak wokiccettat, pul pen pikkatheik apere ana ul wopr takatherit nolon len akin i'rekat itti, "Onin thakinnimmat lon ammakka elli noththok poIccereil ca'ri c'rek."

34 Anaruk ul woPriccin wi'rekath e itti, "OIeccuo pakicce u'rupa iokithak mpu'ran poili wou'rupa iokithak."

Ul iarekine Kapik wotte

35 OIeccuo pokkettekath e na'ran appik akwongkene nomuththun ma'rama ana ere lon iloporot longili ngoKapik ana ittiet ul nomio imokat kurekkurek appik. 36 Anakka kwimmat cungkut coul, kwipathe thiak then akka okin thokat nothiak ana nthokinyat, okin thokat ere lungkat ilellat opit nan. 37 Ittina akwi'rekat ul iammakothok itti, "Kopon kokwonot mil moppot

anaruk ul iakio wotte. ³⁸ Ittina na'rane Ili nga'rama ook iponu kopon ikakecca akwothiöt ul ikkwon kung athokio.”

10

*Ul wothothilettat iattul ana ikken ke'ra
(Markkoc 3.13-19; Lukka 6.12-16)*

¹ Oieccuo pakkarathe ul wung iammakothok iattul ana ikken ke'ra (12) ana kwekathekin pu'ran akin okicce u'rupa iokithak ngngin ana ittiet ul iongo mmio kurekkurek.

² 'Ran enni woul wung wothothilettat iattul ana ikken ke'ra, k'ran kopul porokit itti, oCca-
maan (ipoccot k'ran itti oPoththuruc) ana opang
Anthrauc, ana oIakup ukul woCepethi ana opang
oIuanna, ³ ana oPilippic ana oPerththolomauc
ana oThthoma ana oMaththa ipa'rintinhet nili
akucci ana oIakup ukul wAlappaoc ana oTh-
thothaoc ⁴ ana oCcaamaan ipokat pongothe lon
lothok pung poIccereil ana oIoutha Icikkari-
uththi ipokerothe oIeccuo nili.

⁵ Anakka oIeccuo pokat cik akwothiöt kin
ithattul ana ikken ke'ra kwi'rekathe itti, “Noko-
rronno eo noththok poul iakannoka woIouth
ana nokorronno i'riko na'ran w'rek woul woC-
camirin. ⁶ Anaruk ngonoine ul woIccereil akka
waik ere lungkat ilurttatheik. ⁷ Ana amma
anneo annerene ul lon elli itti, 'Ngili ngorothi'rot
ngakko napuththut.' ⁸ Nittiet ul iongo ana
urokie ul illet ana ittiet ul ionat inyï noka ana
okicce u'rupa iokithak nnoul. Onon thoccot
pu'ran pothittiet ul nuthuk ana nthittiet kin

nuthuk. ⁹ Nokorronno oneko thaap ana manna mallong imallio ana manna akucci woththeik ika'ruk amma anneo. ¹⁰ Nokorronno oneko a'ruk wokurtti nokurtti kon ana manna kret arttot ana wok ana urrong, akka pul ipareko ponu itti pacco a'rupu ia kwongothe.

¹¹ Ana noka'ran na anon thi'rikot nokwantot pul ipoporot annikkoik noppa thanung puc-cuk annothekat noka'ran ken. ¹² Ana amma anni'riko noppa topul p'rek, nomicco ul noppa ten. ¹³ Ana amma ul woruan wikkiet non cik, athomicco thon oka nakin, ana amma ul wonoppa ten wakinnikkienon cik athomicco thon opakkinthet non. ¹⁴ Amma pul pella ipikkienon cik ana occikot lon lon, nokkwe ku'rupang noracok amma annoththe noka'ran ana nokaman ken, annokene itti onon th'rat kin. ¹⁵ Mpi'ret non lon ilaik icat itti, thakkmako thopothok poCcothum ana poKamura thaka thopappat noca'ri cothakkmako nothakkmako thopothok ip'rat ikkienon cik.”

*Thoccokiettat thiak ithaik thanthan
(Markkoc 13.9-13; Lukka 21.12-17)*

¹⁶ “Nantoccikot, mpaik pathiot non ere lungkat itho'rkit thomipa. Ittina no'rumoik ana oka thella lon ilokithak.

¹⁷ No'rumoik noul, okin thicket non nili ikkun ana onekot non imakkma ana okkwet non tokit koul woIouth nomuththun ma'rama men. ¹⁸ Ana nti ilon lin onon thanekittat tokit konili inarran ana inittinittik annokane nili ana ul iakannoka woIouth lon ilimmakot ngkit. ¹⁹ Anaruk amma

okin occiccokot non, nokorronno ipo n're itti onon thathi're ngimpen ana manna itti onon thi're lon len tat. Ca'ri cen onon thethettat lon ilanon i're, ²⁰ akka onon akkakannoka thaik there, anaruk Kanang koththe akkaik kere nti ianon.

²¹ Ukul wakero opang akwokkuttat ana othan pokkul okero ukul wung akkuttat. Nyukul nyaprttakot iaththangon akin okorronnokin akin ongutta. ²² Ul appik w'ranon nti ilon lin, anaruk okkwi ipoccoke the cikit ilon puccuk mono alocothakat kwa'rettat. ²³ Amma okin thoccokithenon thiak noka'ran k'rek, nollot noka'ran k'rek. Mpi'ret non lon icat itti ukul wopul iponyi wakkarttako anon tharthuk omartto ngre na'ran ncik wonoththok poIccereil.

²⁴ Pul ipangkenetta pakannoka priik nakkwi ipangkenek ana pul ipareko pakannoka priik nakkwi iporekierok. ²⁵ Lekko itti pul ipangkenetta paka karkko pul ipangkenek ana okkwi ipareko oka karkko okkwi iporekierok. Ana amma pul ipriik poruan pakkarakat itti Pelecepul ilonu ili wou'rupa iokithak, ul iakin thaik tuan wakkarako taththa?"

*Opellenet Kapik ana okonnoka ul
(Lukka 12.2-7)*

²⁶ "Nokorronno ipo n're nen. Lon appik ilocukkwakot nan linako nan ana ilamu'ruttakat littako ncik. ²⁷ Lon ila anerenthet non i'rimak nere attattar ana ilerettanthe non thounu nokkwint het kuri no'ret. ²⁸ Nokorronno ipo n're nokkwion ithakkwot ka, anaruk okin thakanokkwot utha. Anaruk nipo n're nokkwi ipakkwot utha ana ka ciththothirin. ²⁹ Nya'rkang

nye'ra nyaketta ngkakucci kulukku anaruk ngella ngulukku ngapot cik nocapu aththe pon porothi'rot pella kit ken. ³⁰ Ana manna wan won wono'ra wongantettat appik. ³¹ Ittina nokorronno ipo n're akka onon akkoporot kannan nonya'rkang nyoppot.

³² Okkwi ipi're tokit koul itti kwinan, mpi'ret tokit kongappa ipaik tothi'rot itti mpinak. ³³ Ana okkwi ipo'ruminthin kit tokit koul, mpa'ruminthok kit cakuruk tokit kongappa ipaik tothi'rot.

³⁴ Nokorronno ome itti mpaat itti anona thikkoik thoporot nocapu. Mpakannanthan itti mpana thikkoik thoporot nocapu anaruk thothatto. ³⁵ Mpaat itti anathopetto 'ikkul okin oththan.

ana ikkul iopari okin onnan
ana ikkul iopari okin opithe ipopari.

³⁶ Ana ul woruan thanung waka tho'rak thung.'

³⁷ Okkwi ipongothe oththan naun kannan ana manna onnan kwakannekkonnan itti kwaka pin, ana okkwi ipongothe ukul wung iocura ana manna iopari naun kannan kwakannoka pin.

³⁸ Okkwi ipakannangkot itti kwaccokot thiak ana io nti ilon lin kwakannekkonnan itti kwaka pul pin. ³⁹ Okkwi ipo'rumot nothikkoik thung kuret cik ana okkwi ipurethe thikkoik thung cik nti ilon lin ca'rumakinok nan.

⁴⁰ Okkwi ipikkiet non cik kwikkierin cik ana okkwi ipikkierin cik kwikkie okkwi ipothiothin cik. ⁴¹ Okkwi ipikkiet pul pothernte lon loKapik

cik akka pernte lon loKapik, kwakketta llon iloporot lopul pothernte lon loKapik, okkwi ipikkiet pul cik ipoporot akka poporot kwakketta llon iloporot lopul ipoporot. ⁴² Ana okkwi ipethet okkwi ipotte keththe'ret koi'ri akka ook nti iul iammakothin mpi'ret non itti thokketta thung thakannurat cik.”

11

Oieccuo ana oIuanna pomamuthie

(Lukka 7.18-35)

¹ Anakka oieccuo pomarttot erene ul iammakothok iattul ana ikken ke'ra, kwoththekathe noka'ran ken akwothongkene ana ere lon loKapik na'ran woCelil.

² Anakka oIuanna pomamuthie poccikothie nti ikorrkkor lon ila aMiccie pokat akwokkot, kwothiathe ul iammakothok ³ athipittothok itti, “Oung oMiccie ipa oIuanna pi'ret ngngin itti kwaik panthani ana manna itti onin tha'rikot opilin p'rek?”

⁴ Oieccuo pothiatherit itti, “Ngonopakkot anothi'ret oIuanna lon ilanon thimmat ana ilanon thoccikothie. ⁵ Okin ithi'rimathe thimmat cik, okin ithaimico thaik thanyaro, okin ithonat inyi noka thothakkat thoporot, okin ithokat thanuril thaik thaccikot cik, okin ithillet thurokiettat, ana lon iloporot loIeccuo lerettanet ul iella a'rupu cik. ⁶ Thethieko thaka noul iakannopa'rine lon lin cik.”

⁷ Anakka ul woIuanna pomamuthie iammakothok wokat cik aeo, oieccuo pikkatheik

akwerene ul lon loLuanna akwi're itti, "Kathakka onon thoinet oLuanna ithampang ithonthomara, ngintha akka onon thoinet itti onon thathokatha? Pul ipaprto lon cik ere taco torithampang ithonthomat irukwit tukwit ira kanang kaik kau'rei? ⁸ Ngintha akka onon thoinet itti onon thathokatha? Pul pakot eret wopeththerei? Okorronno oka menik, okkwion ithako eret wopeththere thaik tuan tonili. ⁹ Ittina ngintha akka onon thoinet itti nthathokatha? Pul pothernte lon loKapiki? Mpi'ret non itti ii onon thimmat pul pothernte lon loKapik anaruk mpi'ret non onon thimmat lon lrik nopul ipernte lon loKapik. ¹⁰ Akka elli lokurrakot iatham leret oLuanna itti,

'Mpathiot pul pothothilettat pin tokit kang,
okkwi ipathokuccenthung kathar cik.'

¹¹ Mpi'ret non lon ilaik icat itti, nti iul enni appik iokwontat nti iul iari, pul pella kirrkkir priik naLuanna pomamuthie anaruk okkwi ipellakot lon len ingili ngorothis'rot priik naak. ¹² Nci noma'ri ima aLuanna pomamuthie pokat akwernte lon loKapik manna inenni ngili ngorothis'rot ngokat akkiettat thiak ana ul wokot annেকে itti waneko ngili ngorothis'rot mpu'ran. ¹³ Akka ul wothernte lon loKapik appik ana lon lothonce'ret lon cik loMucca lertethe lon longili ngorothis'rot mono aLuanna akkakat. ¹⁴ Ana amma onon akkangothe itti onon thangkot lon len, oLuanna pomamuthie ook ollia iperettathe itti kwaik panthan. ¹⁵ Okkwi iponu unu itti

kwaccikot, akwoccikot.

¹⁶ Mpungkie ul enni ngngintha? Okin thikkoik ere nyukul nyaik nyikkoik keccuk anyakkakkararo,

¹⁷ 'Onin thongwinet non unye woremekkin ana onon th'rat ukko, onin theet ngeme

ana onon th'rat oo.'

¹⁸ Ana oluanna paat akwokorronno o'rkoik ana ikko ngapak ana okin thi'ret itti, 'Kwону u'rupa iokithak.' ¹⁹ Oun ukul wopul iponyi mpaat ano'rkoik ana anikko ngapak ana okin thi'ret itti, 'Nantokatha pul empi akka ponu kinyit kothu'rit ana pongothe ngapak ana opuruko poul ia'rntintheet nili akucci noul ana opuruko poul wolon ilokithak.' Anaruk thinaik nti ica thinako nngre."

Angkre, a'ran woul iakannopa'rine lon ilokithak cik

(Lukka 10.13-15)

²⁰ Aieccuo ikkat cik akwothirriet ul cik na'ran na kwokkothe lon ilommaththik loppot akka okin thakannopa'rine lon cik ilakin thokat akin okkettet ilokithak. ²¹ Akwi'rekat itti, "Angkre, ul woKuruccin ana ul woPeththcceitha akka onon thaccokot thiak amma lon ilommaththik ilokkattathe ianon lalokkattathe noka'ran koC-cur ana koCcithon, ul wona'ran wen waapa'rinet lon cik ilokithak akkoma'rot okin thako a'rupu iakene itti okin thaik ithmeru ana ipot mucuk ima. ²² Anaruk mpi'ret non itti Kapik kathipo thiak thoul wonoka'ran koCcur ana koCcithon

noca'ri cothakkmako nanon. ²³ Ana onon, ul wonoka'ran koKapprnaum, onon thame itti onon thanekittat tothi'rori? Okorronno oka menik, onon tharpo thothirin. Amma lon ilomaththik ilokkattathe ianon lokat lokkattathe noka'ran koCcothum, laa'rungkotheik manna noca'ri enci. ²⁴ Anaruk mpi'ret non itti laka loporot kannan noka'ran koCcothum nanon noca'ri cothakkmako.”

Nainin annongoko
(Lukka 10.21-22)

²⁵ Noca'ri cen aleccuo i'rekat itti, “Mpapirangung noka, ngappa, Ili worothi'rot ana wonocapu, akka ngkwamu'ruttothe ul inaik nti ima ana inaik kicce lon elli ana ngkwittinet ul iommaik. ²⁶ İcat, ngappa, elli akka ngkwongothe itti laka.

²⁷ Ongappa pin pethin a'rupu appik. Pul pella pina ukul, ongappa pulluk akkinak. Ana pul pella pina oththan ukul wuluk akkina oththan ana okkwion itha ukul wongothe itti kwakenekin oththan.

²⁸ Nainin appik, onon itha lon lalkothe ana ithokinyat ana mpangokienon. ²⁹ Nockikothin annina lon naun, akka mporot ana mporot cikit ana onon thangoko. ³⁰ Akka thuppi thin thopappat ana kathar kin koporot.”

12

Oleccuo palli woca'ri caCcepith
(Markkoc 2.23-28; 3.1-6; Lukka 6.1-11)

¹ Ana ca'ri cen aIeccuo oppat ikkwon komil noca'ri caCcepith. Aul iammakothok wikkatheik acottot mil nti ikkwon a'rko akka okin thokat thiamat. ² Anakka ul woPriccin wimmat lon elli, amekathok itti, "Antokatha, ul iammakothung waik wakkot lon ilonu itti lakannokkattat noca'ri caCcepith."

³ Aieccuo othiat tit itti, "Onon thakan-nakkakkaro lon iatham ila aThauth ana ul wung thokkothe akka okin thokat thiamari?"

⁴ Kwi'rikot noppa toKapik, okin oul wung akin o'rkkat arrakith iothun iettathe Kapik iokat itti ul wulluk wonoppa toKapik akka'rko. ⁵ Onon thannakkakkaro lon lothonce'ret lon cik iatham loMucca ili're itti ul wonoppa toKapik wareko noca'ri caCcepith ana lon len lakorronnoka lam-olokoi? ⁶ Mpi'ret non itti opilin paik cene priik nnonoppa toKapik. ⁷ Atham wi're itti, 'Mpongothe itti onon thana thiak, mpakan-nangkot a'rupu wothokiot ngüccük cik won.' Ana amma onon akkokat thinat lon len, onon thakannakkmat ul iammakothin iella lon cik ila moloko. ⁸ Akka ukul wopul iponyi Ili woca'ri caCcepith."

⁹ Aieccuo oththekat noka'ran ken akwo-inkat nocuththun ca'rama cen, ¹⁰ ana pul pokat cik than ponat ukun wai'rilla. Ul woPriccin wikkatheik akin okwancot lon ilakin orukwet oleccuo ngngin, akin ipittathok itti, "Loco'rotheik itti thittiettat thaka noca'ri caCcepithi?"

¹¹ Aieccuo i'rekat kin itti, "Amma opilin nti ianon ponu thungkat ana thapothe irok noca'ri

caCcepith kwakanneo itti kwaccokot akwonhot thapat nti iroki? ¹² Pul iponyi akkoporot kannan nothungkat. Ittina loco'rotheik itti lon iloporot lakkattat noca'ri caCcepith.”

¹³ Ittina kwi'rekathe pul pen itti, “Othie ukun ntiti.” Akwothiekat ukun ntiti athakkakat woporot ammakka a'rek iokat woporot. ¹⁴ Anaruk ul woPriccin woingkathe athikkat cik nocuththun akin i'rikat lon itti okin thakkwot oleccuo tat.

Pul iponekkettatheik iparekine Kapik

¹⁵ Anakka oleccuo pinat nolon len, akwoththekat noka'ran ken. Ul womakathok woppot, ana kwittiekathekin appik ithongat, ¹⁶ akwi'rekat kin lon lonthoththomat itti okin thakannongano itti ook okkwen. ¹⁷ Elli lokkattathe othakka itti alomartto lon ila pul pothernte lon loKapik oIccaia pi'ret itti,

¹⁸ “Pul iparekinin empi ipa mpakkarot, okkwi ipa mpongothe, ana ipa mpopirat noka nan.

Mpethok Kanang kin,
ana kwerene ul appik lon iloco'rotheik.

¹⁹ Kwakannokkot po're ikathar ana a'retto noul w'rek.

Kwannere mpo're cittan ikathar.

²⁰ Kwannie pul ka kongo ipella pu'ran cik ere kupir ikapot nocu,

ana kwakannie ul ka kongo ella pu'ran ere thik amma athio ithacco ncu'ru, puccuk alon lung iloco'rotheik alkat ilakan-noco'rot cik.

21 Ngk'ran kung ul appik wana tho'rikot cik iaak."

Oieccuo ana Pelecepul

(Markkoc 3.20-30; Lukka 11.14-23)

22 Ittina akin onakanthok pul ponat u'rupa iokithak ana pokat pi'rimathe cakuruk ana pommat ere ana oIeccuo pittiekathok, othakka itti apere ana immaik. 23 Ul woprttakatherit appik ana wi'rekathe itti, "Ukul enni waka woThauthi?"

24 Anaruk akka ul woPriccin woccikothe lon elli, ai'rekat itti, "Kwakicce u'rupa iokithak akka Pelecepul ili wou'rupa iokithak wethok pu'ran."

25 OIeccuo pinakathe lon ilokat ima men ana kwi'rekathekin itti, "Amma ngili ngillillakot tit kurekkurek ngintat cik, ana amma ka'ran ana manna ul woruan willillakot tit kurekkurek, wakanno'rungskot cik tothun. 26 Amma pul pothopulut pakicce pul pothopulut, poprttakothe ika kung. Ittina ngili ngung nga'rungskot cik taththa? 27 Ana amma mpakicce u'rupa iokithak mpu'ran poPelecepul, ul won wakicce u'rupa iokithak mpu'ran poththa? Ittina ul iammakot non waka ul iakkma non. 28 Anaruk amma mpakicce u'rupa iokithak mpu'ran poKanang koKapik, ittina ngili ngoKapik ngaik ianon.

29 Pul pella pi'riko noppa topul iponthomat mparran akwonekothok a'rupu pung, kwonu itti kwaccokot pul pen kappak akwi'rikikkok kicce akwanti'riko noppa akwoneko a'rupu wung.

³⁰ Okkwi ipakannoka inaththe'ra kwakan-nongkat lon lin ana okkwi ipakinnittarothin ire kwaik pakitto ngre ngin. ³¹ Ana ittina mpi'ret non itti lon ilokithak loul ana thocungkwo ul laccikakot ncik appik anaruk pul ipa-cungkwo Kanang koKapik pakannoccikakinthet lon. ³² Okkwi ipere lon lokithak nokkul wopul iponyi, kwikko paccikakinthet lon ilokithak, anaruk okkwi ipere lon lokithak noKanang ikupupure, kwakorronno occikakinthet lon ilokithak, noluput elli ana manna noluput ilan-than.

³³ Amma pira poporot ana pakwono nyukul nyoporot, ana amma pira pokithak ana pakwono nyukul nyokithak. Pira pinako nynyukul nyen inya pokwonot. ³⁴ Ul ionu karra iurttet pangken cik, onon there lon loporot taththa anon thokithak? Akka thon there lon nnolon iloppathe nocikit. ³⁵ Pul ipoporot pere lon iloporot nolon iloporot ila'rntakotho iaak, ana pul ipokithak pere lon ilokithak nolon ilokithak ila'rntakotho iaak. ³⁶ Anaruk mpi'ret non itti noca'ri cothakkmako ul wakkmakot nolon len ilella lon cik ilakin theret. ³⁷ Akka llon lang ilere ngkwakorronno akkmako ana llon lang ngkwakkmako."

*Ul woPriccin wipitto lon ilommaththik
(Markkoc 8.11-12; Lukka 11.29-32)*

³⁸ Ittina aul w'rek woPriccin ana ul iangkene lon lothonce'ret lon cik i'rekat oleccuo itti, "Pul ipangkene, onin thongothe itti ngkwakkinthet nin lon ilommaththik anin ina itti ngkwaat nnoKapik."

³⁹ Akwothiät tit itti, “Onon ul iannocokot lon loKapik ana nthaul iokithak thipitto lon ilom-maththik, lon ilommaththik lella ilakkattanthe non anaruk lulluk ilokkattanthe pul pothernte lon loKapik oIunan akkettat non. ⁴⁰ Ana am-makka oIunan pikkot cik icarak copape iprik mingki m'rapuruk ana ngko'ra ng'rapuruk, it-tina ukul wopul iponyi wikkoik ippu mingki m'rapuruk ana ngko'ra ng'rapuruk. ⁴¹ Noca'ri ica Kapik athakkma nan, ul wonoka'ran koNinua wa'retto ianon akka okin thopa'rinet lon cik ilokithak noca'ri ica aIunan perenet kin lon loKapik, ana mpi'ret non itti opilin paik cene prik naIunan. ⁴² Noca'ri cothakkmako Ili iopari wonoththok poCipa wa'retto ianon ana wakkma non akka waat nciththan othakka itti athocikot lon lothinaik nti ica loCiliman ana inenni opilin paik cene prik naCiliman.

⁴³ Amma u'rupa iokithak woppothe thapat nti ipul, wanyarot cik ithampang ithonthomat akwantot ka'ran na ikkoik ana wakinniot. ⁴⁴ Ana wi're itti, 'Mpapakkot ikaman ika mpoththet nan.' Ana amma waat, wathiot man mella pul tit ana mollakot kicce ana mothettakotheik kicce. ⁴⁵ Waeo ana wathona u'rupa w'rek we're'rapuruk iokithak kannan ai'rikat ipul aikkat cik iaak. Ana thikkoik thopul emprük thaka thokithak kannan noca'ri conomun. Elli akkaka noul enni iokithak.”

*Onnan poleccuo ana opangon
(Markkoc 3.31-35; Lukka 8.19-21)*

⁴⁶ Anakka oleccuo pokat cik akwerene ul, onnan ana opangon thoco'rathe thapat akin thongothe itti okin therenok. ⁴⁷ Apilin omekat oleccuo itti, "Onne ana opangkangon thaik thaco'ro thapat ana okin thongothe itti okin therenung."

⁴⁸ Kwothianthok tit itti, "Oiaia oththa, ana opangkington oththan?" ⁴⁹ Akwothiekat caun noul iammakothok akwi'rekat itti, "Oiaia empi ana opangkington enthi. ⁵⁰ Akka okkwi ipakkot lon ila ongappa pongothe tothi'rot ook opangkin ipopari ana ipocura ana oiaia."

13

Thokkwie lon kuru ncik thopul ipee mīl
(*Markkoc 4.1-9; Lukka 8.4-8*)

¹ Noca'ri cen oleccuo poingkathe ntuan akwothikkat cik nokuthut korue irapangka toCelil akwongkene. ² Acungkut coul oppakat iccik kung akwarrat ikuppu'rung konoi'ri akwikkat cik, ana ul wokat cik aco'ro nokuthut korue irapangka appik. ³ Ana kwerekanteth kin lon loppot nthokkwie lon kuru ncik akwi'ret kin itti, "Pul pokkwon peot itti pathee mīl. ⁴ Anakka kwokat cik akwee mīl, am'rek apukkat ikathar au'rupe akkakat acumat ncik appik. ⁵ Am'rek apukkat nocapu iconat k'rimi ikonat nūnthū notte no'ra wen ana mummathe cokcokkot akka mokat no'rpu. ⁶ Anaruk akka cīngkī cuat, cok'rekathe ana millekathe akka mellat laka ippu. ⁷ Amīl m'rek apukkat itho'rkīt tholī ana lī locokkakathe alonentekat cik amillekat. ⁸ Anaruk am'rek apukkat nocapu icoporot, na mokwonathe mīl mipiet kicce, am'rek ipiekat

kit ken arrial ukuluk (100) ana am'rek arrial w'rapuruk (60) ana am'rek arrial ana alkaire (30) nomil imokat merat. ⁹ Okkwi iponu unu itti kwaccikot akwocikot."

Lon ila oIeccuo perenet nthokkwie lon kuru ncik

(Markkoc 4.10-12; Lukka 8.9-10)

¹⁰ Ul wung iammakothok wakkakanthok ana wipittathok itti, "Ngkwerene ul nthokkwie lon kuru ncik akaintha?"

¹¹ Ana kwothianthet kin tit itti, "Lon lothina ngili ngorothi'rot ilamu'ruttakot ncik lettathenon ana lakannettat kin. ¹² Ana okkwion ithaccikot lon lin, okin tharttakinthet nan, okin thina lon loppot. Anaruk okkwion ithaik thakannocikot lon lin, thanekittat thinaik ithakin thonu thotte. ¹³ Ilen akka anerenekin nthokkwie lon kuru ncik amma anerenekin akka okin thakathacceik akin ikkoik ere okin thakinnimmaik ana akin occikot lon akin ikkoik ere okin thakannocikot lon l'rek ana ina lon len.

¹⁴ Lon ila pul pothernte lon loKapik ipoc-cot k'ran itti oIccaia perethe ul ngngin ma'rot lokakathe nakin icat ila kwi'ret itti, 'Onon thaccikot cik anaruk onon thakinninaik, onon thakathacceik anaruk onon thakinnimmaik.

¹⁵ Akka mikit moul enni monthomat ana unu wen wakannocikot cik ana okin tho'rumothe kit.

Akka amma okonnoka ittina okin thaimmat cik ngkit ken

ana occikot cik nunu wen
ana inaik nti ima men

ana oprttakoik ana mpathikkiekin thoporot.'

16 Anaruk kit kon kethiëttat akka kakathacce cik, ana unu won wethiëttat akka waccikot cik. 17 Akka mpi'ret non lon ilaik icat itti, ul woppot wothernte lon loKapik woma'rot ana ul ioporot tokit koKapik wokot akwantot kathar ikakin imma lon nngin ila non thaik thakathacce inenni anaruk okin thakinniot, ana othakka itti akin occikot lon ilanon thaik thaccikot inenni, anaruk okin thakannoccikot.”

Oieccuo pakene lon lothokkwie lon kuru thopul ipee

(Markkoc 4.13-20; Lukka 8.11-15)

18 Ana kwikkatheik akwere itti, “Noccikot lon lothokkwie lon kuru ncik lopul ipet mil lonu lon len itti tat. 19 Amma pul p'rek poccikothe lon longili ngorothi'rot ana kwakinnina kicce, pul pothopulut panthan ana panekothok lon ilokat li'rikot nocikit cung. Lon elli locil icapothe ikathar. 20 Lon locil icapothe nok'rimi lonu itti pul ipaccikot lon loKapik accokkot akwopirakat noka noca'ri cen. 21 Anaruk akka lon len lakinni'riko ci nocikit, lintat cik noma'ri motte. Amma lon l'rek lainok ilokithak ana thokkietat thiak nti ithoccikot lon loKapik, kwapa'rine lon len cik accokkot. 22 Lon locil icapothe itho'rküt tholi lungkwietat mpul ipaccikot lon anaruk thirro cikit nti icarak tholon lothikkoik ana thammikkot thotha'rathan thakorronno lon lung ili'rikot nocikit alella ngre cik. 23 Anaruk lon locil icapothe nocapu icoporot lungkwietat mpul ipaccikot lon ana ina kicce. Kwarttot nolon ila kwoccikothe arrial ukuluk (100) ana arrial w'rapuruk (60) ana arrial ana alkaire (30).”

Thokkwie lon kuru ncik thorakkaa

²⁴ OIeccuo pappererekanthet kin lon lothokkwie lon kuru ncik l'rek akwi'rekat kin itti, "Ngili ngorothis'rot ngungkot pul ipeet mil imoporot ikkwon kung. ²⁵ Anaruk akka ul wonokworok wokat inthe ngko'ra, apul ip'rat pul pokkwon akkakat apeekanthok takkaa ikkwon na mil meerat apoingkat. ²⁶ Anakka mil mummothe amoingkat ikwonco amokkwat ntit, arakkaa ummat ncik arokkwat ntit cakuruk.

²⁷ Aul iareko ikkwon akkakanthet pul pokkwon ai'rekathok itti, 'Pit pin, ikkre ngkwakannee mil imoporot ikkwon kang akka takkaa akkummothe ikkwon.'

²⁸ Akwothiat tit itti, 'Pul ip'rat lon lin akkokkinthin lon len.'

Aul iareko appipittathok itti, 'Ngkwongothe itti onin thaeo anin othithot takkaa cik appiki?'

²⁹ Akwothiat tit itti, 'Nokorronno akka amma anon itho takkaa ana onon thithot mil cik ngngin. ³⁰ Nokorronno arocokka mmil appik aca'ri cothokio akkakat. Noca'ri cen mpi'ret ul iakio itti, cittokit nokkuttot takkaa anni'rikikko mu'rukul mu'rukul arothok'retta, ana anna'rntot mil annona itharak thin thomil.' "

*Thokkwie lon kuru ncik thocore icoththe
(Markkoc 4.30-32; Lukka 13.18-19)*

³¹ Akwapperekanthet kin lon lothokkwie lon kuru ncik l'rek itti, "Ngili ngorothis'rot ngungkot core icoththe kannan iceera nocapu. ³² Antoka manna itti core icoththe nonyukul nyokira appik, anaruk amma wummothe wathakka pira pittik,

ana u'rupe manna wanthan athuno nune nan ana ikkoik nou'ri wen."

Thokkwie lon kuru ncik thomü'rükül
(Lukka 13.20-21)

³³ Ana kwappi'rekat kin lon lothokkwie lon kuru ncik l'rek icci itti, "Ngili ngorothis'rot ngungkot mü'rükül motteik ima pul ipopari porrethe im're moppot amma akwokkot arrakith anakka mikkot cik aminyakat amothakkakat moppot kannan."

³⁴ Oieccuo perenet cungkut coul lon elli appik nthokkwie lon kuru ncik, kwakanni'ret kin lon l'rek ella thokkwie lon kuru ncik. ³⁵ Ittina lon lokakathe icat ila pul pothernte lon loKapik pi'ret itti,

"Mpere lon lin nthokkwie lon kuru ncik, mpakene a'rupu iorukot ncik nciki amakka capu coku'rettat ncik."

Thokene lon lothokkwie lon kuru ncik lorakkaa

³⁶ Oieccuo poththekathe noul ana kwoingkathe tuan. Ul iammakothok wakkakanthok ai'rekathok itti, "Okenenin lon lothokkwie lon kuru ncik lorakkaa ikkwon."

³⁷ Kwothiatherit itti, "Okkwi ipeet mil imoporot ook ukul wopul iponyi. ³⁸ Kopon konu lon itti capu ncik appik ana lon itti mil imoporot lonu itti nyukul nyongili ngorothis'rot. Takkaa tonu lon itti nyukul nyopul pothopulut, ³⁹ ana pul ip'rat lon lopul pokkwon, ook pul pothopulut ana ook ipeet takkaa. Thokio mil thouu itti ca'ri ica luput ocothakot nan, ana lon itti ul iathokio lonu itti u'rupa wothoniletat woKapik.

⁴⁰ Ana thitho takkaa ana ok're, laka ittina amma aKapik athakkma ul amma luput lo-cothakothe. ⁴¹ Ukul wopul iponyi wathiot u'rupa wung wothonilettat, athocumo okkwion ithakkiet ul lon ilokithak ana okkwion ithakkot lon ilokithak appik nti ingili ngorothis'rot. ⁴² Okin tharret kin ic'rot ithik thothothirin, nakin oot ana ok'rellot kinyit thocipit ngngeme. ⁴³ Ittina ul ioporot tokit koKapik wallio ere cothot ingili ngoththan pen. Okkwi iponu unu itti kwaccikot, akwoccikot."

Thokkwie lon kuru ncik thotha'rathan

⁴⁴ "Ngili ngorothis'rot ngungkot tha'rathan thamuruttakat ikkwon. Anakka pul ipareko ikkwon kopul p'rek piothe tha'rthan then ikkwon apappamu'ruttat. Ana akka pokat popirat noka paththokettekat a'rupu appik akwothokero kopon ken.

⁴⁵ Attang, ngili ngorothis'rot ngungkot pul ipakette a'rupu paik pakwantot muccu mori'ri imallio. ⁴⁶ Amma kwiothe culukku iconu cekerek crik kwaeo ana kwothokette a'rupu appik ia kwonu akwathokero cuccu cen cori'ri icallio."

Thokkwie lon kuru ncik tholo'rak lape

⁴⁷ "Ana cakuruk, ngili ngorothis'rot ngungkot lo'rak lape ilorrettathe irue irapangka ai'riththa ape ncik kurekkurek appik. ⁴⁸ Anakka ape wi'riththat woppot, aul wolo'rak othat lo'rak nocarkan. Akin ikkat cik akin ocumo ape ioporot akin ipot inyalunthung akin orre iokithak. ⁴⁹ Laka ittina noca'ri ica luput ocothakot nan nocapu ncik appik. U'rupa wothonilettat woKapik wanthan ana wathopetto iul iokithak

nti iul ioporot tokit koKapik ⁵⁰ arret ic'rot cothik thothothirin na akin oot ana ok'rellot kinyit thocipit."

⁵¹ Aleccuo ipittat kin itti, "Onon thina lon elli appiki?"

Akin othiat tit itti, "Ii."

⁵² Kwi'rekathekin itti, "Pul ipangkene lon lothonce'ret lon cik ipongkenettat lon longili ngorothis'rot paik ere pul pokaman ipana tha'rathan thung thapat ithie ana ithipe ithokat tha'rantakothe athothongkenetta opilingon."

*Ul woNaccir w'rat oIeccuo
(Markkoc 6.1-6; Lukka 4.16-30)*

⁵³ Anakka oIeccuo pomarttot lon lothokkwie lon kuru ncik len, kwoththekathe noka'ran ken. ⁵⁴ Anakka kwokat cik akweo noka'ran koNaccir na kupokkothe, kwikkatheik akwap-pongkene ul nocuththun ca'rama cen, ana okin thoprttakatherit. Akin ipittat itti, "Pul empi ponat thinaik nti ica enthi ngkartha? Ana pu'ran pothokkot lon ilommaththik elli ngk-eren? ⁵⁵ Okorronno oka ukul enni wopul ipaccatha o'reni? Ana okorronno oka onnan iponu k'ran itti oMeriomi, ana okorronno oka opangon ithonu 'ran itti oIakup ana oIuccip ana oCamaan ana oIouthai? ⁵⁶ Okorronno oka opangon ithari enthi cene uraththungoni? Pul empi piothe lon elli kartha appik?" ⁵⁷ Ittina ul w'rakathe lon lung ila kwokat cik akwokkot.

Anaruk oIeccuo pi'rekathekin itti, "Pul pothernte lon loKapik paul wothanung ana wonoththok pung akkakorronno othiane cik tulluk."

⁵⁸ Ana kwakannokkat lon ilommaththik loppot noka'ran ken akka okin thellat thocokot lon nomikit.

14

Thio thoIuanna pomamuthie
(*Markkoc 6.14-29; Lukka 9.7-9*)

¹ Noca'ri cen aIruthuc ili wonoththok poCelil occikat lon ila loIeccuo pokat cik akwokkot, ² akwi'rekat ul wung iokat cinang itti, "OIuanna pomamuthie empi icat purokot nti ithio. Ilen akka pu'ran polon ilommaththik paik parekine iaak."

³ OIruthuc pokat poccoke the oIuanna akwi'rikikkathok akwonekkekathok ikorrkkor nti ilon loIruthia ipokat pari popang oPilippic ipa aIruthuc pappipothok ⁴ akka oIuanna perntenok itti, "Lakannoka loco'rotheik itti ngkwipot opangkang oPilippic pari oIruthia." ⁵ OIruthuc pokat pongothe itti kwakkwot oIuanna anaruk kwonat n're noul akka okin thokat akin okatha oIuanna ammakka pul pothernte lon loKapik pen.

⁶ Ana nokamuthe koca'ri cothokwonta coIruthuc, aukul woIruthia iopari ukkwanthet kin ana oIruthuc popirakathe noka kannan, ⁷ akwonekkekanthet ukul lon cik tokit koul itti kwethet ukul papu ipa akwipitto.

⁸ Ana ukul wi'rekatho oIruthuc itti, "Ethin ca coIuanna pomamuthie nocaththak inaina," akka onnan pokat pi'rethe itti wi're ittina.

⁹ Ili oIruthuc wokat wakannopira noka anaruk kwokat ponekkethe lon cik, ana ul wung wocokithe. Ittina kwi'rekatho itti lakkattat ila

ukul wipittot, ¹⁰ ana kwothiathe pul pothorro ana pathhokiat oLuanna ca cik ikorrkkor. ¹¹ Ca coLuanna conakittakathe nocaththak ana cettakathe ukul iopari ana wonekanthet onnan. ¹² Ul woLuanna iammakothok wakkakathe ana wonekathe kumi koLuanna ana waththocikkat. Ana okin thoiingkathe ana okin thaththi'rekat oIeccuo.

OIeccuo pa'rikié ul cik athar ukuluk

(Markkoc 6.30-44; Lukka 9.10-17; Iuanna 6.1-14)

¹³ Anakka oIeccuo poccikothe lon loLuanna, kwarrathe ikuppu'rung konoi'ri ana kwoingkathe noka'ran na ul wellat. Manakka ul woccikothe itti oIeccuo peot, amakathok ntacok nna'ran appik. ¹⁴ Anakka oIeccuo porpotheik nocapu nti ikuppu'rung konoi'ri akwimmakat cungkut coul woppot akwipat thiak then ana kwittiekathe okkwion ithokat thongo.

¹⁵ Anakka cipin cokat cik acapo, aul wung iammakothok akkakanthok ana wi'rekathok itti, "Ka'ran engki kella ulrit ana ngi'rimak ngaik nga'roik. Omethe ul apettakot cik othakka itti akin eo icarak coman akin othokerine ka ken thu'rit akin o'rko."

¹⁶ Aleccuo othiat tit itti, "Okin thou itti okin thakanneo. Nethet kin a'rupu w'rek akin o'rko."

¹⁷ Aul iammakothok othiat tit itti, "Onin thou arrakith ukuluk ana ape we'ra tulluk."

¹⁸ Aleccuo i'rekat itti, "Nonanin cene."

¹⁹ Akwi'rekat ul itti wikkoik noraco. Akwonekat arrakith iukuluk ana ape ie'ra akwokathakat tothi'rot, akwopirakanthet Kapik noka akwomithat iarrakith akwekat ul iammakothok

ana ul iammakothok wikkekathe ul arrakith.
²⁰ Okin tho'rkkathe appik akin oththakakat, aul iammakothok a'rntat nyalünthüng attul ana ikken ke'ra (12) nyothu'rit ithokwentakot nan.
²¹ Ul iomura io'rkot thu'rit wokat athar ukuluk (5,000) anaruk ul iari ana nyukul inyarran nyokat nyakannongantetta.

*Oieccuo panyaro no'ra worok irapangka
 (Markkoc 6.45-52; Iuanna 6.15-21)*

²² Ittina aleccuo arriekat ul iammakothok ikuppu'rung konoi'ri akin eo tokit naak nokuthut korok k'rek akwi'rikot othiöt ul ikathar. ²³ Anakka kwothiöthe kin ikathar, kwoku'rathe pellek noco'rong akwotha'ra nga'rama. Anakka cipin capot, kwokat cik than pellek, ²⁴ ana kuppu'rung konoi'ri ikonat ul iammakothok kokat cik ipanan porok irapangka, akothantittakot tit akka kanang kokat cik akokkurarot.

²⁵ Ana nothothuput thorrot, oieccuo pakkakanthet ul iammakothok akkwaik akwonyaro no'ra woi'ri ngonorok irapangka.

²⁶ Anakka ul iammakothok wimmarok akwonyaro no'ra wong'ri ngonorok irapangka, okin thipathe n're. Akin i'rekat itti, "Ikkre purrut," akin ikkat cik akin oo nn're.

²⁷ Anaruk oieccuo pi'rekathekin accokkot itti, "Nopo'rathan, oun oieccuo nokorronno opelle."

²⁸ APoththuruc i'rekathok itti, "Ili, amma oung, i'rethin anainung anonyaro no'ra woi'ri."

²⁹ Aleccuo i'rekathok itti, "A'rik."

Ittina oPoththuruc porpathe nti ikuppu'rung, akwonyarat no'ra woi'ri akwoingkanthet oIeccuo. ³⁰ Anaruk akka kwimmat kanang, kwipathe n're akwikkat cik akuo tho'ronthong, akwekat ngeme cittan itti, "Ili, o'rethin."

³¹ Ana accokkot aIeccuo othiekathe ukun ana kwocokathok akka kwokat cik akwikikko ng'ri, akwi'rekathok itti, "Okkwi iponu thocokot lon loKapik nocikit thotte, ngintha akka ngkwonanet mikit me'rarit?"

³² Anakka okin tharrothe ikuppu'rung, akanang oco'rat. ³³ Ittina okkwion ithokat cik ikuppu'rung a'rakanthok nga'rama, akin i're itti, "Oung ukul woKapik icaricat."

³⁴ Manakka okin tharrothe tok cik, okin thorpathe nocik coCeniccarth. ³⁵ Anakka ul wonoththok pen winat oIeccuo, akin othianthet ul thon na'ran wen appik. Ul wonakanthok ul iongo appik ³⁶ akin ipittat oIeccuo itti kwakorronno ul iongo athnto to'ron lokret kung, ana okkwion ithothntot kret kung thittakathe.

15

Occikot lon loKapik (Markkoc 7.1-13)

¹ Ittina aul w'rek woPriccin ana ul iangkene lon lothonce'ret lon cik akkakanthet oIeccuo noka'ran koUruccelim aipittathok itti, ² "Ngintha akka ul iammakothung w'ranet lon lothathuma thoul ittittik woul? Okin thakinnilakko nyaun akin anto'rkoik."

³ AIeccuo othianthet kin tit itti, "Ana ngintha akka onon th'ranet lon loKapik annocokot lon

lothathuma thon? ⁴ Akka Kapik ki'ret itti, 'Othianet oththe ana onne cik,' ana 'Okkwi ipattatta oththan ana manna onnan kwonu itti kwakkuttat.' ⁵ Anaruk onon thangkene itti, amma pul ponu pap'rek itti pittarot oththan ana manna onnan ngngin, akwomet kin itti, 'A'rupu enni wampaik pethet Kapik,' ⁶ kathar engki ikakin othiane oththan ana onnan cik ngngini? Onon thorakket lon loKapik othakka itti annomakot thongkene thothathuma thon. ⁷ Onon ithongothe itti nthinnikot lon, lon loIccaia pul pothernte lon loKapik laik icat ila kwerethenon ngngin itti,

⁸ 'Ul enni wathianin cik llon nuthuk,
anaruk mikit men maik ciththan naun.

⁹ Okin tha'ranin nga'rama ella mikit nan,
akka okin thangkene thongkene tholon loul ionyi."

¹⁰ Aieccuo akkarat cungkut coul akwi'rekat kin itti, "Nocikot anninakat lon len. ¹¹ A'rupu ia pul o'rko wakorronno ipie pul ngu'ru, anaruk lon ila pul ere, ilen akkathikkiek pokithak."

¹² Ittina aul iammakothok akkakanthok aipitathok itti, "Ngkwina itti ul woPriccin wuat ka akka okin thocikotho lon elli?"

¹³ Aieccuo othiat tit itti, "A'rupu ia angappa porothi'rot pakannee wihako nti impu llaka len.

¹⁴ Nokorronno kin, okin ul itte pangken ana okin thamma kathar. Amma pul ipi'rimathe paik pathutho pul ipi'rimathe okin aththuththe'ra thapot ippu."

¹⁵ APoththuruc i'rekat itti, "Okenenän lon lothokkwie lon kuru ncik."

¹⁶ Aleccuo ipittat kin itti, "Onon tharthuk thomma lon ila mpaik pereri? ¹⁷ Nthomma itti a'rupu iartta wuo icarak ana nti icarak wakinyakoi? ¹⁸ Anaruk lon ila pul ere nti ithon lanthan nocikät, ana ilen akkathikkiek pokithak. ¹⁹ Akka lon ammakka thokwarttikot cik ithokithak ana thokkwot pul ana a'ro nul iari ittat ana a'ro nul nuthuk ana thu'ran ana ammikkot ana thocungkwo, lanthan nocikät. ²⁰ Lon elli akkathikkie pul pokithak anaruk tho'rkoik nynyaun nyongi thakorronno othikkie pul ponyi."

Thoccokot lon nocikät thopul ipopari ipakan-noka poIouth

(Markkoc 7.24-30)

²¹ Oieccuo poththekathe noka'ran ken akwo- ingkat nocik iccik koka'ran koCcur ana koC- cithon. ²² Apul p'rek ipopari ipokat cik than poul woKanaan akkakanthet oieccuo apakkakkarok mpo're cittan itti, "Ili, ukul woThauth, ipi thiak thin, ukul win iopari waik wiine u'rupa iokithak iaik iaak."

²³ Oieccuo pakinni'rekathok lon l'rek. Aul iammakothok akkakanthok amekathok itti, "Okicce pul ipopari empi akka paik pammakot ton apakkakkarok mpo're cittan."

²⁴ Aleccuo othänthet kin tit itti, "Mpothilanthet lungkat lulluk loul woIccereil ilurttatheik."

²⁵ Apul ipopari akkakat apeekat ungu ncik tokät kung api'rekat itti, "Ili, ittarothin."

²⁶ Aieccuo othiät tit itti, “Lakannoka loporot itti thu'rit thanekittat nyukul athettat luk.”

²⁷ Apul ipopari i'rekat itti, “Ïi, Ili, anaruk luk manna la'rko thu'rit ithapukkot opingon nomaththak.”

²⁸ Ittina aieccuo othiät tit itti, “Pul ipopari, ngkwonu thocokot lon loKapik nocikit thrik, ana lon lang lakkattanthung.” Ana ukul wung wittakathe ca'ri cen ca'ri cen.

Oieccuo pittiet ul woppot

²⁹ Oieccuo poththekathe noka'ran ken akwoingkat akwomakot kuthut korok irapangka toCelil akwoku'rat toco'rong akwikkat cik.

³⁰ Amungkut moule akkakanthok moppot, ammonat imico ana ul i'rimathe, ana ul w'rek iommat onyaro lon loporot, ana ul iommat ere, ana a'rek akin onekkekanthok tokit kung, akwittiekat kin appik. ³¹ Ul woprttakatherit akka wimmat ul iommat ere awaik aere, ana iokat imico anyaro cakuruk ana iokat wi'rimathe awimmat cik. Ana okin thopirakanthet Kapik koIccereil noka.

Oieccuo pa'rikie ul athar woco'rin (Markkoc 8.1-10)

³² Oieccuo pakkarathe ul iammakothok akwi'rekat kin itti, “Mpipot thiak thoul enni, akka okin thothikkiet ma'ri m'rapuruk inenni uraththungon cene ana okin thella alp'rek iakin o'rko. Mpakannangkot itti mpathiot kin ikathar thiamat, akka akin apukkot ikathar.”

³³ Aul iammakothok othiat tit itti, “Oron thiot thu'rit kartha cene thoppot thomnther ithekkou noul enni?”

³⁴ Aieccuo ipittat kin itti, “Onon thouu arrakith wornoththa?”

Akin othiat tit itti, “Onin thouu arrakith we're'rapuruk ana ape wotteik iarran.”

³⁵ Akwi'rekat cungkut coul itti okin thikkoik nocapu. ³⁶ Ittina kwonekathe arrakith ie're'rapuruk ana ape akwopirakanthet Kapik noka, ana kwomithatherit ana kwikkekathe ul iammakothok aikket ul. ³⁷ Okin tho'rkkathe appik ana nthoththakakathe. Ana apotteik ul iammakothok wocumathe thu'rit ithokwentakot nan nyalünthüng nye're'rapuruk. ³⁸ Maun mouli io'rkot thu'rit mokat athar woco'rin (4,000) ella ul iari ana nyukul inyarran tit. ³⁹ Anakka oieccuo pothiothe ul nokathar, akwarrat ikuppu'rung konoi'ri akwoingkat nokuthut korue irapangka t'rek akwakkakat noththok ipoccot k'ran itti Macithan.

16

Thipitto lon ilommaththik

(Markkoc 8.11-13; Lukka 12.54-56)

¹ Ul woPriccin ana ul woCcathukkin wakkakanthet oleccuo anekkekathok nthipittothok lon itti kwakenekin lon ilommaththik akin ina itti kwaan noKapik.

² Aieccuo othianthet kin tit itti, “Amma cipin capot, anni're itti, ‘Cik cathakka coporot ngorrot inakka cik co're tothi'rot,’ ³ ana ingi'rimak anni're itti, ‘Kapik kapo inenni akka cik co're

tothi'rot ana caththung.' Onon thina akka anina cik corothi'rot ana conocapu, anaruk onon thakinnina lon ilrik ilaik lakkattat inenni. ⁴ Onon thaul wolon ilokithak ana ithella thoccokot lon loKapik nomiküt, thipitto lon ilommaththik, lella ilakkattanthet kin lulluk ilommaththik ilokkattanthet pul pothernte lon loKapik oLunan akkakenetta non." Ittina oIeccuo poththekathe nakin akwoingkat.

No'rumoik nnolon loul woPriccin ana woCathukkin

(Markkoc 8.14-21)

⁵ Anakka okin tharrothe tue irapangka cik aul iammakothok urekat nan oneko arrakith. ⁶ Aieccuo i'rekat kin itti, "No'rumoik nolon ilao noul woPriccin ana woCathukkin ilikkoik ere mü'rükül."

⁷ Aul iammakothok erettaranthet lon elli thellek akin i'rekat itti, "Oieccuo paik pere ittina akka oron thakannona arrakith."

⁸ Oieccuo pinat nolon ilakin thokat akin eret akwi'rekathekin itti, "Onon ithonu thoccokot lon loKapik nomiküt thotte, nthontha akka annerettarne itti onon thella arrakith?"

⁹ Onon tharthuk thakanninaiki? Onon thakannokwarikot arrakith ukuluk io'rikiettat ul athar ukuluki, ana nyalünthüng nyornok inyanon tha'rntothe nothu'rit ithapukkotheik nani?

¹⁰ Onon thakannokwarikot narrakith ine're'rapuruk ina ul wo'rkot athar woco'rin ana nyalünthüng nyothu'rit ithapukkotheik nan ithanon tha'rntothei? ¹¹ Nginthä akka onon thommanet itti mpokat cik anokorronno eret

lon larrakith? Anaruk no'rumoik nolon ilao noul woPriccin ana woCcathukkin ilokkoik ere mü'rükül." ¹² Ittina okin thinakathe itti kwokat cik akwokorronno erenekin itti okin tha'rumo nomü'rükül imakkattat narrakith, anaruk itti okin tha'rumoik nnothongkene thoul woPriccin ana woCcathukkin.

*OPoththuruc pi'ret itti oIeccuo ook oMiccie
(Markkoc 8.27-30; Lukka 9.18-21)*

¹³ Anakka oIeccuo paat nocik icaik iccik koka'ran koKaiccaria Pilippi, kwipittathe ul iammakothok itti, "Ul were itti ukul wopul iponyi oththa?"

¹⁴ Akin othiät tit itti, "Opilingon thi're itti oung oIuanna pomamuthie, ana opilingon itti oung oIlia, ana opilingon icci itti oung Armia ana manna pul p'rek pothernte lon loKapik."

¹⁵ AIeccuo ipittat kin itti, "Ana onon thi're ittioun okkwen?"

¹⁶ ACcamaan oPoththuruc othiät tit itti, "Oung oMiccie, ukul woKapik ikaik icat."

¹⁷ AIeccuo othiät tit itti, "Ngwethiättat, Camaan ukul woIunan, pul iponyi akkakannokeneng elli, anaruk ongappa ci tothi'rot akkokenerung. ¹⁸ Ana mpi'rethung itti oung oPoththuruc (ilonu itti cik iconthomat). Ana nocik iconthomat enci na anoku're ul ncik ngngin iaccokot lon lin, ana pu'ran pothothirin pakannalkot lon len. ¹⁹ Mpethung lon ikkun longili ngorothi'rot, lon ilakorronno okorronno itti laka nocapu lakorronno okorronnako itti laka

tothi'rot, ana ilakorronno itti laka nocapu lakorronnako itti laka tothi'rot.” ²⁰ Ana kwonekkekanthet ul iammakothok lon cik itti okin thakinni'ret pu'rek itti ook oMiccie.

Oleccuo peret thio thung

(Markkoc 8.31—9.1; Lukka 9.22–27)

²¹ Ana nci noca'ri cen oleccuo pikkatheik akwerene ul iammakothok itti kwonu itti kwaeo noka'ran koUruccelim akwothokkiettat thiak llon loppot inyaun nyoul ittittik ana ul ittittik woul wonoppa toKapik ana ul iangkene lon lothonce'ret lon cik, ana itti kwonu itti kwakkuttat ana noma'ri im'rapuruk kurokietta nti ithio.

²² APoththuruc onekat oleccuo thocipit pellek akwa'rettat naak itti, “Ili, okorronno oka ittina, elli lakannoka naung kirrkir.”

²³ Aleccuo oprttakat akwi'rekat oPoththuruc itti, “Pul pothopulut, opa'rik nti iccik kin, ngkwaik palikinin cik ikathar, ngkwella lon loKapik ica, anaruk lon lopul iponyi.”

²⁴ Ittina aleccuo i'rekat ul iammakothok itti, “Amma okkwi ipongothe itti kwammakothin, kwonu itti kure noka kung akwoneko thapak thung akwommakothin. ²⁵ Akka okkwi ipongothe itti kwa'ret thikkoik thung ana kuret cik, anaruk okkwi ipuret thikkoik thung cik nti ilon lin ana kwa'ret. ²⁶ Ngintha akkoporot amma pul pothikkiet capu ncik appik cung anaruk kurethe calak cung cik? Ana ngintha akka pul okucitto ncalak cung? ²⁷ Akka ukul wopul iponyi waik wanthan nthrik thoththan pung nu'rupa wothothilettat woKapik, ana kwakke ul wululuk

llon ilakin thokkothe. ²⁸ Mpi'ret non lon ilaik icat, opilingon nti iul enni iaik waco'ro cene thakannille akin tharthuk imma ukul wopul iponyi anthan nngili ngung."

17

Thoprttakoik thoIeccuo (*Markkoc 9.2-13; Lukka 9.28-36*)

¹ Anakka ma'ri meot ncik m'rakkuruk, oIeccuo pipathe oPoththuruc ana oIakup ana oLuanna opang poIakup, akwonekat kin thellek ci no'ra woco'rong cukwit. ² Kwoprttakatheik tokit ken. Kwolliathe toca ere cingki, ana eret wung wupukakatheik ere k'ran kocingki cakuruk. ³ OMucca ana oIia thummathe ncik akin erekanthet oIeccuo.

⁴ APoththuruc i'rekat oIeccuo itti, "Ili, loporot akka oron thaik cene. Amma ngkwongothe, ana mpuno mü'rük m'rapuruk, culukku cang ana ac'rek coMucca ana ac'rek colia."

⁵ Anakka kwokat cik akwere, anuththe akkakat nipuk ano'rumat kin, apo're akkakat nti inuththe api'rekat itti, "Ukul win enni ia mpongothe ana mpopirat noka nan. Noccikot lon lung."

⁶ Anakka ul iammakothok woccikothe menik, akin ipat n're akin eekat toma ncik. ⁷ Anaruk oIeccuo pakkakathe ana kwothantathekin akwi'rekat kin itti, "Nurokot kapik nokorronno ipo n're." ⁸ Anakka okin thonthot toma ncik, akin othiat pul pella aIeccuo pulluk akkaik akwoco'ro.

⁹ Anakka okin thokat cik akin okkaprttako ntan noco'rong, oIeccuo pi'rekathekin itti, “Nokorronno i'ret pul p'rek lon ila non thimmat puccuk aukul wopul iponyi urokiettakat nti ithio.”

¹⁰ Aul iammakothok ipittathok itti, “Ngingtha akka ul iangkene lon lothonce'ret lon cik i'rene itti oIlia ponu itti kwanthan tokit naMiccie?”

¹¹ AIeccuo othianthet kin tit itti, “Ilaik icat itti, oIlia panthan ana kwapakket lon cik appik.

¹² Anaruk mpi'ret non itti, oIlia paat ntit, ana okin thakinninak, ana okin thokkothok lon ilakin thongothe itti okin thakkothok. Ana menik ukul wopul iponyi waik wathoccokiettat thiak inyaun nyen.” ¹³ Ittina ul iammakothok winakathe itti kwokat cik akweret oIuanna pomamuthie akka kwi'ret itti oIlia paat ntit.

*Thittiet ukul ionat u'rupa iokithak
(Markkoc 9.14–29; Lukka 9.37–43)*

¹⁴ Anakka okin thaat nocungkut coul, apul p'rek akkakanthet oleccuo apeekat ungu ncik tokit kung. ¹⁵ Api'rekat itti, “Ili win, ipi thiak thokkul win akka wappellet ikapa ana lon len laccokiethok thiak kannan. Wapukkot ithik appinappin ana ii'ri. ¹⁶ Mponanet ul iammakothung ana okin thommakathe ittiet.”

¹⁷ AIeccuo othiat tit itti, “Onon ul iannocokot lon loKapik ana iaul iokithak, oron thikkoik uraththungon manna kartha? Mpanongkwinthet non ilon manna kartha? Nonanin ukul cene.” ¹⁸ OIeccuo pothirriekathe u'rupa iokithak cik ana wirrathe nti ikkul ana ukul wothakkakathe woporot noca'ri cen.

19 Ittina aul iammakot oIeccuo akkakanthok pellek aipittathok itti, “Ngintha akka onin thomanet okiccene u'rupa iokithak nti ikkul?”

20 Kwothianthet kin tit itti, “Onon thakanokicce akka onon thonu thocokot lon nomikit thotteik. Mpi'ret non lon ilaik icat, amma onon thonu thocokot lon nocikit thotteik ere core icotte onon thi'ret co'rong enci itti, ‘Ngko ncene aeo ceneket’ ana caeo. Lon lella lalkot non. 21 [Anaruk u'rupa iokithak iammakka enni wakicetta ngnga'rama ana thoco'ro nothu'rit tulluk.]”

OIeccuo peret thio thung attang

(Markkoc 9.30–32; Lukka 9.44–45)

22 Anakka okin thaath tothun nnoththok poCelil, oIeccuo pi'rekathekin itti, “Ukul wopul iponyi waik wathokettat ul. 23 Okin thakkwothok, ana noma'ri im'rapuruk kurokwietta nti ithio.” Ana ul iammakothok wipathe thiak kannan.

Tha'rntot thonoppa toKapik

24 Anakka oIeccuo ana ul iammakothok thaath noka'ran koKapprnaum, ul ia'rntot tha'rntot thonoppa toKapik wakkakanthet oPoththuruc. Okin thokat cik akin a'rntottot nopul pulukku thinar* the'ra akin ipittathok itti, “Atti pul pang ipangkene panekket tha'rntot thonoppa toKapik?”

25 APoththuruc othianthok tit itti, “Ïi, kwalekket.”

Anakka oPoththuruc paat tuan, aleccuo ipittathok itti, “Camaan, ngkwi're itti kaththa? Nili

17:21 17.21 Markkoc 9.29 * 17:24 17.24 Thinar itti akucci iarekako ngngin ca'ri culukku.

nonocapu na'rntot tha'rntot nakkwengon, noul weni ana amma okorronno oka noul wen, noul wokwaari?"

²⁶ APoththuruc othiät tit itti, "Noul wokwaat."

AIeccuo i'rekathok itti, "Ittina ul wen wellarit.

²⁷ Anaruk othakka itti aron okorronno uekin ka, ngko thorue irapangka arret teme i'ri ai'riththa ape. Oneki pape ponommun ipa ngkwi'riththat anyot thon then, ana ngkwiot kakucci kulukku ikekko nothinar thoco'rin. Oneki kakucci ken athonekkenthin itha'rntot thonoppa toKapik anekkekanthet ka kang."

18

Okkwi iprik ingili ngorothis'rot

(Markkoc 9.33-37; Lukka 9.46-48)

¹ Noca'ri cen aul iammakot oIeccuo akkakanthok aipittathok itti, "Oththa akkrik ingili ngorothis'rot?"

² Kwakkarathe ukul iotteik ana kwoce'rekathethe itho'rkit then. ³ Ana kwi'rekathekin itti, "Mpi'ret non lon ilaik icat, amma onon thakonnoprt-takoik mono othakka ammakka nyukul inyarran, onon thakinni'riko kirrkkir ingili ngorothis'rot.

⁴ Ittina okkwi ipathikkie ka kung potteik ammakka ukul enni ook akkaka prik ingili ngorothis'rot.

⁵ Ana okkwi ipikkie ukul iotte cik ammakka enni ngk'ran kin, kwikkien cik. ⁶ Anaruk amma opilin pokorronnot okkwi ipotte ipoccokothel lon lin ammakka empi akwokkot lon ilokithak kwakkmako kannan nopul ipi'rikakot cna apan-torrettat irue irapangka apikikko ng'ri apio.

⁷ Angkre, ul wonocapu akka lon ilakorronno ul akkot lon ilokithak lonu itti lakaik. Anaruk angkre, pul nalon elli anthan nnan. ⁸ Amma ukun wang ana manna wek wakorronnong itti ngkwakkot lon ilokithak, okiotheik arre. Akka loporot itti ngkwikkoik nukun wulukku ana wek wulukku nothona tacok atutte'ra ana nyaun anyunye'ra arrettat ithik thothupuththuput. ⁹ Ana amma cõt cakorronnong itti ngkwakkot lon ilokithak, antho nti ica arre. Akka loporot itti ngkwikkoik ncõt culukku nothona küt akkukke'ra aeo ngngin ithik thothupuththuput.”

Thokkwie lon kuru ncik thothungkat ithuratheik
(Lukka 15.3-7)

¹⁰ “Paththon, nokorronno orakke lon lopilin ntiakin enthi itharran. Akka mpi'ret non itti u'rupa wothothilettat woKapik wen tothi'rot iangwot kin waik iccik kongappa tothi'rot ana wi'rethok lon appik. ¹¹ [Ukul wopul iponyi waat itti atho'ret ul iurttatheik.] ¹² Onon thakkot taththa amma pul ponu lungkat arrial ukuluk (100), ana thungkat thulukku thuratheik nan? Kwakannothe nolungkat arrial woco'rin ana alkaire ana ikken ukullaco'rin (99) noco'rong akwothokwancot ithulukku ithuratheiki? ¹³ Mpi'ret non ilaik icat, amma kwiothe kwapira noka kannan nnothungkat ithokat thuratheik nnolungkat ila arrial woco'rin ana alkaire ana ikken ukullaco'rin ilokat lakannurat

cik. ¹⁴ Menik, oththe pon tothi'rot pakannangkot itti opilin nti ntiakin itharran itti kurat cik.”

Opangkang ipakkinthung lon lokithak

¹⁵ “Amma opangkang ipanon thoccokothe lon loKapik pokkinthung lon lokithak, ngko athokenek lon lung ilokithak ila kwokkinthung anon the'ra tulluk. Amma kwocckithe lon lang, ana nthopakkothe iku'ri nopangkan p'rïn. ¹⁶ Anaruk amma kwakonnocckot ana 'ra itti kwokkothe lon ilokithak, appona pul pulukku ana manna ul we'ra othakka itti akin athocckot akka anon ere othakka itti 'alon ilokkattathe inako nan nnul we'ra ana manna w'rapuruk.’ ¹⁷ Ana amma kw'rat occikot kin, i'rethe ul iocckothe lon loIeccuo ia'rntakothē, ana amma kw'rat occikot manna ul iocckothe lon loIeccuo ia'rntakothē, okathak ere pul ipomma lon loKapik ana ammakka pul ipa'rntot akucci.

¹⁸ Mpi'ret non lon ilaik icat, lon ilanon okorronno okorronno itti laka nocapu, lakorronno okorronnako itti laka tothi'rot ana lon ilanon okorronno itti laka nocapu, lakorronnako itti laka tothi'rot. ¹⁹ Mpappi'ret non attang itti, amma opilingon the'ra nti ianon thi'rikot lon nocapu ilakin ipitto nga'rama ongappa pin tothi'rot pethet kin. ²⁰ Akka na ul wa'rntakothē ngk'ran kin we'ra ana manna w'rapuruk, mpaka itho'rkit then.”

Thokkwie lon kuru ncik thopul ipella thiak nocikit

21 APoththuruc akkakanthet oIeccuo akwipittathok itti, "Ili, mpaccikinthet opangkin lon ma'ri mornoththa amma kwokkinthin lon lokithak? Ma'ri me're'rapuruki?"

22 Aieccuo othiat tit itti, "Mpi'rethung, okonoka ma'ri me're'rapuruk, anaruk ma'ri arrial w'rapuruk ana alkaire orrot tit ma'ri me're'rapuruk (490).

23 Ittina ngili ngorothis'rot ngammakka ili iakkarot ul iareko naak akin ethok kamucu ka'rupu iakin thokat thoccot. 24 Manakka ili wurokiet lon lokamucu ncik, akin onakanthok opilin ipa kwonat akucci nan woppot kannan. 25 Ana pul pen pellat akucci ia akwokke kamucu ken, ittina aili i'rekat itti, ook ana opari ana nyukul nyung ana a'rupu appik ia kwonu thanekittat icekerek akin othoketta othakka itti akwokke kamucu.

26 Anaruk pul iponu kamucu noka eekat ungku ncik tokit koili apipittathok itti, 'Ili win, oco'rinin papotteik, ana mpakkekung kamucu kang appik.' 27 Aili ipat thiak thung akwokkanthok nti ikamucu akwokarrannathok akweo.

28 Anaruk akka pul pen peot thapat, apiat okarkung p'rek ipa kwapponat kamucu nan kakucci wotteik. Kwapathe naak akwikkat cik akwokkwekok akwi'rethok itti, 'Ethin kamucu kin.'

29 Akarkung pen ipakin oreko apat cik tokit kung akwipittathok itti, 'Oco'rinin papotteik, ana mpakkekung kamucu kang appik.'

³⁰ Anaruk kw'rakathe ana kwonekathok ana kwonekkekathok ikorrkkor akwikkoik than pucuk akwokkekat kamucu. ³¹ Anakka ul w'rek iarekine ili wimmat lon len ilokat cik okin thipathe thiak kannan ana okin thoiŋkathē ana okin thaththerekanthet ili lon len ilokat cik appik.

³² Ittina aili akkarat pul pen ai'rekathok itti, 'Oung pul ipareko ipokithak, mpokkinung nti ikamucu appik akka ngkwerenin thiak nti icarak.

³³ Ngkwakannonat thiak thokarkang ipa anoreko ammakka mpipot thiak thangi?' ³⁴ Aili uakat ka kopul pen aekathok ul worikorrkkor akwothopoko puccuk akwokkekat kamucu ika kwonakot nan.

³⁵ Elli akka ongappa porothi'rot okkinthet non thuluk thuluk amma onon thakannocikinthet opangkangon lon nci noucce won."

19

Thothio pari

(Markkoc 10.1-12)

¹ Anakka oleccuo pomarttot lon elli, kwoththekathe noththok poCelil akweo noththok poIouthia nokarkan k'rek korirue irapangka toÜruthün. ² Ul womakathok woppot ana kwittiekathekin ithokat thongo.

³ Aul woPriccin akkakanthok athennekkek, akin ipittathok itti, "Loco'rotheik itti pul pathio pari nolon nuthuki?"

⁴ Aleccuo othiat tit itti, "Onon thannakkakkaro lon ilaik iatham woKapik ili'ret itti, okkwi ipoku'ret kin ncik ncinomun pokkothekin pul

ipocura ana ipopari? ⁵ Ana kwi'rekathē itti, 'Nti ilon elli pul ipocura paththe naththan ana onnan apokattakot okin opari ana okin aththuththe'ra thaka ka kulukku.' ⁶ Ittina okin thakannoka the'ra p'rin anaruk okin thulukku. Menik ila Kapik kokottothe tothun pul pella pillorit."

⁷ Akin ipittat itti, "Ngintha akka oMucca ponekkenthet lon cik itti pul pethet opari ka'rmacak kothothäiko akwantothök?"

⁸ Aieccuo othiat tit itti, "OMucca pokorronnot non annothio ari won akka mikit mon mokat monthomat. Anaruk lokat lakannoka ittina ncinomun. ⁹ Anaruk mpi'ret non itti, pul ipathio pari appakanna'ro mpul mono akwothipo ap'rek kwaik pa'ro mpul ipopari ipittat ana lokithak."

¹⁰ Aul iammakothok i'rekathok itti, "Amma lon elli akkaik noul iittettot, loporot itti pul pakinnipo pari."

¹¹ Aieccuo othiat tit itti, "Pul pella pangant lon elli, anaruk okin thuluk itha Kapik kethet lon len. ¹² Akka opilingon thokwontat thalmo're ana opilingon thathuththakot ana opilingon th'rat ipo nti ithocokot lon longili ngorothis'rot. Okkwi ipangat lon elli akwongat."

*Oieccuo pethie nyukul inyarran
(Markkoc 10.13-16; Lukka 18.15-17)*

¹³ Ittina anyukul inyarran onakittakanthet oieccuo othakka itti akwonekket nyaun nakin akwa'rakat nga'rama nakin. Aul iammakothok othirriekat ul cik ionat nyukul.

14 Aieccuo i'rekat itti, "Nokorronno anyukul inyarran anyanthan naun, nokorronno oce'rekin akka ngili ngorothis'rot ngoul iammakka enni."
 15 Anakka kwonekkethe nyaun nyung nakin akwa'rakat nga'rama nakin akwoingkat.

Ukul ioku'rit iapa'rthan

(Markkoc 10.17-31; Lukka 18.18-30)

16 Apul p'rek akkakanthet oieccuo apipitathok itti, "Pul ipangkene, ngingtha akka mponu itti mpakkot ipoporot anikkoik thikkoik thothupuththuput?"

17 Aieccuo othiat tit itti, "Ngingtha akka aipitinthin lon iloporot? Pul paik pulukku ipoporot. Amma ngkwongotho itti ngkwikkoik thikkoik thothupuththuput occikothe lon ila Kapik kethet oMucca."

18 Apul pen ipittat itti, "Lon liatha?"

Aieccuo othiat tit itti, "Kirrnni okkwot pul, kirrnni a'ro mpul ipopari ipittat, kirrnni omunye, kirrnni oco'rot lon ngkarra, ¹⁹ othianet oththe cik ana onne, ana angat ul w'rek ammakka ngkwongotho ka kang.'"

20 Apul ipopu'rit i'rekat itti, "Mpokkothe elli appik, ngingtha akkokwentakinthin?"

21 Aieccuo othiat tit itti, "Amma ngkwongotho itti ngkwathakka poporot, ngko athokette a'rupu ia angkwonu appik aikket ul akucci iella a'rupu cik, ana ngkwiot tha'rthan tothis'rot. Ittina antanthan amakothin."

22 Manakka pul ipopu'rit poccikothe menik, apoingkat appuaka kannan akka kwonat tha'rthan thoppot.

23 Ittina aIeccuo i'rekat ul iammakothok itti, "Mpi'ret non ilaik icat, lonthomat nopul ipapa'rthan itti pi'riko ingili ngorothi'rot. 24 Mpappi'ret non attang, lippappat itti thamla thakko icürük coipra nopul ipapa'rthan itti pi'riko ingili ngoKapik."

25 Anakka ul iammakothok woccikothe elli, okin thoprttakathe tit kannan akin i'rekat itti, "Oththa akka'rettat?"

26 AIeccuo okathakat kin akwi'rekat itti, "Elli lonthomat nopul iponyi anaruk noKapik, lon appik lakannoka lonthomat."

27 APoththuruc othianthok tit itti, "Onin thoththet na'rupu appik anin omakothung, ngintha akka anin okketta ntit?"

28 AIeccuo i'rekat kin itti, "Mpi'ret non lon ilaik icat, noca'ri ica ongappa athoprto lon cik ilie ana ukul wopul iponyi ikkoik noprrok pothrik thung, onon ithommakothin thikkoik norrok iattul ana ikken ke'ra cakuruk, ana akkma ul wolccereil mothok mothok imattul ana ikken ke'ra. 29 Ana okkwi ipoththet nokaman ana napangon ithomura ana ithari ana naththangon ana nannangon ana nonyukul ana opon nti ilon lin kwiot a'rupu wen woppot ana Kapik kethok thikkoik thothuputhput. 30 Anaruk okin thoppot ithaththokat tokit thathoka thoceken, ana okin thoppot ithaththokat thoceken thathoka tokit."

20

Thokkwie lon kuru ncik loul iareko ikkwon komaa

¹ OIeccuo pappi'rekat itti, "Ngili ngorothi'rot ngungkwot ere pul pokkwon ipeot ngi'rimak apothokwantot ul iarekinok ikkwon komaa. ² Akwiat ul akin erekat akwothiat kin topon akin othoreko nthinar thulukku thoca'ri culukku.*

³ Anakka cingki cokkothe ukullaco'rin cocik corrot, kwoingkathe ana kwimmakathe ul w'rek aco'ro keccuk awella ngre cik. ⁴ Kwi'rekathekin itti, 'Ngkonon cakuruk annothoreko ikkwon kin ana mpethet non akucci iekkot nan.' ⁵ Menik okin thoingkathe.

Ana kwapproingkat keccuk acingki angko ippa ana akka cokkothe c'rapuruk cipin, kwapprokkanthet ul w'rek menik. ⁶ Anakka cingki cokkothe ukuluk cipin, akwapproingkat akwothiat opilingon akin oco'rittako akin thellat ngre cik ana kwipittathekin itti, 'Ngintha akka an-noco'rittakine cene nokkonokki, nthella ngre cik?'

⁷ Ana okin thothianthet pul pen tit itti, 'Pul pella pethet nin ngre.'

Ana kwi'rekathekin itti, 'Ngonon annothoreko ikkwon kin.'

⁸ Anakka cipin capot, apul iponu kopon i'rekat pul ipakatha lon loul iareko itti, 'Akkari ul iorekot aikket kin akucci wore, oku're nci noul iurneo ikkwon antoine ul iorekot nci ngorrot.'

* **20:2** 20.2 Thinar itti akucci iarekako ngngin ca'ri culukku.

⁹ Ana ul ioku'ret ngre ncik acingki cokkothe ukuluk wakkathe ana woccerathe thinar thulukku thulukku kurekkurek. ¹⁰ Ana okkwion thorokit ithorekot nci ngorrot thokat akin ome itti okin akkaaccot akucci woppot noul iurnoreko, anaruk okin thoccerathe thinar thulukku thulukku kurekkurek ammakka okkwion ithurnoreko thoccot. ¹¹ Anakka okin thocceret appik okin thikkatheik akin a'rettakot nopul pokkwon. ¹² Akin i'rekathok itti, 'Ul enni iurnoreko, ana okin thocceret akucci arppithie mpangken pin onin ithorekot ngre ngimmin ana ncingki cippa.'

¹³ Anaruk kwothianthet opilin ntit ntiakin tit itti, 'Pangkin, mpakannokwiethung, orit thaththakanneret itti ngkwareko nthinar thoca'ri culukku? ¹⁴ Oneki akucci wang aeo. Mpongothe itti mpethet pul ipurnoreko ammakka mpethung. ¹⁵ Lon lokithak itti mpakkot lon ila mpongothe nakucci wini? Ngkwipot no're akka mporot noul w'reki?' "

¹⁶ Ittina aIeccuo i'rekat itti, "Okkwion ithokat thoceken thathoka tokit ana okkwion ithokat tokit thathoka thoceken."

*OIeccuo papperet thio thung attang
(Markkoc 10.32-34; Lukka 18.31-34)*

¹⁷ Anakka oIeccuo pokat cik akweo oku'rot noka'ran koUruccelim, kwonekathe ul iammakothok iattul ana ikken ke'ra thocipit, akwi'rekat kin itti, ¹⁸ "Nocikot, oron thaik thaku'rot noka'ran koUruccelim ana ukul wopul iponyi waik wathokettat ul ittittik

woul wonoppa toKapik ana ul iangkene lon lothonce'ret lon cik. Okin thathorukwethok akin akkmakathok nthio ¹⁹ okin thathethok ul iakannoka woIouth akkothok ngure ngngin ana okkwekok akin okkwothok nothapak anaruk noma'ri m'rapuruk kurokietta nti ithio."

*Thipitto thonna poIakup ana poIuanna
(Markkoc 10.35-45)*

²⁰ Ittina apari poCepethi akkakanthet oIeccuo nynyukul nyung anyunye'ra akweekat ungu ncik tokit koIeccuo, akwipittathok itti kwitarothok.

²¹ OIeccuo pipittathok itti, "Ngintha akka ngkwongotho itti mpittarothung ngngin?"

Ana pul pothiatherit itti, "Kirrnni nyukul nyin enyi anyikkoik iccik kang ingili ngang, a'rek thokkun wothothari ana a'rek nthokkun wothokure."

²² AIeccuo i'rekat kin itti, "Onon thomma lon ilanon thaik thipitto, onon thongotho itti nthaccokot thiak itha mpaik pathaccokot nani?"

Akin othiat tit itti, "Ii onin thaccokot thiak."

²³ AIeccuo i'rekat kin itti, "Nthaccokot thiak itha mpaik pothocckot anaruk thikkoik thokkun wothothari win ana thokkun wothokure win, okonnoka oun akkethettot, a'ran enni wonekket-tanthet okkwion itha ongappa pipinthe cik."

²⁴ Anakka opilingon ithattul thoccikothe lon len okin thuathe ka kopangon athuththe'ra.

²⁵ AIeccuo akkarat kin tothun akwi'rekat kin itti, "Onon thina itti nili noul iakonnoka woIouth nonu lon loul wen ikkun ana nili nen inittinittik narekiekin llon len. ²⁶ Lakannoka ianon anaruk okkwi ipongotho itti kwathakka prik kwaka

pul iparekine opangon th'rek. ²⁷ Ana okkwi ipongothe itti kwaka tokit kwonu itti kwaka pul iparekinenon. ²⁸ Ammakka ukul wopul iponyi wakannao itti wathorekakine anaruk waat itti wathorekine opilingon ana manna ethet thikkoik thung othakka itti aelikko ul woppot nti ilon ilokithak.”

*Oleccuo pimmiel ul cik we'ra ii'rimathe
(Markkoc 10.46-52; Lukka 18.35-43)*

²⁹ Anakka oleccuo ana ul iammakothok thoththet noka'ran kAria aul woppot omakathok.

³⁰ Ana ul w'rek wokath cik aikkoik nokuthut kokathar we'ra wi'rimathe, anakka okin thockikothe itti oleccuo paik paththeik, akin ikkat cik akin akkakkaro mpo're itti, “Ili, ukul woThauth, ipi thiak thin.”

³¹ Acungkut coul othirriekat kin cik itti okin thangoik, anaruk okin thikkatheik akin okkot mpo're kannan itti, “Ili, ukul woThauth, ipi thiak thin.”

³² Menik aleccuo oco'rat akwakkarat kin ak-wipittat kin itti, “Nthongothe itti mpakkinthet non ngintha?”

³³ Akin othiat tit itti, “Ili, inthongothe itti onin thimmaik.”

³⁴ Ana oleccuo pipithe thiak then ana kwoth-ntathekin kit ana okin thimmakatheik accokkot ana okin thomakathok.

21

*Oleccuo pi'riko noka'ran koUruccelim
(Markkoc 11.1-11; Lukka 19.28-40; Iuanna
12.12-19)*

¹ Anakka oIeccuo ana ul iammakothok okko ciki iccik koUruccelim okin thakkakathe noka'ran koPeththppaci noco'rong coCeththun, aIeccuo othiät ul we'ra nti iul iammakothok, ² akwi'rekat kin itti, “Ngkonon noka'ran engkrik tokit kon ana amma onon thi'rikot tit, onon thathiot nge'ringka iopari ngi'rikakothoik mpei. Nok'ro annonanin. ³ Ana amma pul p'rek pi'rethenon lon l'rek, anni'rethok itti Ili akki'ret itti onin thathok'ro ana kwathiöt ntan accokkot.”

⁴ Elli lokkattathe othakka itti alon oka icat ila pul pothernte lon loKapik pi'ret ngngin itti,

⁵ “T'rethe ul woIccereil itti,
 'Onokatha ili won waik wainenon,
 woporot cikit ana warrothe te'ringka,
 warrothe te'ringka iotte.’ ”

⁶ Aul iammakothok oingkat akin okkat ammakka oIeccuo pi'rethe kin. ⁷ Okin thonakathe nge'ringka mpei ana ul woku'rupathe eret nan ana oIeccuo parrathe tan akwikkat cik noret ne'ringka iotte. ⁸ Ul woppot woku'rupathe eret cik ikathar ana opilingon ongatho u'ri wokira akin ipot cik ikathar. ⁹ Amungkut moul imeot tokit kung ana okkwion ithomakothoekin mi'rekatho mpo're cattan itti,
 “Athopira noka oka nokkul woThauth.”

“Athethiäetta oka nakkwi ipanthan ngk'ran kolli.”

“Athopira noka oka noKapik tothi'rot.”

¹⁰ Anakka oIeccuo pi'rikot noka'ran koUrucelimum, aul appik wonoka'ran oprttakat tit ana wipittathe itti, "Oththa empi?"

¹¹ Aul iokat cik cungkut othiat tit itti, "Ook oIeccuo pul pothernte lon loKapik ponoka'ran koNaccir noththok poCelil."

OIeccuo paik noppa toKapik

(Markkoc 11.15-19; Lukka 19.45-48; Iuanna 2.13-22)

¹² Menik oIeccuo pi'rikathe noppa toKapik ana kwokiccekathe ul thapat appik iokat cik akette a'rupu ana ionat a'rupu icekerek. Kwongku'rupathe uppu'rung cik ana orrok woul iokat akucitto akucci ana ionat mülökkür icekerek. ¹³ Ana kwi'rekathekin itti, "Lokurrakot itti, 'Man min makkarako itti man ma'rama anaruk onon thothikkiet thukkiet thoul woThu'ran.'"

¹⁴ Aul i'rimathe ana ul iaimitico akkakanthet oIeccuo noppa toKapik akwittiekat kin.

¹⁵ Anaruk akka ul ittittik woul wonoppa toKapik ana ul iangkene lon lothonce'ret lon cik wimmat lon ilokkattathe iloporot ila oIeccuo pokkothe ilaprttakiettot tit ana okin occikot po're ponyukul inyokat cik noppa toKapik anyi're itti, "Athopira noka oka thokkul woThauth," menik okin thukathet ka nolon loIeccuo.

¹⁶ Okin thipittathe oIeccuo itti, "Ngkwocikothet lon ila nyukul nyaik nyerei?"

AIeccuo othianthet kin tit itti, "Ii mpocikothet. Onon thannakkakkaru lon ilaik iatham? Ili're itti,

'Oung Kapik akkongkenet nyukul inyako ana inyarran

lon ilakin thopiranet Kapik noka ngngin.”

¹⁷ Menik kwoththekathe nakin akwoingkat noka'ran koPeththania na kwa'rot.

Oleccuo pattatta pira popic̄it
(*Markkoc 11.12-14, 20-24*)

¹⁸ Ana ingi'rīmak akka oleccuo pokat cik akwopakkot noka'ran koUruccelim, kwokat piamat. ¹⁹ Kwimmakathe pira popic̄it nokuthut kokathar akwoingkat iccik ken itti kwathiththo nyukul nyen akwo'rko anaruk kwakanniat pap'rek nopira ponat natha nulluk. Kwi'rekathē pira itti, “Ngkwakorronno appokwono p'rīn.” Ncīnang apira onthomakat.

²⁰ Anakka ul iammakothok wimmat elli, akin ikkat cik akin oprttakot tit akin ipitto itti, “Pira popic̄it ponthomat accokkot taththa ittina?”

²¹ Aleccuo othīanthet kin tit itti, “Mpi'ret non lon ilaik icat, amma onon thonu thocokot lon loKapik nomik̄it nthella mik̄it me'rarit, onon thakkot lon ammakka lokkattanthet pira. Ana manna amma onon thi'rethe co'rong itti, ‘Ngko arret ka irok irapangka’ ana lakkattat ammakka onon thi'ret. ²² Ana amma onon thocokothē lon loKapik nomik̄it, onon thacco ilanon ipitto ngnga'rama.”

Ul ittittik wonoppān toKapik wipitto ngili ngoIeccuo

(*Markkoc 11.27-33; Lukka 20.1-8*)

²³ OIeccuo pi'rikathe noppa toKapik, anakka kwokat cik akwongkene ul ittittik woul wonoppa toKapik ana ul ittittik woul wakkakanthok, akin ipittathok itti, “Ngkwaik pakkot lon elli nnggili ngiatha? Ana oththa akkethung ngili ngen?”

²⁴ AIeccuo i'rekat kin itti, “Mpipittot non lon lulukku. Amma onon thothinthin tit ana mpi'ret non nnggili ngiatha inga mpaik pakkot lon elli.

²⁵ Mamuthie moLuanna maat ngkartha? Maat ntothi'rori ana amma okorronno oka ntothi'rot noul ionyi?”

Okin thikkatheik akin erettarne akin i're itti, “Amma oron thi'ret itti, 'Ntothi'rot' ana kwipittot ton itti, 'Ngintha akka onon th'rat occikinthok?’

²⁶ Anaruk amma oron thi'ret itti, 'Noul ionyi' oron thonu n're akka ul okkot ton lon l'rek lokithak, akka ul appik wokat ai're itti oLuanna pul pothernte lon loKapik.”

²⁷ Ittina akin othiant het oIeccuo tit itti, “Onin thomma.”

AIeccuo i'rekat kin itti, “Mpakinni'ret non itti nnggili ngiatha inga mpaik pakkot lon elli cakuruk.”

Thokkwie lon kuru ncik thonyukul inye'ra

²⁸ Ana oIeccuo po'rungkwathe nan akwere itti, “Onon thame taththa? Pul p'rek pokat cik ponu nyukul nye'ra inyomura, akwi'rekat ukul irik itti, 'Ukul win, ngko athoreko ikkwon kin komaa inenni.’

²⁹ Aukul othiant hok tit itti, 'Mp'rat,' anaruk papotte aukul apperekat nocikit aprttat lon cik aingkat topon.

³⁰ Aththan oingkanthet ukul wung w'rek akwi'rekat ammakka kwi'rethe worokit, aukul othiat tit itti, 'Pit pin, mpaeo' anaruk wakanno- ingkat.

³¹ Oththa ntiakin aththuththe'ra ipokkothe lon ila aththan pipittothekin itti okin thakkot?"

Akin othiat tit itti, "Okworokit akkokothe."

Aleccuo i'rekat kin itti, "Mpi'ret non ilaik icat itti ul ia'rntinthe nili akucci ana iari iallele nul nakucci, okin thi'riko ingili ngoKapik tokit nanon. ³² Akka oIuanna pomamuthie painet non akwathokenenon kathar ikoco'rotheik ana onon thakannocikothok anaruk ul ia'rntinthe nili akucci ana ul iari iallele nul nakucci akkocikothok. Ana manna onon thimmat lon len, onon thakannopa'rine lon cik itti annocokot lon lung nomikit."

*Thokkwie lon kuru ncik thoul iara
(Markkoc 12.1-12; Lukka 20.9-19)*

³³ "Nocikot lon l'rek lothokkwie lon kuru ncik l'rek, pul p'rek pokat cik pocikkarot kira komaa ikkwon kung ana pu'rakathe nan ana kwokkathe ka'ran na akwathu'rukot ngi'ri ngen ana kunathe cü'rük na pul ikkoik apangwot cik. Akwekat ul w'rek ara tit aikkethok maa nnan imakin thorat amma okin thokiot. Ana kwoingkathe nokurtti. ³⁴ Anakka ca'ri cakko napuththut cothokio, kwothiathe ul iarekinok aine ul iokat cik ara ikkwon atha'rntinthok maa ima kwonu itti kwacco.

³⁵ Ul ia kwappethet kopon itti wara tit wo'rumathe ul iarekinok ana wokkwekathē opilin ana okkwot opilin ana okincot opilin cik mmothok. ³⁶ Ittina akwappothianthet kin

ul iarekinok w'rek woppot ana ul iokat cik ara ikkwon wokkathekin lon ammakka okin thokkinthet p'rak porokit. ³⁷ Ana menik p'rin, kwothiathe ukul wung akwi're itti, 'Okin thathiane ukul win cik.'

³⁸ Manakka akka ul iokat ara ikkon wimmat ukul, okin thikkatheik akin erettarne itti, 'Opei empi ipapakkot notha'rthan thoththan, nanthan urokkwothok aron opakkat notha'rthan thoththan.' ³⁹ Okin thocokathok ana okin thonekathok akin orrekathok nti ikkwon komaa akin okkwathok.

⁴⁰ Amma pul iponu kopon paat, pakkot ul wen ngintha?"

⁴¹ Ana ul ittittik wonoppa toKapik ana ittittik woul othianthok tit itti, "Kwangwo ul iokithak wen ana kwethet ul w'rek kopon komaa ara tit iethok maa noca'ri cothiththo."

⁴² Aleccuo i'rekat kin itti, "Onon thakanakkakaro lon ilaik iatham woKapik? Ili're itti, 'Pothok ipa ul iuno w'rat nti ipangken

pothakkakathe cillang icace'ret kunthong tan,

Ili Kapik akkokkothe elli ana loprttakietheron tit.'

⁴³ Ittina mpi'ret non itti ngili ngoKapik nganekittat non ana ngettat ul iaccikot lon lung ana okkot lon ila Kapik kongothe itti okin thakkot. ⁴⁴ Okkwi ip'rat lon lin kwikkoik ere ul iapukkot nopathok apocottakat, ana okkwi ipa pothok papothe nan kwakak'arakot cik."

⁴⁵ Anakka ul ittittik woul wonoppa toKapik ana ul woPriccin woccikothe lon lothokkwie lon

kuru ncik loIeccuo, okin thinakathe itti kwaik peret kin. ⁴⁶ Okin thaththongothe itti okin thaccokothok anaruk okin thonat n're nocungkut coul akka ul wonat lon nomikit itti oIeccuo pul pothernte lon loKapik.

22

Thokkwie lon kuru ncik thokamuthe kothipa (Lukka 14.15-24)

¹ OIeccuo pappi'rekat kin lon nthokkwie lon kuru ncik itti, ² "Ngili ngorothi'rot ngungkot ere ili iokkinthet opei kamuthe kothipa. ³ Kwothiäthe ul iarekinok athakkakkaru ul iokat wakkarakot itti wanthan ithipa anaruk w'rakathe anthan.

⁴ Ittina akwappothiat ul wung w'rek iarekinok akwi'rekat kin itti, 'Ni'ret ul iokat wakkarakot itti anthan accokkot akka mpokkothe thu'rit thokamuthe p'rïn. Mpongwot kie ana nyumpu'rung inyittittathe ana mpokuccethe a'rupu cik appik.'

⁵ Anaruk ul iokat wakkarakot itti waine kamuthe wakannocikat lon loul iarekinok ia kwappothiothe ana wopettakatheik, opilin peot topon kung ana opilin poinet ngre ngung. ⁶ Ana opilingon thoccicokathe ul iarekine ili akin okkwekat kin akin ongwat kin. ⁷ Ana ili wuakathe ka ana wothiäthe ul wung irro ana wongwathe ul iongwot ul iarekinok ana ok're ka'ran ken.

⁸ Ana kwi'rekathē ul iarekinok itti, 'Thu'rit thokamuthe thokkattathe anaruk okkwion ithakkarakothe thakannekko nan itti okin thakkattanthet lon loporot. ⁹ Ngkonon iathar appik annakkakarō ul ianon thiothe iathar

anathan nokamuthe.’ ¹⁰ Ittina ul iarekinok woingkathe iathar ana okin tha'rntathe ul iokithak ana ioporot iakin thiothe ana kamuthe koppakathe nnul iakin thakkarot nti iathar.

¹¹ Anaruk akka ili waat itti wathokatha ul iakkarakot, wimmakathe pul p'rek iopocura pakannako eret wokamuthe kothipa.

¹² Kwi'rekathe pul pen itti, 'Puruko pin, ngkwaat cene taththa angkwakannako eret wokamuthe kothipa?' Anaruk pul pen pakanni'rekat lon l'rek.

¹³ Ittina aili i'rekat ul iarekinok itti, 'Ni'rikikkok nyaun ana tacok annorrethok thapat i'rimak na ul oot ana ok'rellot kinyit thocipit.'

¹⁴ Akka ul woppot wakkarakat anaruk wotteik iumunta ntit ai'riko ingili ngoKapik.”

*Thethet oKkaiccer akucchi wotha'rntot
(Markkoc 12.13-17; Lukka 20.20-26)*

¹⁵ Ittina aul woPriccin urokat anekkekat lon cik ilakin othipinthe oIeccuo cik akin i'rak ngngin.

¹⁶ Akin othiat ul iammakot kin ana ul iongothe lon loIruthuc akin othi'ret oIeccuo itti, “Pul ipangkene, onin thina itti oung pul ipi're lon ilaik icat ana ngkwangkene lon ilaik icat ammakka Kapik kongothe. Ana ngkwakannopellene lon loul ilakin thaik therethung ngngin akka ngk-wella kit ken ana ngkwakannokkwine ul kunu ncik itti okin okkwengon. ¹⁷ Anti'ret nin itti ngkwi're kaththa? Loco'rotheik itti oKkaiccer pa'rntakinthe akucchi, lakannoco'rot ciki?”

¹⁸ Anaruk oIeccuo pinakathe lon len ilokithak ilakin thonat ima itti okin thi'rak, akwi'rekat

kin itti, “Onon ithongothe itti nthinnikot lon, nthongothe itti nthi'ran llon akaintha?
¹⁹ Nantokenen thinar itha'rntakinthet nili ithanon thaik tha'rntinthet oKkaiccer.” Okin thonakanthok thinar,* ²⁰ ana kwipittathekin itti, “Purru poththa empi? Ana k'ran koththa engki ikokurrakot nan?”

²¹ Akin othiat tit itti, “PoKkaiccer.”

Akwi'rekat kin itti, “Nethet oKkaiccer a'rupu woKkaiccer ana annethet Kapik a'rupu woKapik.”

²² Manakka okin thocckithe lon elli, akin oprttakat tit. Ana okin thoththekathe naak akin oingkat.

Thuroko nti ithio

(Markkoc 12.18-27; Lukka 20.27-40)

²³ Ana ca'ri cen aul woCathukkin iokat ame itti thuroko nti ithio thella akkakanthet oIeccuo nthipitto. ²⁴ Akin ipittathok itti, “Pul ipangkene, oMucca pi'ret itti amma pul piot nopari appella nyukul ana opang papakkot nan akwokwoninok nyukul. ²⁵ Ul w'rek wokat cik iccik kin we're'rapuruk wonu oththan pulukku ana onnan pulukku pul porokit pipot apiat appella nyukul, pul porokit popakkathe nan ana piathe appella nyukul cik ana poththekanthet opang nopari. ²⁶ Pul pikkatheik apillillie e're mono athakkakat we're'rapuruk. ²⁷ Pul ipopari piathe cakuruk. ²⁸ Anti'ret nin, pul ipopari paka pari poththa ntiakin ithe're'rapuruk

* **22:19** 22.19 Pul pulukku panekket kakucci kotha'rntot ikoccot k'ran itti thinar ithekkot nakucci iarekako ngngin ca'ri culukku.

22:24 22.24 Thethinia 25.5-6

noca'ri cothuroko nti ithio akka okin appik thopakkukkothe nan?"

²⁹ Oieccuo pothianthet kin tit itti, "Onon thommaik akka onon thomma lon ila atham woKapik waik weret ana manna pu'ran poKapik. ³⁰ Noca'ri cothuroko nti ithio ul wakinnipo ana wakinnitta, ittina okin thaka ere u'rupa wothothilettat woKapik tothi'rot.

³¹ Anaruk theret lon lothuroko nti ithio, onon thakannakkakaro lon ilaik iatham, ila Kapik ki'rethenoni? ³² Ili're itti, 'Oun Kapik kaPrein ana Kapik koIccaak ana Kapik koIakup.' Kakannoka Kapik koul iokat willet anaruk Kapik koul iaik ngkit thapat."

³³ Manakka ul woccikothe lon elli woprt-takatherit nothongkene thung.

*Lon ilrik nti ilon lothonce'ret lon cik
(Markkoc 12.28-34; Lukka 10.25-28)*

³⁴ Anakka ul woPriccin woccikothe itti oieccuo pangkiet ul woCcathukkin cik akin a'rantakat tothun. ³⁵ Apilin ntiakin ipangkene lon lothonce'ret lon cik ipittat oieccuo lon nthenekkek itti, ³⁶ "Pul ipangkene, lon liatha ilrik nti ilon lothonce'ret lon cik ila Kapik kethet oMucca?"

³⁷ Oieccuo pothiatherit itti, " 'Ongathe Ili Kapik kang nci nocikit cang appik ana ngka kang appik ana ngngathe're ngang appik.' ³⁸ Elli akkocittokit ana ilen akkrik nti ipangken. ³⁹ Ana ile'ra lammakka lorokit itti, 'Ongathe ul w'rek ammakka ngkwongothe ka kang.' ⁴⁰ Lon

22:32 22.32 Thoppot thapat 3.6

22:37 22.37 Thethinia 6.5

22:39 22.39 Lauin 19.18

lothonce'ret lon cik appik ilaik ana ila aul woth-
ernte lon loKapik weret, laku'retta ncik nolon elli
ile'ra."

OMiccie ukul woththa?

(Markkoc 12.35-37; Lukka 20.41-44)

⁴¹ Anakka ul woPriccin wa'rntakothe tothun
oIeccuo pipittathekin itti, ⁴² "Onon thi're itti
oMiccie oththa? Ook ukul woththa?"

Akin othiat tit itti, "Ook ukul woThauth."

⁴³ Kwi'rekathekin itti, "Ana tat akka oThauth
ipaik pere ngKanang koKapik akwakkarok itti
'Ili'? Akka kwi'ret itti,

⁴⁴ 'Ili Kapik wi'rethe Ili win itti,

Ikkik thokkun win wothothari
puccuk analkanthung tho'rak thang.'

⁴⁵ OThauth pakkarot oMiccie itti, 'Ili win' ana
tat akka akwoka ukul wung?"

⁴⁶ Pul pellakathe ipothinthok tit, nci cĭnang pul
pellakathe ipappripittathok lon l'rek akka okin
thonat n're itti okin thappipitto.

23

*OIeccuo paruket ul iangkene lon lothonce'ret
lon cik ana ul woPriccin*

(Markkoc 12.38-39; Lukka 11.43, 46; 20.45-46)

¹ Ittina oIeccuo pi'rekathe cungkut coul ana ul
iammakothok itti, ² "Ul iangkene lon lothonce'ret
lon cik loMucca ana ul woPriccin wikkot cik
noprrok poMucca akin ongekene lon lothonce'ret
lon cik. ³ Ittina onon thonu itti onon thaccikot
kin ana okkot lon appik ilakin i'ret non itti
onon thakkot. Anaruk nokorronno okkot ilakin

okkot akka okin thakonnokkot ilakin thongkenet.
⁴ Okin thakkiet ul lon limin akin antollo ntit akin okorronno ittarot kin.

⁵ Lon ilakin okkot appik lakin okkinthet ul othakka itti aimma. Okin nthakkwekot nyamenthuk nye'ra nyittittik ang'rek thokkun wothokure ana ang'rek nocuthu. Nyamenthuk nyen nyonu lon tit loKapik. Ana okin thako ere wukwirukwit alokene itti okin thotha'rane Kapik nga'rama.

⁶ Okin thongothe a'ran wothothiakine cik na ul ittittik ikkoik nokamuthe ana okin thongothe itti okin thikkoik na'ran ioporot nomuththun ma'rama. ⁷ Okin thongothe itti okin thamiccako keccuk ana okin thongothe itti ul wakkaro kin itti, 'ul iangkene.'

⁸ Anaruk onon thonu itti onon thakannokorronno pul apakkaronon itti, 'Pul ipangkene' akka onon thonu pul ipangkene pon pulukku ana onon appik thulukku. ⁹ Ana onon thakanakkaro pul p'rek nocapu itti, 'Ngappa' akka onon thonu oththe pon pulukku ana kwaik tothi'rot. ¹⁰ Manna nokorronno okorronno opilin itti kwakkaro non itti, 'Ili' akka onon thonu Ili won wulukku ana ook oMiccie. ¹¹ Ana okkwi iprik ntianon paka pul ipittarot opilingon. ¹² Akka okkwi ipathikkie ka kung prik, kwathikkietta potte ana okkwi ipathikkie ka kung potte kwathikkietta prik.

¹³ Angkre, ul iangkene lon lothonce'ret lon cik ana ul woPriccin, onon ithongothe itti nthinnikot lon. Onon thullukkwinthet ul kathat kongili ngorothi'rot. Onon ngka kon thakanni'riko

manna tit ana onon thakannokorronno itti ul wi'rikorit. ¹⁴ [Angkre, nanon onon ul iangkene lon lothonce'ret lon cik ana onon ul woPriccin, onon ithongothe itti nthinnikot lon. Onon tham-mikkot muruma annonneko kaman ken. Ana nti ilon elli thakkammako thon thaka thokithak kannan.]

¹⁵ Angkre, ul iangkene lon lothonce'ret lon cik ana ul woPriccin, onon ithongothe itti nthinnikot lon. Onon thanyarō nomothok appik ana manna aurrot tok irapangka cik othakka itti anniot opilin akwomakot thongkene thon. Ana amma kwothakkat pon, onon thathikkiek ukul wothothir̄in kannan nanon.

¹⁶ Angkre, onon nili inaik nitte ul anaruk onon thomma kathar, akka onon thi're itti, 'Amma okkwi parrmat ngk'ran konoppā toKapik, thar-rma thung thella lon cik anaruk okkwi iparrmat nthaap thonoppā toKapik, kwonu itti kwac-cot kit notharrma thung.' ¹⁷ Onon thomma kathar nthommaik, liatha akkr̄ik, thaap thonoppā toKapiki? Noppā toKapik irakarranno thaap thonoppā toKapik athoka thupupurei?

¹⁸ Ana onon thi'ret cakuruk itti, 'Okkwi iparrmat ntu'rot ta'rupu wothokiot ngüccük cik ana lon len lella lon cik, anaruk okkwi iparrma na'rupu iaik nan, kwonu itti kwaccot kit notharrma thung.' ¹⁹ Onon ul iomma kathar, liatha akkr̄ik, a'rupu wothethet nuthuki? Tu'rot toKapik ikathikkie thethet nuthuk thupupurei? ²⁰ Ittina okkwi iparrma ntu'rot ta'rupu wothokiot ngüccük cik, kwarrmat ngngin ana kwarrmat

na'rupu iaik nan appik. ²¹ Ana okkwi iparrma ntupan toKapik, kwarrmat ngngin ana kwarrmat ngKapik ikaik tit. ²² Ana okkwi iparrma ngk'ran korothi'rot, kwaik parrma mporrok poKapik ana kwarrmat ngKapik ikaik kikkoik nan.

²³ Angkre, ul iangkene lon lothonce'ret lon cik ana ul woPriccin, onon ithongothe itti nthin-nikot lon, onon thethet Kapik a'rupu wuluwuluk na'rupu kurekkurek iattul attul appik ana a'rupu iakkattat ngucul. Anaruk thopa'rinet lon cik iloporot kannan lothonce'ret lon cik ana lothokkot lon ngkathar koko'rotheik, ana lon lothiak ana ntho'rumo nolon. Onon thira thareko llon iloporot okorronno opa'rine al'rek cik. ²⁴ Onon ithitte ul anon thomma kathar, onon thaccot kit na'rupu iottotteik wolon lothonce'ret lon cik annokorronno a'rupu ionu itti waccakot wolon lothonce'ret lon cik. Ana manna anon thomma lon ilanon thaik thakkot.

²⁵ Angkre, ul iangkene lon lothonce'ret lon cik ana ul woPriccin, onon ithongothe itti nthinnikot lon. Onon tho'rillir ere eththe'ret ana maththak imamenta nthoccul anaruk amo'rungskot monyi nti ikarak. ²⁶ Pul poPriccin ipomma kathar, ime eththe'ret ana maththak nti icarak ana nthaka tho'rillir nthapat cakuruk.

²⁷ Angkre, ul iangkene lon lothonce'ret lon cik ana ul woPriccin, onon ithongothe itti nthinnikot lon. Onon thammakka nupu inokkattanthe cik nopeththere nthapat anaruk nti icarak than annoppathe mummian mouillet ana ka ikokuttat. ²⁸ Onon thammakka menik, ul wakathac-cenon nthapat antho'rillir ere ul iakkot lon

loporot anaruk nti icarak than, onon thongothe itti nthinnikot lon ana nthonu lon ilokithak.

²⁹ Angkre, ul iangkene lon lothonce'ret lon cik ana ul woPriccin, onon ithongothe itti nthinnikot lon, onon thunine ul wothernte lon loKapik ana ul iokat woporot tokit koKapik illet ma'rot nonupu preththere ana okkot thire nan ipreththere cakuruk. ³⁰ Anon i're itti, 'Amma onin thappokat cik noma'ri ima thiki thin thokat cik nan, onin thakorronno ongwot ul wothernte lon loKapik inaththungon.' ³¹ Ittina onon thaik theret ka kon itti onon thiki thoul iongwot ul wothernte lon loKapik. ³² Ittina no'rungkot nothokkot lon ilokithak annomartto lon ilokithak ila thiki thon itheot thoku'ret ncik.

³³ Inyil ana nyukul nyoinyil, onon thalukkwot thakkmake tothothirin taththa? ³⁴ Ittina mpaik pathinthe non ul wothernte lon loKapik ana ul w'rek inaik ntime ana ul iangkene. Opilingon thanon ongwo ana okkwet nothapak ana opilingon thanon okkwet nomuththun ma'rama ana opilingon thanon okicce noka'ran ana annommakot kin na'ran nakin thollothe. ³⁵ Ana ittina nguccuk ngoul illet appik ipoporot tokit koKapik nocapu ngapot nanon, oku're ncik nouccuk ngApil ipoporot tokit koKapik oingkanthet oCekkeria ukul woParakia ook ipa nthokkwothe itho'rkut thonoppa toKapik ana toru'rot tothokinthe Kapik a'rupu wouccuk cik. ³⁶ Mpi'ret non ilaik icat, elli appik lapot noul iaik inenni."

*Oieccuo pipo thiak thoul woUruccelim
(Lukka 13.34–35)*

³⁷ “Uruccelim, Uruccelim, onon ithaik thangwo ul wothernte lon loKapik ana okinco okkwion ithothilanthet non. Mpokat pongothe ma'ri moppot itti mpa'rntot nyukul nyon tothun ammakka thak'ruk a'rntot opeon iu'ruccu anaruk onon thakannangkot. ³⁸ Ana inenni man moṇ moththettat nan mokittakot. ³⁹ Akka mpi'rethenon itti, onon thakorronno appimman attang puccuk annomekat itti, ‘Athethie oka nakkwi ipaik panthan ngk'ran kolli.’”

24

*Oieccuo peret thokittako thonoppa toKapik
(Markkoc 13.1–2; Lukka 21.5–6)*

¹ Oieccuo pokat poththet noka'ran konoppa toKapik akwikkat cik akweo, aul iammakothok akkakanthok ai'rekathok itti, “Antokatha kaman engki akka kuntat.”

² Aieccuo ipittat kin itti, “Onon thimmat a'rupu enni appiki? Mpi'ret non lon ilaik icat itti pothok pella pulukku pakwentako nopangken, müntat nocapu mulumuluk appik.”

*A'rupu iakaik aieccuo parthuk okkaprttako
(Markkoc 13.3–13; Lukka 21.7–19)*

³ Anakka oieccuo pokat cik akwikkoik noco'rong coCeththun, ul iammakothok wakkakanthok pellek akin i'rekat itti, “I'rethenin itti lon elli lakaik acintha ana lon liatha ilakene itti ngkwaik pao ana thocothakot tholuput?”

⁴ OIeccuo pothianthet kin tit itti, “No'rumoik akka pul p'rek ammikkot non. ⁵ Akka ul woppot wanthan ngk'ran kin ai're itti, ‘Oun oMiccie,’ ana wammikkot ul woppot. ⁶ Onon thaccikot lon lotho'rak ana po're potho'rak, anaruk anokorronno opelle. Lon ila ammakka elli lonu itti lakaik anaruk okorronno oka itti thocothakot p'r'in. ⁷ Ul nomo'rong appik waprttakarot tit ana ngili ngaprttakarot tit. Ti takaik ana capu ca'rintittako ncik na'ran woppot. ⁸ Lon elli appik laka ere amma ukul ok'rello pul ipaik pakwono. Lon elli appik lakene itti lon ilaik lanthan lantruco ncik.

⁹ Ca'ri cen onon thanekittane nili annothocokiettat thiak ana ongutta, ana ul nomo'rong appik w'ra non nti ilon lin. ¹⁰ Ana noca'ri cen ul woppot wacottako nti ithocokot tholon loKapik nomikit ana okin thakettetto ana 'raro kinyit ken. ¹¹ Ana ul woppot wummot ncik wothernte lon loKapik ngkarra ana okin thamikkot ul woppot. ¹² Ana lon lulluk ilokithak akka appat cik ana lakorronno thongarot thoul woppot athintat cik nnomikit. ¹³ Anaruk okkwi ipoccoke the cikit ilon puccuk mono alocothakat, kwa'rettat. ¹⁴ Ana lon elli iloporot longili langkenetta capu ncik appik aloka itti loccikako the ncik appik noul appik ittina athocothakot antao.”

Thocokot thiak

(Markkoc 13.14-23; Lukka 21.20-24)

¹⁵ “Ittina amma onon thimmat lon ilokithak ilakittoik noppa toKapik irupupure ila pul

pothernte lon loKapik oThaniel perethe. Apul ipakkakkaro ina lon len. ¹⁶ Ittina okkwion ithaik noththok poIouthia akin ollot to'ra womo'rong. ¹⁷ Ana amma okkwi ipaik to'ra woman akwokorronno i're itti kwarpot cik ntan itti kwothummo pap'rek nnoipan.* ¹⁸ Ana okkwi ipaik topon akwokorronno opakot tuan itti kwathummo kret kothoku'rupakot. ¹⁹ Lon laka laraththa noul ioppeppetthe ana noul iakie nyukul noma'ri men. ²⁰ Na'rane Kapik nga'rama othakka itti alon len okorronno oka icpo ana manna noca'ri caCcepith. ²¹ Akka ul wathocokot thiak cannan noca'ri cen. Okin thaccokot thiak kannan nothocokot thiak ithakin thocokothe ammakka pothok poku'rettat ncik manna inenni, ana thocokot thiak thella p'rin.

²² Ana amma Kapik kakorronno orpet ma'ri men cik mothocokot thiak, pul pella ipakkoik anaruk nti ilon loul ia Kapik kakkarot kworpet ma'ri men cik. ²³ Ana noca'ri cen amma opilin pi'rethenon itti, 'Okatha oMiccie pei' ana manna itti, 'Okkwe're ceneket' nokorronno occikot lon len. ²⁴ Akka ul wanthan ii're itti okin oMiccie ngkarra ana ul wothernte lon loKapik ngkarra akkot lon ilommaththik akin ammikkot ul ngngin ana akin ammikkot manna ul ia Kapik kakkarot amma okin akkiothe kathar ikakin ammikkot kin ngngin. ²⁵ Mpi'rethenon aca'ri cen carthuk anthan. ²⁶ Ittina amma opilin pi'rethenon itti, 'Kwaik ithampang,' nokorronno eo than ana manna itti, 'Kwei nnoipan' nokorronno occokot

* **24:17** 24.17 Kaman ken kokat kamuang nto'ra ana ul wokat cik araiot a'rupu tan anthoma ana icat tan.

lon len nomik̄it. ²⁷ Akka thao thokkul wopul iponyi thimmako ere k'ran kothule'rak amma tholliot nci na acingki ummot ngngin ak'ran ken oingkat ci na acingki orungkwot. ²⁸ Na nengki a'rntakot pap'rek paik than piot." Kwi'ret elli akwokene itti thao thung thinako nan.

Thao thokkul wopul iponyi
(*Markkoc 13.24-27; Lukka 21.25-28*)

²⁹ "Ana amma ma'ri mothocokot thiak men mocothakothe,
'Ngĩ'rimak nga'roik
ana kwanok kakannupuka
ana mothot mapukkwo ntothi'rot
ana a'rupu worothi'rot wa'rĩntittako ncik appik.'

³⁰ Noca'ri cen alon ilakene itti ukul wopul iponyi waik wanthan lummot ncik tothi'rot ana ul wonocapu appik woo. Okin thimma ukul wopul iponyi anthan nonuththe tothi'rot mpu'ran ana nthrik. ³¹ Ana kwathīot u'rupa wothothilettat wung mpo're pothipil cittan akkaro ana a'rntot okkwion ithakkarakot nno-capu ncik appik."

Thongkene thopira popic̄it
(*Markkoc 13.28-31; Lukka 21.29-33*)

³² "Nina lon elli lothokkwie lon kuru ncik lopira popic̄it, amma natha nopira popic̄it iat ana anocokka, onon thina itti karran kakko napuththut. ³³ Ittina amma onon thimmat lon len appik, nina nan itti ca'ri coIeccuo cakko

napuththut akwokkaprttako. ³⁴ Mpi'ret non lon ilaik icat itti, lon elli lakkattat appik aul enni inenni warthuk ille. ³⁵ Tothi'rot ana capu thintat cik anaruk lon lin lakorronno intat cik aththik.”

Okuccekotheik

(Markkoc 13.32-37; Lukka 17.26-30, 34-36)

³⁶ “Pul pella ipina lon loca'ri manna cingki, manna u'rupa wothothilettat woKapik tothi'rot manna ukul ngka kung anaruk ongappa pul-luk akkina. ³⁷ Ammakka lokat noca'ri coNua, ittina laka menik cakuruk amma ukul wopul iponyi ao. ³⁸ Noma'ri akka ngike ngarthuk ao, ul wokat cik a'rkoik ana ittetto mono aNua i'rikat ikuppu'rung konoi'ri. ³⁹ Okin thaththommat itti ngimpen akkakaik puccuk mono aike akkakat aipat kin appik. Laka ittina amma ukul wopul iponyi ao. ⁴⁰ Ittina ul wakaik we'ra ikkwon areko, opilin panekitta akin oka akin aththe'ra, apilin oththetta nan. ⁴¹ Ul iari wakaik we'ra wakako nocana, opilin panekitta akin oka aththe'ra, apilin oththetta nan.

⁴² Ittina noccot kit cik akka onon thomma ca'ri ica Ili won ao nan. ⁴³ Nina nan itti amma pul poruan pappina ca'ri ica pul pothu'ran ao nan ngko'ra, kwangwot cik ana kwakorronno okorronno itti pul pothu'ran itti pamunyethok a'rupu noppa. ⁴⁴ Menik onon thonu itti onon thokuccekot cik akka ukul wopul iponyi wanthan noca'ri icanon thomma itti waik wanthan nan.”

Pul ipareko ipoporot

(Lukka 12.41-48)

⁴⁵ “Amma pul paik ipareko ipoccekothe lon nocikit ana pinaik ook pen ipa opit ethet lon

ikkun loul iareko tuan thanung. Kwikket ul woruan thu'rit noca'ri icekkot nan. ⁴⁶ Laka loporot nopul pen amma opit pokkaprttakot nti imakkren akwathiothok akwokkot ngre papenang. ⁴⁷ Mpi'ret non lon ilaik icat itti kwethok lon ikkun la'rupu wung appik. ⁴⁸ Anaruk amma pul ipareko pokithak ana pi'ret ka kung itti, 'Opit pin paccoik,' ⁴⁹ ana akwikkoik akwokkwe ul ia kwonu lon len ikkun iareko ana akwo'rkoik ana ikko ngapak okin okkwion itha ngapak ngaik ngakkwot. ⁵⁰ Opit pung pao noca'ri ica pul iparekinok pomma itti kwaik pao nan. ⁵¹ Kwakkiethok thiak kannan ana kwathiothok iul iongothe itti winnnikot lon nakin oot ana ok'rellot kinyit thocipit."

25

Thokkwie lon kuru ncik thonyukul inyoire inyattul

¹ OIeccuo po'rungkathe nolon akwere akwi're itti, "Ana noca'ri cen ngili ngorothis'rot ngaka ere nyukul inyoire inyattul, nyonekot mu'ru imonu ngaak iacco anyoingkat thapat anyothocurot ipul ipipo. ² Ana nyukul ukuluk ntiakin nyokat nyommat cik nti ima ana ukuluk ntiakin nyokat nyinaik nti ima. ³ Okin ithommaik thonekathe mu'ru maak iacco tulluk akin okorronno oneko ngaak ng'rek arttot nan mmu'ru m'rek. ⁴ Ana okin ithinaik thonekathe ngaak iacco prek mmu'ru m'rek. ⁵ Ana pul ipipo poccatheik kannan ana okin appik thokinyakathe mono oingkat inthe.

⁶ Ana thampang thongk'ra, apul p'rek i'rekat mpo're cittan itti, 'Pul ipipo pei paat nothocurot iaak.'

⁷ Ana nyukul inyari nyurokathe appik ana nyokuccekathe mu'ru imonu ngaak iaccorit othakka itti amocco preththere. ⁸ Ana okin ithommaik thi'rekathe okkwion ithinaik itti, 'Nethet nin ngaak iacco ngotte akka mu'ru imonu ngaak iacco maik mille lik nan.'

⁹ Akin othianthet kin tit itti, 'Aa, ngaak ianin thonu ngannekko nanin ana onon thaeo noul iakette ngaak annothokerine ka kon.'

¹⁰ Anaruk akka okin thokat cik ikathar akin othokero ngaak, apul ipipo akkakat. Anyukul ukuluk inyoire inyokat nyokuccekotheik i'rikat akin aththut ikamuthe kothipa. Ana kathat kulukkwashe.

¹¹ Ittina papotteik anyukul inyommaik akkakat cakuruk anyakkarat itti, 'Pit pin, pit pin, anyinet nin kathat.'

¹² Anaruk pul ipipo pi'rekathekin itti, 'Mpi'ret non ilaik icat, mpomma non.' "

¹³ Menik aIeccuo i'rekat itti, "No'rumoik akka onon thomma ca'ri ana manna cingki ica anao nan."

*Thokkwe lon kuru ncik thoul iareko i'rapuruk
(Lukka 19.11-27)*

¹⁴ "Ana attang ngili ngorothis'rot ngungkwot ere pul ipaik paeo imakkren ciththan, apakkarat ul wung iarekinok akwikkekat kin a'rupu wung

akin angwot akkwella. ¹⁵ Ana kwekathe okkukku akucci na'ruk ukuluk* ana opilin akucci na'ruk we'ra ana opilin akucci ngka'ruk kulukku Kwikkethekin a'ruk kurekkurek iakin thekkot nan itti okin thangwot akka kwinat kin papenang, akwoingkat nokurtti kung. ¹⁶ Ana pul ipoccot akucci na'ruk ukuluk poingkathe cokocokot ana kworekiekathe akucci wung ana kwiathe akucci arttot nan a'ruk ukuluk. ¹⁷ Ittina cakuruk okkwi ipoccot akucci a'ruk we'ra poingkathe ana kworekiekathe ana kwiathe a'ruk we'ra arttot nan. ¹⁸ Anaruk okkwi ipoccot ka'ruk kulukku poingkathe ana kwaththipat tupu ana kwocikkathe akucci wopit pung tit akwangwot.

¹⁹ Anakka opit pen pikkot cik than puccuk, kwokkaprttakathe ntan akwipittat kin itti okin thakenek itti okin thokkothe ngimpen nakucci wung. ²⁰ Pul ipappoccot akucci na'ruk ukuluk ponakathe akucci na'ruk ukuluk arttot nan. Ana kwi'rekathē opit itti, 'Pit pin, ngkwethin akucci na'ruk ukuluk, ana mporekiet ana mpiothe a'ruk ukuluk arttot nan.'

²¹ Ana opit pothianthok tit itti, 'Ngkwokkothe lon loporot, oung pul ipareko ipoporot ana ipa'rumo nolon. Ngkwo'rumot nolon la'rupu wotteik, mpethung lon la'rupu woppot ikkun. A'rik athopira noka nopit pang.'

²² Apul ipoccot akucci a'ruk we'ra akkakat cakuruk ana kwi'rekathē opit itti, 'Pit pin, ngkwethin akucci a'ruk we'ra ana mporekiet ana mpiothe a'ruk we'ra arttot nan.'

* **25:15** 25.15 Ka'ruk kulukku kaneko akucci warekako ngngin luput attul ana ikken ukuluk (15).

²³ Apit othianthok tit itti, 'Ngkwokkothe lon loporot, oung pul ipareko ipoporot ana ipa'rumo nolon. Ngkwo'rumot nolon la'rupu wotteik, mpethung lon la'rupu ikkun woppot. A'rik athopira noka nopit pang.'

²⁴ Menik apul ipoccot akucci ka'ruk kulukku akkakat akwi'rekat itti, 'Pit pin, mpina kicce itti ngkwomma'ron, ngkwakio kopon ika ngkwakannee ana ngkwakkuttot mil ima ngkwakannora. ²⁵ Ittina mpokat ponat n're ana mpamu'ruttathe ka'ruk kakucci ika ngkwethin ippu. Katha, ka'ruk kang kei.'

²⁶ Apit othiat tit itti, 'Oung pul ipareko ipomangka ana iponu ngore, ngkwina itti mpakio kopon ika mpakannee ana mpakkuttot mil ima mpakannora. ²⁷ Ngkwira pethet opilingon akucci akin orekie othakka itti amma mpokkaprttakot ntan anathocco akucci awarttakothe nan.'

²⁸ Akwi'rekat pul iparekinok p'rek poka itti, 'Onekothok ka'ruk kakucci, ethet okkwi iponu akucci a'ruk attul. ²⁹ Akka okkwi iponu pap'rek kwarttakinthet nan ana okkwi iponu a'rupu wotteik, kwanekittat manna ia kwonat wotte. ³⁰ Norret pul ipareko empi thapat i'rimak ipella lon cik na akwoot ana ok'rellot kinyit thocipit.' "

Ca'ri cothakkmako

³¹ "Amma ukul wopul iponyi anthan nthrik thung ana nu'rupa wothothilettat woKapik appik, ana kwikkoik noprrok pothrik thung pothakkma. ³² Ana ul wonocapu appik wa'rntakot tokit kung ana kwapetto iul karkko

pul ipu're opetto lungkat nti ilicok. ³³ Kwipot lungkat thokkun wothothari ana licok thokkun wothokure.

³⁴ Menik Ili wi'ret okkwion ithaik thokkun wothothari itti, 'Nanthan, onon itha angappa pin pethiet, nathopakkot nongili ionekkettan-thet non cik nci ma'rot akka capu coku'rettat ncik appik. ³⁵ Akka mpokat piamat ana onon thethin a'rupu w'rek ampo'rkot, ana pica pap-pokkwothin ana onon thethin ng'ri ampikkot, ana mpokat pakwat ana onon thikkierin cik. ³⁶ Mpokat cunthut ana onon thakierin eret, ana mpokat pongo ana onon thokathat lon lin, ana mpokat ikorrkkor ana onon thaththokatha naun.'

³⁷ Ana ul ioporot tokit koKapik wathinthok tit itti, 'Ili, inthiothung kartha angkwiamat anin ekathung thu'rit, ana manna onin thiothung kartha apica pokkwothung inekathung ng'ri aikkat? ³⁸ Ana onin thiothung kartha angkwakwat inikkiekathung cik ana manna angkwacunthut inakiekathung eret? ³⁹ Ana onin thiothung acintha angkwongo ana manna angkwaik ikorrkkor anin athokathakat naung?'

⁴⁰ Ili wathinthet kin tit itti, 'Mpi'ret non ilaik icat itti, ilanon thokkinthet opilin p'rek ipotte ipammakothin, onon thokkinthin.'

⁴¹ Ittina kwi'ret okkwion ithaik thokkun wothokure itti, 'Nopa'roik nti iccik kin ngonon ithik thothupuththuput, onon ithattattakot nthok'ro nthik thothupuththuput ithonekkettan-thet pul pothopulut cik ana u'rupa wothothilettat wung. ⁴² Akka mpokat

piamat ana onon thakannethin pap'rek ano'rko, ana mpokat papica pokkwothe ana onon thakannethin ng'ri anikko, ⁴³ mpokat pakwat ana onon thakannikkien cik, mpokat cunthut ana onon thakannakien eret, ana mpokat pongo ana onon thakannokatha naun, ana mpokat ikorrkkor ana onon thakannokatha lon lin.'

⁴⁴ Okin then thathiöt tit itti, 'Ili, onin thiothung kartha angkwiamat ana manna apica pokkwothung ana manna angkwakwat ana manna angkwacunthut ana manna angkwongo ana manna angkwaik ikorrkkor ana onin thakannittarothung?'

⁴⁵ Ana Ili wathiöt tit itti, 'Mpi'ret non ilaik icat itti ilanon thakannokkinthet okkwi ipotte nti iapangkingon enthi, onon thakannokkinthin.'

⁴⁶ Ittina okin thaine thakkmako thothupuththuput anaruk okkwion ithoporot tokit koKapik thaeo ithikkoik thothupuththuput."

26

Lon lothokkwot oIeccuo
(*Markkoc 14.1-2; Lukka 22.1-2; Iuanna 11.45-53*)

¹ Anakka oIeccuo pomarttot there lon len appik, kwi'rekathe ul iammakothok itti, ² "Onon thina itti noma'ri me'ra kamuthe koThaurrot kaman k'rek cik kuroko ncik ana ukul wopul iponyi wathettat ul ikkun akkuttakat nothapak."

³ Ittina aul ittittik wonoppan toKapik ana ul ittittik woul wa'rntakathe tothun tuan topul

iprik ponoppa toKapik ipocot k'ran itti oKiappa. ⁴ Ana okin therekathe itti okin thaccokot oIeccuo thu'ran akin okkwothok. ⁵ Anaruk okin thi'rekathe itti, "Ntrun okorronno okkot lon len noma'ri mokamuthe akka ul okkot camutta."

OIeccuo pa'rutta ngaak noka'ran koPeththania

(Markkoc 14.3-9; Iuanna 12.1-8)

⁶ Manakka oIeccuo pokat cik noka'ran koPeththania tuan topul ipocot k'ran itti oCcamaan iponat inyï noka, ⁷ anakka oIeccuo pokat cik akwothïngkakot kriki kothokkun wothokure iccik kokuppu'rung akwo'rkoik, apul ipopari p'rek akkakat ngngaak iakkunako ere amutha ncu'ru copreththere ngonu cekerek crik apunathok ica.

⁸ Anakka ul iammakothok wimmat lon len, okin thuakathe ka, akin ipittarat lon itti, "Ngintha akka a'rupu enni okïttakinthet cik ittina? ⁹ Ngaak ngamutha engngi ngira akkaketta nakucci woppot, akucci ikkettat ul iaiak."

¹⁰ Menik oIeccuo pinakathe nolon len, akwi'rekat kin itti, "Ngintha akka nthuanet ka kopul ipopari empi? Akka pokkinthin lon iloporot. ¹¹ Ul iaiak wanon thaik tothun appinappin anaruk mpakannoka nanon appinappin. ¹² Akka kwo'rot ka kin ngaak ngamutha kwokat cik akwokuccekienthet thocïkkako thin cik. ¹³ Mpi'ret non lon ilaik icat itti na lon iloporot ongkenettat lin nocapu ncik appik, lon ila pul ipopari pokkothe lerettat cakuruk akin okwarttikothok ngngin."

*OIoutha pangkot itti kwakero oIeccuo
(Markkoc 14.10-11; Lukka 22.3-6)*

¹⁴ Opilin ntiakin ithattul ana ikken ke'ra, ipoc-cot k'ran itti oIoutha Icikkariuththi poingkanthet ul ittittik wonoppa toKapik ¹⁵ akwipittat kin itti, "Ngintha akka annethin amma mpocokk-iethenon oIeccuo?" Okin thekathok mallong imallio arrial ana alkaire (30). ¹⁶ Ncinang oIoutha pikkatheik akwo'rikot ca'ri ica kwocokk-iet kin oIeccuo ngngin.

*Thu'rit thokamuthe koThaurrot kaman k'rek cik
(Markkoc 14.12-21; Lukka 22.7-13, 21-23; Iuanna 13.21-30)*

¹⁷ Ana noca'ri corokit cokamuthe karrakith iella mü'rükül tit ul iammakot oIeccuo wakkakanthet oIeccuo akin ipittathok itti, "Ngkwongotho itti onin thathokkinthung cik kartha na atho'rkot thu'rit thokamuthe koThaurrot kaman k'rek cik?"

¹⁸ Kwi'rekathekin itti, "Noine opaththi anni'rethok itti, 'Pul ipangkene pi'ret itti, Ca'ri ica Kapik konekkenthin cik cakko napuththut. Mpaik patho'rkot thu'rit thokamuthe koThaurrot kaman k'rek cik inoul iammakothin tuan thanang.'" ¹⁹ Ittina ul iammakothok wokkatho ammakka kwi'rethekin itti okin thathokkot akin okkat thu'rit thokamuthe koThaurrot kaman k'rek cik.

²⁰ Anakka cipin capot, oIeccuo pokat cik akwikkoik othingkakot krika kothokkun wothokureokin oul iammakothok iattul ana ikken ke'ra iccik kokuppu'rung kothu'rit. ²¹ Ana akka okin thokat cik akin o'rkoik, kwi'rekathekin

itti, “Mpi'ret non lon ilaik icat itti opilin ntianon pakeron.”

²² Ul iammakothok wakorronno opirakat noka nolon len ana okin thikkatheik akin ipittot oIeccuo lon thuluththuluk itti, “Ili, atti okorronno okaoun?”

²³ OIeccuo pothiathe tit itti, “Okkwi ipanin thaik thathapettot nngucul nocaththak culukku uraththut ook akkakeron. ²⁴ Ukul wopul iponyi wio ammakka lokurrakot iatham woKapik. Anaruk angkre, nopul ipakero ukul wopul iponyi. Laakat loporot nopul pen amma pokat pakorronno okwonta.”

²⁵ Ittina aloutha okkwi ipathokero oIeccuo i'rekat itti, “Pul ipangkene, atti okorronno okaoun?”

AIeccuo othianthok tit itti, “Ii oung ammakka ngkwi'ret.”

Thu'rit thoIli thocipin

(Markkoc 14.22-26; Lukka 22.14-20; 1 Kurunthuc 11.23-25)

²⁶ Anakka okin thokat cik akin o'rkoik, aIeccuo onekat arrakith, akwopirakanthet Kapik noka akwomithat tit akwekat ul iammakothok akwi'rekat itti, “Noneko anno'rko, ka kin engki.”

²⁷ Kwonekathe keththe'ret akwopirakanthet Kapik noka ana kwekathekin ana kwi'rekathe itti, “Nikko nan, onon appik. ²⁸ Ngüccük ngin engi ngothonekket lon cik nguntantheit ul cik woppot, othakka itti aKapik occikinthet kin lon len ilokithak. ²⁹ Mpi'ret non itti mpakorronno appikko ngapak attang nciki inenni puccuk

aca'ri akkakat ica anikko nan unnaththungon ingili ngongappa.”

³⁰ Menik okin thongwathe kinye ana okin thoingkathe thapat noco'rong coCeththun.

Oieccuo peret thocukkwo nolon thoPoththuruc (Markkoc 14.27-31; Lukka 22.31-34; Iuanna 13.36-38)

³¹ Ittina oIeccuo pi'rekathekin itti, “Ngko'ra engi, onon thaththe naun appik nti ilon ilaik lathokkattathin, ammakka lokurrakot itti Kapik ki'ret itti,

'Mpakkwo pul ipu're

ana cungkut colungkat capettakot cik appik.’

³² Anaruk amma mpurokiettat nti ithio, mpaeo noththok poCelil anon tharthuk ao ana oron thincettot ceneket.”

³³ APoththuruc i'rekat itti, “Amma okin thantoththe naung appik anaruk mpakannothe naung kirrkkir.”

³⁴ AIeccuo i'rekat itti, “Mpi'rethung lon ilaik icat itti, athak'ruk tharthuk oo ngko'ra engi ngkwacukkwo nolon ma'ri m'rapuruk itti ngk-womman.”

³⁵ Anaruk oPoththuruc pi'rekathe itti, “Mpan-tio iraththe'ra, mpakorronno ocukkwo nolon itti mpommang kirrkkir.” Ana ul iammakothok w'rek wi'rekathe cakuruk menik.

Oieccuo pa'rat nga'rama noka'ran koCacci-mani

(Markkoc 14.32-42; Lukka 22.39-46)

³⁶ Ittina oIeccuo poingkathe okin oul iammakothok noka'ran koCaccimani ana

kwi'rekathekin itti, “Nikkoik cene aneo tentre anotha'ra nga'rama.” ³⁷ Kwipathe oPoththuruc ana nyukul nye'ra nyoCepethi ana kwikkatheik akwipo thiak ana kwakorronno okakat poporot noka kannan ana oka pïrrin noka. ³⁸ Menik kwi'rekathekin itti, “Cikït cin cipot thiak ana mpikkoik ere mpio. Nikkoik cene annocot kit cik unnaththut.”

³⁹ Kwoingkathe papotteik, akworrekat ka no-capu akweekat toca ncik akwa'rakat nga'rama itti, “Ngappa pin, amma laka, anekothin thocokot thiak enthi. Anaruk okonnoka ammakka mpongothe anaruk ammakka ngkwongothe.”

⁴⁰ Ittina kwopakkanthet ul iammakothok ana kwaththiat kin akin theot inthe. Akwi'rekat oPoththuruc itti, “Paththon, onon thakorronno occot kit cik manna papotteik unnaththuri? ⁴¹ Nikkoik ngkït thapat anna'ra nga'rama othakka itti annokorronno apot ithennekketta llon ilokithak. Cikït congothe itti cakkot lon iloporot anaruk ka kokinyat.”

⁴² Ana kwapproingkat thoka'ran ken attang akwa'rakat nga'rama itti, “Ngappa pin, amma lomma itti ngkwakannonekothin thocokot thiak enthi ana mpaccokot thiak anaruk aloka ammakka ngkwongothe.”

⁴³ Anakka kwokkaprttakot ntan, kwaththiat kin akin thaik inthe attang akka methe mamoccokothekin kannan. ⁴⁴ Kwoththekathe nakin attang ana kwoingkathe ana kwaththa'rakat nga'rama akwokkat ma'ri m'rapuruk, akwopakkukwet lon ila kwa'rat nga'rama ngngin tokït.

⁴⁵ Ittina kwopakkanthet ul iammakothok ana kwi'rekathekin itti, "Onon tharthuk thaik inthe ana ongokoi? Nontocikot, ca'ri cakko napatthut ana ukul wopul iponyi wakettat ul wolon ilokithak. ⁴⁶ Nuroko, aron eo akka okkwi ipakerothin ul pei panthan."

Oieccuo poccokittathe

(Markoc 14.43-50; Lukka 22.47-53; Iuanna 18.3-12)

⁴⁷ Anakka oieccuo pokat cik akwere, aIoutha okkwi ipokat nti iul iattul ana ikken ke'ra akkakat. Kwokat ponat cungkut coul wonu i'rittang iukwit wukwit ana mu'rang, aul ittittik wonoppan toKapik ana ul ittittik woul akkothiothekin. ⁴⁸ OIoutha ipathokerot ul oieccuo pappokenet ul lon itti, "Okkwi ipa anomicco i'rikothok toperere, ook pen annocokothok." ⁴⁹ Kwoingkanthet oieccuo accokkot akwi'rekathok itti, "Pul ipangkene, taththa?" akwomiccathok i'rikothok toperere.

⁵⁰ Oieccuo pothianthok tit itti, "Opuruko pin, okkothe ila ngkwainet itti ngkwakkot."

Ittina aul othakkarat iccik kung a'rumathok accokathok. ⁵¹ Menik apilin nti iul iokat cik ammakot oieccuo othat ki'rittang ikukwit ana kwokianthet pul iparekine pul iprik ponoppan toKapik kunu cik.

⁵² Oieccuo pi'rekathok itti, "Opakkethe ki'rittang ika'ruk akka okin ithangwo ul ni'rittang iukwit wukwit thille nni'rittang iukwit wukwit. ⁵³ Nthomma itti mpakkaro ongappa akwothianthin u'rupa wothonilettat

woKapik athar woppot accokkot athittarothini?
⁵⁴ Anaruk lon latham laka icat taththa ili're itti
 elli lonu itti laka ngkathar engki?"

⁵⁵ Menik aIeccuo i'rekat cungkut coul itti,
 "Mpapul pothu'ran akka onon thainin ni'rittang
 ana mu'rang itti onon thathoccokothini?
 Mpikikkot cik appinappin noppa toKapik
 anongkene ana onon thakannoccokothin.
⁵⁶ Anaruk elli appik lokkattathe aloka ammakka
 natham noul wothernte lon loKapik nokurrakot
 itti laka." Ittina aul iammakothok opellekat
 oththe naak.

*OIeccuo panekittat tokit kocuththun coul
 woIouth ittittik
 (Markkoc 14.53-65; Lukka 22.54-55, 63-71;
 Iuanna 18.13-14, 19-24)*

⁵⁷ Okkwion ithoccokothe oIeccuo thonekan-
 thok pul iprik ponoppa toKapik oKiappa na ul
 iangkene lon lothonce'ret lon cik ana ul ittittik
 woul wokat wa'rntakothe. ⁵⁸ Anaruk oPoththu-
 ruc pommakothok nciththan mono oingkat ci
 itha'rapak thokaman kopul iprik ponoppa
 toKapik akwikkat cik okin oul iangwot cik ak-
 wokatha itti ngempen akkakaik.

⁵⁹ Ul ittittik woul wonoppa toKapik ana
 cuththun coul woIouth ittittik appik wikkatheik
 akwariccat lon ilakin oruket oIeccuo ngngin
 ngkarra othakka itti akin okkwothok. ⁶⁰ Ul
 werekathel lon loppot ngkarra ilakin thorukethok
 ngngin anaruk okin thakanniat lon ilakin thokat
 cik akin okwariccat ana ul we'ra wakkathe
 tokit koul ⁶¹ ana wi'rekathel itti, "Pul empi pi'ret

itti, 'Mpakitto tupan toKapik ana mpuno noma'ri m'rapuruk.' "

⁶² Ittina apul iprik ponoppa toKapik urokat kapik akwi'rekat oIeccuo itti, "Ngkwaik pakan-nothiot ilon elli? Lon lointha elli ila ul enni waik werethung ngngin?" ⁶³ Anaruk oIeccuo pangkatheik.

Apul iprik ponoppa toKapik i'rekathok itti, "Antokkwo mio emmi ngk'ran koKapik ikaik icat itti ngkwi'ret nin lon ilaik icat, i'rethenin amma oung oMiccie, ukul woKapik."

⁶⁴ Aieccuo othiat tit itti, "Laik ammakka ngkwi'ret. Anaruk mpi'ret non appik itti, noluput ilanthen onon thimma ukul wopul iponyi

aikkoik thokkun wothothari wokkwi ipakor-ronno alkakot ana anthan aikkoik nonuththe norothi'rot."

⁶⁵ Ittina apul iprik ponoppa toKapik illillat eret wung akkua ka akwi'rekat itti, "Kwocungkot Kapik lon elli. Ngintha akka aron appo'rikinthet itti oron thappocikot lon arttot nan? Onon thocikotho akka kwocungkwot Kapik. ⁶⁶ Onon thi're taththa?"

Akin othiat tit itti, "Kwonu itti kwakkuttat."

⁶⁷ Ittina okin thothukkwathok nguk toca ana okkwekok nattal ana mmuccut ⁶⁸ akin i'rethok itti, "Miccie, antina itti oththa akkokkworung?"

OPoththuruc pi're itti kwomma oIeccuo
(*Markkoc 14.66-72; Lukka 22.56-62; Iuanna 18.15-18, 25-27*)

⁶⁹ O^Poththuruc pokat cik akwikkoik itha'rapak thokaman kopul ponoppa toKapik iprik aukul iareko cinang iopari akkakanthok ai'rekat itti, "Oung cakuruk pokat cik onnoleccuo poCelil."

⁷⁰ Anaruk o^Poththuruc pocukkwathe nan tokit ken appik. Akwi're itti, "Mpomma lon ila ngkwaik peret."

⁷¹ Ana kwoingkathe icuruk cothapat na ukul w'rek iareko iopari wimmakathok ana wi'rekathe ul iokat cik cinang itti, "Pul empi pokat cik okin oleccuo poNaccir."

⁷² Ana o^Poththuruc papprocukkwat nan ana kwarmakathe itti, "Mpomma pul pen."

⁷³ Ana papotteik, okin ithokat cik akin oco'ro cinang thakkakanthet o^Poththuruc akin i'rekathok itti, "Oung icat nti iakin akka kathar ika ngkwaik pere ngngin ka kene itti onon thaik naththut."

⁷⁴ Ittina kwikkatheik akwonane ka kung thattatta ana kwarmakanthet kin itti, "Mpomma pul pen."

Ncinang athak'ruk oat. ⁷⁵ Ittina a^Poththuruc okwarikat lon ila aleccuo paperet itti, "Athak'ruk tharthuk oo, ngkwacukkwo nan itti ngkwomman ma'ri m'rapuruk." Ana kwoingkathe thapat ana kwikkatheik akwoo thiak thiak.

27

Oleccuo panekittane ili oPilaththoc

(*Markkoc 15.1; Lukka 23.1-2; Iuanna 18.28-32*)

¹ Ana ngorrot ngi'rimak, aul ittittik appik wonoppa toKapik ana ul ittittik woul

akkakat akin i'rikat lon itti okin thakkwot oIec-cuo. ² Ittina akin i'rikikkathok akin onekathok akin ekathok oPilaththoc ipokat ili wonoththok poIouthia.

*OIoutha pakkwot ka kung
(Ngre 1.18-19)*

³ Anakka oIoutha ipokerot oIeccuo pimmat itti oIeccuo pakkmakot, kwopakkekatho cikit ana kwaththiat itti lon ila kwokkothe lokithak, kwoprattathe lon cik ana kwopakkekathet ul ittittik woul wonoppa toKapik ana ul ittittik woul mallong imallio imokat arrial ana alkaire. ⁴ Ana kwi'rekatho itti, "Mpokkothe lon ilokithak akka mpokerot pul ipakannokkot lon l'rek ilokithak ana paik pathokkuttat."

Akin othianthok tit itti "Onin thella kit ken. Oung akkonu lon len ikkun."

⁵ AIoutha orrekatho akucci noppa toKapik akwoingkat thapat akwi'rikat tho'rak nopira akwoarthatho calak cung ntho'rak akwiat a'riko nopira.

⁶ Aul ittittik woul wonoppa toKapik onekatho akucci akin i'rekatho itti, "Akucci enni weettatho pul othakka itti apokkwot pangken ana ittina lon lothonce'ret lon cik lonnon lakannangkotho itti wanekkettho tothun ittitho pakucci worupatho toKapik." ⁷ Ittina okin thi'rikatho lon itti akucci enni akin okero ngkopon kopul ipakkotho api akin ocikkaro ul tit wokwaatho. ⁸ Ana ilen akka okin thociekatho ka'ran itti, kopon koUccuk manna inenni. ⁹ Ittina alokatho ammakka pul pothernte lon loKapik Armia papperethe itti,

“Okin thonekathe mallong imallio arrial ana
 alkaire, ncekerek ica ul woIccereil
 wonekkenthok cik,
 10 itti okin thakero kopon kopul ipakkot api
 ammakka Ili wawi'rethin.”

OPilaththoc pipittot oIeccuo lon
 (Markkoc 15.2-5; Lukka 23.3-5; Iuanna 18.33-
 38)

11 Anakka oIeccuo poco'rot tokit koili oPi-
 laththoc, aili ipittathok itti, “Oung Ili woIouthi?”
 AIeccuo othiat tit itti, “Laik ammakka
 ngkwi'ret.”

12 Ul ittittik wonoppa toKapik ana ul ittittik
 woul wokat arukwet oIeccuo llon loppot anaruk
 kwakanni'rekat kin lon l'rek. 13 APilaththoc
 ipittathok itti, “Ngkwakannocikot lon elli ilakin
 thaik tharukwethung nnggini?” 14 Anaruk oIec-
 cuo pakanothianthok tit llon l'rek aththik, oPi-
 laththoc oprttakat tit kannan.

OIeccuo pakkmakot itti kwakkuttat
 (Markkoc 15.6-15; Lukka 23.13-25; Iuanna
 18.39-19.16)

15 Ittina thathuma thokat cik oPilaththoc itti
 kwelikkine ul pul pulukku nti ikorrkkor ipa
 ul wongothe itti pelikkako noca'ri cokamuthe
 koThaurrot kaman k'rek cik. 16 Ana ca'ri cen
 okin thonat pul ikorrkkor ipinakot kannan itti
 pokithak poccot k'ran itti oParapac. 17 Ana
 cungkut coul ca'rntakathe tothun aPilaththoc
 ipittat kin itti, “Oththa akka onon thongothe
 itti mpelikkinenon nti iul enni, oParapaci ana

amma okorronno oka ook oIeccuo iponu k'ran itti oMicciei?" ¹⁸ Ana oPilaththoc pappina kicce itti ul ittittik wonoppa toKapik ana ul ittittik woul woIccereil, wokat wonanok oIeccuo akka okin thaththonyiranok.

¹⁹ Anakka oPilaththoc pokat cik akwikkoik toprruk poili pothakkma akwokathacce lon len, opari pung pothianthok thon itti, "Kirrnni okkot lon l'rek nopul empruk ipella lon cik ila kwokkothe lokithak akka mporekot thiak man ngko'ra anathantakothok."

²⁰ Anaruk ul ittittik woul wonoppa toKapik ana ul ittittik woul werekekathe ul itti okin thipitto oParapac akwelikkakinekin, aIeccuo okkuttat.

²¹ APilaththoc ipittat cungkut coul itti, "Oththa akka onon thongotho itti mpelikkinenon nti iul enni we'ra?"

Akin othiat tit itti, "OParapac."

²² APilaththoc ipittat kin itti, "Ngintha akka anokkot naleccuo ipocot k'ran itti oMicciei?"

Akin othiat tit appik itti, "Nokkwethok nothapak."

²³ APilaththoc i'rekat itti, "Akaintha? Ngintha akka kwokkothe pokithak?"

Anaruk okin thi'rekatho appik mpo're citta cannan itti, "Nokkwethok nothapak."

²⁴ Anakka oPilaththoc pimmat itti lella ila akwokkot ana camutta cokat acuroko, kwonekatho ng'ri ana kwilakkatho nyaun tokit koul appik. Ana kwi'rekatho itti, "Mpella lon ikkun lothokkwot pul empi, onon akkonu lon ikkun."

²⁵ Aul othiat tit appik itti, “Kirrnni alon lothio thung oka nanin ana nonyukul nyin.”

²⁶ Ittina kwelikkanthet kin oParapac. Anaruk kwi'rekathe itti oIeccuo papoko kicce akwettakat ul irro akin othokkwethok nothapak.

*Ul irro wakkot ngure naIeccuo
(Markkoc 15.16-20; Iuanna 19.2-3)*

²⁷ Ittina ul irro woPilaththoc wonekathet oIeccuo noka'ran koili ikrik na ul irro wokath cik ana wa'rntakathet appik iccik koleccuo.

²⁸ Ana okin thuekathet oIeccuo eret noka ana okin thakiekathok kret k'rek ko're konili noul irro, ²⁹ ana okin thotherathet tukwia toli, akin akiekathok ica. Okin thonekkekanthok kurrong ikkun wothothari akin eekat ungu nci tokit kung akin okkothok ngure ngngin. Akin i're itti, “Ili woIouth, taththa.” ³⁰ Ana okin othukkwothok nguk ana okin thonekathok kurrong akin ikkat cik akin okkwekok ngngin ica. ³¹ Anakka okin thokkothok ngure ngngin, akin uekathok kret konili noul irro akin opakkekanthok eret wung noka. Ittina okin thipathok akin othokkwethok nothapak.

*OIeccuo pakkuttat nothapak
(Markkoc 15.21-32; Lukka 23.26-43; Iuanna 19.17-27)*

³² Anakka okin thokat cik akin eo, akin ocu-rat ipul p'rek ponoka'ran koKirin poccot k'ran itti oCcamaan ana okin thonekiekathok thapak tholeccuo mpu'ran. ³³ Okin thakkakathet noka'ran ikoccot k'ran itti Culucutha (ilonu itti ka'ran kok'rintil koca). ³⁴ Ana noka'ran ken akin eekat oIeccuo ngapak ngocikittakat

na'rupu w'rek wopun aapiet ka ikak'rellok cik, anaruk akka oIeccuo pinothe, akw'rakat ikko. ³⁵ Anakka okin thokkwethok nothapak, akin illillat iret wung nthokkwarot mo'rio. ³⁶ Ana ul irro wikkatheik nocapu akin angwothok nothapak. ³⁷ Ana to'ra woIeccuo nothapak, okin tha'rekathe lon ilokurrakot ilakin thorukwethok ngngin itti, OIECCUO EMPI ILI WOIOUTH. ³⁸ Ana ul wothu'ran we'ra wakin thokkwethe nothapak akin oIeccuo cakuruk, ap'rek nthokkun wothothari ana ap'rek nthokkun wothokure. ³⁹ Ul iokat cik akkette a'rupu cinang wikkatheik a'rıntitto ma ana ocungkwok, ⁴⁰ akin i're itti, "Oung ipaik pathokitto tupan toKapik aunat ma'ri m'rapuruki? O'rethe ka kang. Orpu ntan nothapak amma oung ukul woKapik."

⁴¹ Ana menik cakuruk ul ittittik woul wonopan toKapik ana ul iangkene lon lothonce'ret lon cik ana ul ittittik woul wikkatheik akkothok ngure ngngin. ⁴² Akin i're itti, "Kwo'rethe opilin-gon anaruk kwakanno'ret ka kungi? Amma ook Ili woIccereil, akworpo ntan nothapak inenni ana oron thaccokot lon lung nomikit. ⁴³ Kwonekkethe cikit nolon loKapik, kirrnni aKapik o'rethok inenni amma kongothok akka kwi'ret itti, 'Oun ukul woKapik.' " ⁴⁴ Ana menik cakuruk ul wothu'ran iarokat cik wokkwettathe nothapak akin aththut wikkatheik acungkwok.

Thio thoIeccuo
(*Markkoc 15.33-41; Lukka 23.44-49; Iuanna 19.28-30*)

⁴⁵ Anakka cingki angko ippa, ngi'rimak ngo'ratheik nocapu ncik appik puccuk mono acingki okkat c'rapuruk. ⁴⁶ Anakka cingki cokkothe c'rapuruk cocipin, oIeccuo pakkarathe mpo're cittan itti, "Eli, Eli, lama capakththani?" ilonu itti, "Kapik kin, Kapik kin, ngintha akka ngkwoththenet naun?"

⁴⁷ Anakka okkwion ithokat cik akin oco'ro cinang thocikothe lon len akin i'rekat itti, "Kwaik pakkaro oIIia."

⁴⁸ Ana accokkot apilin ntiakin ollat akwothonakat kret akwothapekat nngapak ingor akwonekkekat nokwo'ren ana kwonekkakathen-thet oIeccuo tothon itti kwikko.

⁴⁹ Apilingon i'rekat itti, "Antoco'ro aron okatha amma oIIia anthan akwatho'rethok."

⁵⁰ Ana oIeccuo pappakkarat mpo're cittan at-tang akwommottakat.

⁵¹ Menik akret ikapettoik konoppan toKapik illakat tit mprak we'ra, ncik to'ra mono uat ciki nocapu. Ana capu cikkatheik aco'rintittako ana amothok ongatta ntopangken. ⁵² Ana nupu noul illet nanyettekathe ana ka koul iupupure woKapik kurokiettakathe nti ithio kop-pot. ⁵³ Anakka oIeccuo purokot nti ithio, okin thoppathe thapat nti inupu ana okin thoiingathe noka'ran ikupupure koUruccelim, akin umman-thet ul ncik woppot.

⁵⁴ Anakka ili woul arrial ukuluk irro (100) ana okkwion ithokat cik akin angwot oIeccuo thimmat akka capu co'rintittakot ncik ana

lon ilokkattathe appik, okin thipathe n're akin i'rekat itti, "İcat okat ukul woKapik enni."

⁵⁵ Ul iari wokat cik than woppot iokat wom-makathe oİeccuo noththok poCelil aittarothok, wokat cik akathacceik nciththan. ⁵⁶ Opilingon ntiakin thokat oMeriom moMacthelia, ana oMeriom onnan poİakup ana oluccip, ana onnan ponyukul nyoCepethi.

Thocikkako thoİeccuo
(*Markkoc 15.42-47; Lukka 23.50-56; Iuanna 19.38-42*)

⁵⁷ Anakka cipin capot, apul p'rek akkakat papa'rthan poccot k'ran itti oİuccip ponoka'ran koRami ipokat pul ipammakot oİeccuo. ⁵⁸ Kwoingkanthet oPilaththoc ana kwipittathok kumi koİeccuo ana oPilaththoc pothiathe lon itti okin thethet oİuccip kumi. ⁵⁹ Ana oİuccip ponekathē kumi koİeccuo ana kwo'remethekathe ngkret ikie kothocikkarako ngngin ⁶⁰ ana kwaththocikkat ippu irie irapa'rathang pocu'rol ira kwappokkinthet ka kung ana kwothiathe ka'raccak icürük coppu ana kwoingkathe. ⁶¹ OMeriom moMacthelia ana oMeriom m'rek, thokat cik akin ikkoik akin oprttakot iccik korupu.

Ul iangwot tupu

⁶² Ana ngorrot ngen noca'ri icokat caCcepith, ul ittittik woul wonoppā toKapik ana ul woPriccin akkakanthet oPilaththoc. ⁶³ Akin i'rekat itti, "İli, onin thokwarikothe lon ila okkwi ipam-mikkarot pi'ret akka kwokat cik ngkit thapat itti, 'Mpuroko nti ithio amma mpokkothe ma'ri

m'rapuruk ippu.' ⁶⁴ Ittina othiothe thon aul othangwot tupu puccuk ama'ri okkat m'rapuruk. Othakka itti aul iammakothok okorronno omunyek nti ippu akin omekat ul itti pul pen purokiettat nti ithio. Akarra ken okakat kokithat kannan nakorokit."

⁶⁵ Ittina aPilaththoc i'rekat kin itti, "Noneko ul iangwot cik anneo thoppu annokkot tupu kicce othakka itti arokorronno anyattat." ⁶⁶ Menik okin thoingkathe ana okin thaththunukkat tupu kicce ana okin thonekkekathe ul cik iangwot tupu.

28

Thuroko thoIeccuo nti ithio
(*Markkoc 16.1-10; Lukka 24.1-12; Iuanna 20.1-10*)

¹ Anakka ca'ri caCcepith ceot ncik ana ngi'rimak noca'ri corokit noma'ri ime're'rapuruk oMeriom moMacthelia ana oMeriom m'rek thoingkathe akin othokatha tupu.

² Ana capu cikkatheik aca'rıntittako ncik appik ana u'rupa wothothilettat woIli wakkakathe ntan ntothi'rot aingkat noppu ana wopa'rekathe ka'raccak cik ntoppu ana wikkatheik noka'raccak. ³ Ana toca tung tokat cik arollio ere k'ran kothule'rak thokapik ana eret wung wokat wipuk ippuk ere pa'ra. ⁴ Ana ul iokat cik angwot tupu wipathe n're aikkat cik akkwe ka akin apukkat ka ntit aikkat cik ere ul illet.

⁵ Ittina au'rupa wothothilettat woKapik i'rekat ul iari itti, "Nokorronno ipo n're akka mpina itti

onon thaik thakwariccat oIeccuo ipokkwettathe nothapak. ⁶ Kwella cene, kurokiettatt ammakka kwappi'ret. Nanthan annathokatha ka'ran na kwappicettatheik. ⁷ Ittina ngkonon cokocokot annothi'ret ul iammakothok itti, 'Kurokiettatt nti ithio ana kwaik paeo noththok poCelil akin tharthuk eo. Ana onon thimmathok than.' Mpei pi'rethenon."

⁸ Ana ul iari wi'rikittakathe nthoppu nn're ana nthopira noka ana okin thollathe akin othi'rekat ul iammakothok. ⁹ Aleccuo ocurat iakin accokkot akwommiccat kin akin occokathok tacok akin ekat ungu ncik tokit kung akin a'rakanthok nga'rama. ¹⁰ Ittina aleccuo i'rekat kin itti, "Nokorronno ipo n're. Ngkonon annothi'ret opangkingon itti akin eo noththok poCelil nakin othimmathin."

Lon ila ul iangwot cik wi'ret

¹¹ Anakka ul iari wokat cik ikathar aeo atherene ul iammakot oIeccuo, ul w'rek irro iangwot tupu woingkathe noka'ran koUruc-celim ana okin thaththerekanthet ul ittittik woul wonoppa toKapik lon appik ilokat cik. ¹² Anakka ul ittittik woul wonoppa toKapik wikkot cik okin oul ittittik woul, okin thi'rikathe lon cik itti okin thethet ul irro akucci wop-pot. ¹³ Akin i'ret kin itti, "Onon thouu itti onon thi'ret ul itti, 'Ul iammakot oIeccuo waat ngko'ra ana okin thomunyet kumi anin thokat inthe.' ¹⁴ Amma lon elli loinet oPilaththoc, onin therenok anin o'ret non nti ilon ilokithak." ¹⁵ Ul irro woccathe akucci ana okin thi'rekathe lon ilakin thi'rettathe itti okin thi're. Ana lon len

likkathelik alopettakot cik iul woIouth manna inenni.

Oieccuo pacimitto ul iammakothok

(Markkoc 16.14-18; Lukka 24.36-49; Iuanna 20.19-23; Ngre 1.6-8)

¹⁶ Ittina ul iammakot oIeccuo iattul ana ikken culukku (11) woingkathe toco'rong noththok poCelil na aIeccuo pappi'rethekin itti okin thaeo.

¹⁷ Anakka okin thimmarok, akin a'rakanthok nga'rama anaruk opilingon thonat lon le'rarit.

¹⁸ OIeccuo pothakkarathe iccik ken akwi'rekat kin itti, "Ongappa pethin ngili ikkun appik ngolon lorothe'rot ana lonocapu. ¹⁹ Ana ittina ngkonon noul nocapu appik ana annongkenekin othakka itti akin othakka ul immakothin. An-

nikkekat kin mamuthie ngk'ran kongappa ana kokkul wung ana koKanang ikupupure, ²⁰ ana annongkenekin itti okin thaccikot lon appik ila mpi'rethenon. Nina nan itti mpakaik nanon appinappin puccuk aluput ocothakat."

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 23 Aug 2023 from source
files dated 29 Jan 2022

b9cb69ce-3694-5d9f-bda5-4a2243fae